

環遊二十九國記



鄒海濱著

世界書局印行

環遊二十九國記


鄒魯自署



3 2167 8245 2




影攝之時國歸者記



鄒海濱環遊二十九國略圖



記 出 國 時 之 攝 影



鄒海濱環遊二十九國歐洲之部路線詳圖

序言

此次旅行歸國。人問有所得乎。則肅然對曰。吾斯之未能信。自惟進德修業。有志未逮。不能以溫良恭儉讓之感召。與聞人國之政。而言文扞格。時日恩遽。安敢云有所得乎。然而一履其境。則學校。工廠。醫院。公園。森林。道路。田畝。牧場。無一不接於目而警於心。甚至一禽一獸。一草一木。均足以資吾啓發。益以同志僑胞。隨事指導。友邦賢達。備予諮詢。安敢云無所得乎。於是信筆而書。取便記憶。而見仁見智。藉以就政於高明。蓋斯篇所記。純爲事實。不加論斷。願國人由事實而鑑別。由鑑別而取捨。而不囿於一人之見也。嗟夫。論科學建設。則貴趨變隨時。而道德人紀。則我有數千年之文化在。故因人之問。申其言以冠吾遊記之首。

昔中華民國十七年十一月十一日鄒魯

付印贅言

茲篇逐日記個人旅行見聞。正如走馬看花。範圍狹隘。不足以言旅行指南。或政俗考察。

茲篇逐日在途記載。陸續寄上海報紙發表。非在一室一氣編成。故詞句章法。間有重複。

茲篇里數尺數。皆據當時聞見。卽行記錄。各國書籍及各國導者所述之里名尺名。各不相同。中有本國人所言者。更改合本國之里數尺數。以後欲追改一律。又恐或有錯誤。治絲愈棼。因仍其舊。

茲篇初意。原擬記其大概。在報上作通訊發表。以後歸舟一月期中。再行補詳。及歸舟翻閱。已記者尙可彷彿。未記者完全茫然。且情過境遷。情感亦無由興發。雅不欲以調查及翻譯所得闖入。反失當日情事。故祇將原稿付印。不加添改。

茲篇教育政治等。悉記與各國當局談話。及耳目所見聞者。其一切法律章程。概未列入。以法律章程。具在各國官書或專書中。可以一查便悉也。

茲篇所記聞見。間有詳略。以隨時事物之接觸不同。而精神之良否亦異。至美洲較略。則當日實祇擬記其大概。

此次遊歷。有一國。曾往返數次。既非一地。更非同時。故往往散見前後。須參觀目錄索引方明。

茲篇譯名。凡中國書有者多依之。并附其對照表於篇末。

茲篇逐日途中率記。極少書籍參考。錯誤所在多有。深願高明賜予教正。

目次

序言	一一二
贅言	一一二
日本——檀香山	一一〇
美洲五國	一七八
美利堅	一
墨西哥	二九
巴拿馬	三四
古巴	四四
加拿大	七〇
法蘭西	一一二
瑞士	一二七

意大利——摩納哥	一一三九
奧大利	一一一〇
匈牙利	一一一七
捷克斯拉夫	一一一二
德意志	一一一九
瑞典——挪威——丹麥	一一一四
德國漢堡	一一一四
荷蘭	一一一二
比利時——盧森堡	一一一三
英吉利	一一二〇
葡萄牙——西班牙	一一三三
地中海東岸諸國——非洲——印度洋岸——太平洋岸	一一一〇
希臘	一一

土耳其	一七
西里亞	三三
巴力士登	四二
埃及	四六
印度	七四
新加坡	八三
安南	八八
香港	九四
廣州	九四
台灣	九六
上海	九六
旅行意見	一一九
附索引	一一〇

中西文人名地名對照表……………一〇

環遊二十九國記

日本 檀香山



(南)

中華民國二年。余當選衆議院議員後。曾爲旅行計劃。蓋衆議院任期三年。每年開會。逢展期至多六個月。擬第一年閉會後之六個月。旅行全國。第二年閉會後之六個月。旅行全球。乃討袁失敗。亡命日本。此計劃遂無從實現。十四年任國立廣東大學校長時。擬往各國調查教育。籌備一切矣。爲清黨事。開第四次全體執行委員會於西山。總理靈前。從同志後。不敢告勞。遠行之意。亦即中止。及去冬中央特別委員會停頓。自維棉薄。無補時艱。遂毅然決心浮海。族兄敏初。助以旅費。由江蘇交涉署取得游歷護照。乃成行焉。

中華民國十七年一月十四日。乘大洋丸由上海出國。同行有許汝爲兄及其家眷。居覺生程天固陳翰譽諸兄。並內弟許少榮。日友山田君與焉。覺生山田往日本。少榮則送余至日本橫濱。漸行同志及親友送者數十人。迨船出吳淞口有感。口占一絕云。

誰云此壯行。多難乃辭國。周遊可興觀。吾願師孔墨。

時船中有相呼者。見之不識。詢之知爲廣東大學學生陳丘二君。赴日本留學者。嗣復遇同學甘梁二君。皆廣東大學員生。尙有莫君等四五人。乃往神戶任教員者。舊時同學離別久矣。不圖在此晤見數人。心神至暢。

十五日風平浪靜。

十六日早三時汽笛嗚鳴。船過門司。而行內海。早餐後與廣東大學員生閒話。其後寫書數封。入夜船抵神戶。因霧不能泊岸。旋有水警來云。得內務部令。特來招待。并問明日行程。且備有汽車二輛使用。新聞記者亦紛至。是夜覺生山田少榮宿於岸上。

十七早起有黨部同志楊壽彭陳清機楊尙之等先後來訪。覺生山田少榮等亦回船。日友菊池水野萱野諸君及新聞記者均至。寒暄後。偕覺生汝爲等至同志處。遂乘當地政府所

備汽車至大阪。先後參觀朝日新聞社。每日新聞社。乃乘車至西京。遊金閣寺。園林池沼。點綴至美。行跡所至。各地政府皆派警察三人保護。當夜即乘車赴東京。

十八日晨車到東京。黨部同志日本友人來者甚衆。事先未曾電知同人。而能推測行期。咸來相接。殊可感也。至帝國飯店。與同志日友新聞記者晤談後。即與汝爲覺生等訪參謀部長松井。此君固專司對吾國外交軍事計畫者。其對於中國野心。即可於談話中見之。蓋不云助某。即云助某也。嗣訪秋山夫人。犬養毅君。并弔寺尾先生之墓。秋山寺尾皆向助吾黨者。均已故。晚與覺生同赴東京總支部歡迎會。松井回拜。汝爲招待之。

十九日上午與廣州中山大學教授費鴻年。參觀帝國大學。該大學教授入澤博士。引觀甚殷。前入澤奉其政府命至中國時。在廣州與有杯酒緣也。此校地震被燬以後。今已煥然一新。十五年未至日本。今來於地震之後。反覺無一不較以前爲進步。而道路平闊。交通便利。其最著者。昔時路皆浮石。今則土敏土矣。前之汽車所見至僅者。今已通街滿巷矣。即其長途國路。亦至平直。

下午與同舟諸人。乘車遊熱海。途經江之島鎌倉憩焉。江之島爲井濱沿岸一小海島。通以長木橋。旣抵島。歷階而上。未半則爲島巖。復上乃至神社。兩旁貝類店甚多。次爲茶社。神社四圍。遍植花木。尙稱雅潔。比返再乘車至鎌倉。遊長谷佛寺。中有大佛。高可三丈餘。面長可八尺。外莊中空。佛腹可遊。佛背有窗。自內可以望外。遊後仍乘車赴熱海。至熱海已夜八時有奇。各人先後入溫泉浴。蓋專爲溫泉浴來也。

二十日上午遊熱海海旁。一路風景至佳。及遊梅林。梅花正盛開。冷香沁人。清豔無比。乘車返橫濱。與汝爲天固翰譽及汝爲家眷乘原船東行。覺生少榮欲暫留日遊歷。然後返國。遂亦握別。行時各同志多來橫濱相送。手執青天白日旗。國外見此。其喜可知。船開未久。爲風浪所苦。臥不能起。

二十一日仍暈船。兼腹痛。僵臥不能飲食。使者再三勸餐。乃強進少許。因口占云「殷勤將飲食。爲汝竟加餐。」

二十二日風止。腹疾亦愈。得詩一首。

放舟太平洋。洪濤勢欲狂。云是冷熱流。於此一徬徨。平時已洶湧。况值風力

強。海水聳船面。浪花濺危檣。柁樓試極目。八表竟昏茫。回顧操舟者。履險若洋洋。居危不驚擾。荆棘自康莊。俄而風浪靜。舉舟喜相望。謀國亦如是。何爲翻覆忙。

是日檢查日歷。知爲夏歷除夕。回憶兒時歡樂。爲之悵然。

二十三日黎明卽起。倚船面四望。大海茫茫。祇見朝陽。成四言一首。

大海茫茫。惟見朝陽。白波相接。碧水飛揚。樓船乘浪。穉米太倉。壺中天地。寢食安康。萬有羅列。我心是王。何小不入。何大不藏。舉頭四望。渺乎八荒。

二十四日船中稍事看書及游散。

二十五日起身後。見羣鷗飛翔。四無島嶼。因口占云。

水鷗款款傍船飛。何自來兮何處歸。我亦東西南北者。海天容與共忘機。

晚得三藩市總支部陳耀垣同志來電歡迎。并云已電檀香山黨部接船。

二十六日同船日本人要求寫字。因識其中數教授。入澤并用函介紹佐藤男爵。數教授

及佐藤均赴歐者。晚日本人以食物見貽。蓋答今日之字也。

二十七日得伍梯雲兄電。知與展堂哲生諸兄。於二十五日西行赴歐。是夜得見月詩一首。

去國十餘日。今宵見月明。朦朧雲妬月。棖觸故園情。

二十八日爲余生辰。因船東行。中間須增一日。方能合歷。故此次有兩二十八日。兩日皆無事。吟成一絕。

東航逐度早逢寅。添日方能合歷旬。却喜今年生別趣。連朝報道是生辰。

余對於詩。素抱「不吟藏拙」之戒。今在船上。不覺興發。信手拈來。聊以自遣爾。

二十九日明日船可抵檀香山 Honolulu。預作書以寄國內親友。

三十日午船抵檀香山。沿岸。卽有檀香山總支部代表。各團體代表數十人。皆佩歡迎徽章。前來碼頭。最奇者則各人持花串掛於受歡迎者各人之頸。初甚訝。繼知此間俗例也。余及汝爲天固翰譽等。上岸後卽先後至黨部各團體處致候。至十二時有奇。赴自由戲院之黨部及全檀各團體之歡迎會。院甚大而座爲之塞。然秩序至良。相繼演說畢。卽

赴公宴。皆謂今日同志同胞之踴躍。實空前所未有。蓋黨部自受共產黨分化後。前星期始歸統一。見黨員之和氣一團。心爲之慰。宴後由黨部及團體代表。乘車導遊各名勝。至巴里山徑。據云土人抗拒美人時。敗至此山。始完全屈服。故美人立碑以爲紀念。山徑風勢頗烈。立其山角。幾爲吹倒。或四面兜風所致。其地茂樹成林。綠草如茵。土人之在山凹者。男女互相謳歌。人極平等。故吾僑除入境受苛外。住此尙能相安。計華僑之在此者。共有二萬五千一百九十八人。就中有一萬四千四百二十一人。兼入美籍。至於財產。祇不動產一項。已有一千七百四十七萬四千二百金元。納諸政府之稅。去年一年之內。計七十萬八千八百七十七元。而吾僑之教育。亦有相當成績。計入當地學校之學童。共五千九百四十二人。而專讀中文者。亦有二千五百人。此各種學童中。受公共慈善機關補助者。不過八十九人。其餘皆自費。則吾僑之財力教育。亦可於此見之。其受高等教育者。只以此地夏威夷大學論。已有中國學生一百五十六人。來自中國者不過六人。其在美國各大學肄業者。尙不在內。

此地教育甚普及。復有夏威夷 *Hawaii* 大學。此校創於一九〇七年。初爲農科及工程

科大學。至一九二一年則由檀香山政府。改爲各科完備之大學。分作兩院。(一)爲專科學院。內有製糖農林工程化學等科。凡畢業者授與某科學士。再研究一二年。及格者則授與某科碩士。此後則研究博士。開辦至今得博士者祇有一人。(二)爲文科學院。內有各國文學史學政治經濟商科美術哲學。文科畢業者。授與文科學士。其碩士博士之授與。一如專科。此外有預備醫科。及預備法科。因二科未有正式大學。祇可轉入美國各大學。

此校有教授及助教七十五人。中有政治學及國際法教授一人。爲我國華僑林壘君。亦吾華僑之最特色者。此外有中日兩國文教授。則中日兩國人充任。

學生分正式與特別二種。現有正式生五百八十九人。特別生五百二十二。合共一千一百一十一人。吾國學生占一百五十六人。此外白人居三之一。日本人居三之一。其餘則高麗印度及菲律賓人。

其經費每年三十五萬元。大別之。則教員薪金約十五萬元。管理費用約十五萬元。建築費約五萬元。其來源則檀香山政府。每二年撥二十六萬元。美國政府。每年撥五萬元。

。其餘來自基金所生之息。及私人捐助與學費。學費甚少。本地學生不收學費。來自外國者。則每年收學費百元。

此校以製糖爲最有名。次則農林。其餘各科。現亦積極發展云。

嗣後乘車遊市一週。道路之良。交通之便。園林之佳。以及建築物之整齊。人民之熙攘。無美不備矣。遊後翰譽大有願受一塵爲氓之概。此間有一旅館。其住房有一日百餘美金者。當時同志擬以之爲招待所。幸而即日由原船行。不然太破費矣。然此每日一住百餘美金之旅館能存在。亦足見其地之富庶焉。

檀香山太平洋中一小羣島也。昔爲王國。一八九三年改建共和。美國屢欲得之。土人屢力拒之。卒於一八九八年。力屈。爲美所併。同時美復割得菲律賓濱於西班牙。乃於檀香山菲律賓濱。各設一軍港。於是美之勢力。橫互太平洋。竟握太平洋霸權。若是則所謂門羅主義 *Monroe Doctrine* 及主張民族自決之美國。尙如此。他可知矣。惟是檀香山扼亞美澳三洲航線之中樞。尤爲太平洋海權所必爭之地。美雖遂欲。日豈甘心。故近來日本對此極力經營。人數大增。卽大學學生。亦占三分之一。一旦太平洋有事。日固自

誇睡手可得檀香山。是又未可全以安樂士視之也。

四時許回船。送行者復至乘。同志同胞之殷殷盛情。至可感也。

船開後。無日不與海天相對。消此良辰。直至二月三晚。因明日船將抵三藩市 *San Francisco*。晚間開大宴會。廳中掛萬國旗。而中國國旗。係用青天白日者。同行各人。皆浮一大白。

美洲五國

美利堅 墨西哥 巴拿馬 古巴 加拿大

四日船至港口。此次來美。自日本啓航。卽得三藩市拍無線電至船歡迎。檀香山啓航。復得歡迎之電。故船一抵港口。三藩市總支部同人。已偕日本郵船公司代表。各報記者前來。忽見飛機翔於船之空際。初意美人演習。後知爲同志歡迎者。繞船三匝。揚手巾。呼口號而去。將泊岸。早見日本郵船公司高掛青天白日旗於碼頭歡迎。而同志及各團體代表立岸上者數百。上岸後汽車百餘。列隊巡行。加以軍樂。青天白日之旗。布滿全埠。所住之旅館。亦掛青天白日旗。

五日赴大中華戲院之三藩市總支部及支部之歡迎會。

六日赴中華會館之歡迎會。其餘團體之歡迎。亦日有二三處。此間族姓最重。如許姓之歡迎汝爲無論矣。最奇者則美洲往往數姓絕不相關。聯爲同宗者。劉關張趙。前此遊記已有人言之。此次以同宗歡迎汝爲者。有聯義公所。查係以「言」旁之姓聯合爲一。將「譚」「談」「許」「謝」認爲同宗也。復查「陳」「胡」「袁」聯爲同宗。云同出自大舜。「蔡」「吳」「周」「翁」聯爲同宗。云同出自文王。「鄧」「葉」「白」「岑」聯爲同宗。云爲同郡。「黃」「伍」聯爲同宗。云因姑子歸宗關係。另有「雷」「鄭」「方」聯爲同宗。「薛」「司徒」聯爲同宗者。則未詢得何種關係。亦一趣聞也。連日忙於酬應。曾夜乘汽車遊公園一次。車行約四十分鐘。園大而草木疏密得法。日間曾環遊全埠。參觀歐戰紀念堂。博物館。水族館。各一次。匆匆而去。因自笑云。與其謂在此數處參觀。無寧謂爲在此數處跑步。此間市政聞爲全美之冠。市長連任至五次。教育亦極發達。交通至爲便利。有一街四電車路者。加省 California 全省。(三藩市屬加省)有汽車二百餘萬。人口祇四百餘萬。平均每二人有一汽車。而電話則平均每人有一具。卽此可見一斑。

十一日下午一時。與汝爲天崗翰譽等。由三藩市乘汽車赴葛崙 Countyland。由三藩市

至葛崙。隔一海灣。須數十分鐘輪船。方能渡過。余等卽坐原乘汽車至輪船。安然過去。此船可容百輛汽車左右。二十分鐘開一次。此類輪船碼頭。在三藩市有數處。可見其交通之便。現有人擬築長橋。政府欲其築地道。此後世界交通除地面外。必有一空中。一地下。行一小時左右。過一橋。橋長十里。亦巨觀也。至數里之橋。則不知經過多少。其道路「周道如砥。其直如矢。」八字。足以形容之。全國鄉市已一律可通汽車。此中人聞國內南京廣州等汽車。限於一小區域能行。視爲新聞。現福特 Ford 公司所出汽車。每輛止須三百餘美金。而乘火車來回紐約三藩市一次。車價幾相等。故此間有人赴紐約者。改買一汽車。用款相當。且得常用。實至便也。至汽車油。其價賤無比。每加倫只十八仙。行汽車一日。以十小時計。其費不過三元。故以美國全國計。每六人有一汽車。以加省計。則每二人有一汽車。近日汽車房。實爲美國一大問題。至在美國之人。則幾人人能駕駛汽車。雇汽車夫者至少也。所經各處。一望平原。麥田菓園。每數十里爲一區。有一牛場。則經十小時汽車而不盡。耕植動用機器。家多木屋。悉至精美。據市政廳人云。尚有六分之四未耕之地。(一)因本國人少。(二)因農產多而價賤。不欲

多墾也。此行因事耽擱。在三藩市逾所定時間始開車。則葛崙同志。候於百里外者百餘人。已三小時有奇。汽車共六十餘輛。因是日同志各休業一日。來相歡迎。閱之心至不安。至葛崙已五時矣。卽至黨部小息。黨部附設於中山學校。因黨部去年被焚也。此埠原有百十店鋪。經去年大火。存二十餘間。五時半赴歡迎會。演說後宴會。此間無酒店。酒席皆由黨員自辦。黨員散住各田園。非常熱心。亦至團結。殊可佩也。

十二日上午十時。由葛崙起程赴斐市那 Fresno。道經樂居埠 Lodi。分部同志。歡迎甚殷。與汝爲爲一小時有奇之演說。經市作頓埠 Stockton。各同志候此歡迎者不少。因時間關係。僅傾談二十餘分鐘而別。五時至斐市那。此埠頗大。人亦較衆。歡迎汽車亦多。到後先至旅館少憩。嗣赴黨部歡迎會。晚餐而回。

十三日由同志導遊是地高等學校藝園等處。晚開歡迎會於香江樓。此間教授斐立博士亦參與。盛道三民主義之良好。聞此博士甚服膺 總理主義。故此余等到此。亦參與歡迎。

十四日由斐市那回三藩市。順途往觀硫磺池。七時半抵三藩市。同時之路。在去路之

東。所過各市多整齊。較之中國各城。幾乎莫不過之。不禁感慨繫之矣。

十五日由商會介紹。并派二人引導。參觀美埃崙海軍站。是站實美國西方唯一海軍港。有海軍大將駐焉。乘船而往。經一島。名曰海崙。有木屋數十間。知爲美人留難華僑到美之所。聞常拘禁華僑數百人。市政廳某顧問云。此間經費。年須千餘萬。有擬裁之者。輒爲所阻。因有一部份保飯碗者。把持其間云。美之政治。孰云盡清明哉。一小時奇抵岸。有司令及濟亞氏來接。旋乘海軍大將地頓氏派來之汽車到公署。與地頓大將談片時。復由濟亞氏引導。參觀造船廠木廠鐵廠潛行艇廠等處。逐一解說。至十二時半。地頓大將在公署設宴招待。備極優渥。惟港地要塞。未引參觀。

十六日早赴市政廳參觀。由市長羅夫氏及其警察長祕書長十餘人出而招待。三藩市二十餘年前地震後。成瓦礫場。今日得此繁盛。聞得此市長力不少。故四年一任。計至今連任五次。實今日民選中任期最長者。詢其有何祕訣。據云。不愛錢。用人公。談話甚談諧。云遠客來。當宴以酒。詢以美正禁酒。何以有酒。據云中央禁酒。地方否也。且不飲酒。何以表示歡迎遠賓。蓋美國中央政府。不能干涉地方自治。往往中央政令。不

及地方。而地方自治之範圍。則日益擴大也。詢其教育經費。據云市歲收入三千餘萬。三分之一爲教育費。有千餘萬云。其建築費尙不在內。其祕書長出其學校圖。繁簡無一同者。據云依地方情形而建築云。嗣由其祕書長引視廳內各處。建築至爲宏偉。據云值千萬云。其圖表至詳。以教育一項。言入學兒童多少。何校肄業。若何年齡。均有極明晰之圖表。反觀我國之教育事業。爲之頹然。十一時至披詩度軍營參觀。由陸軍大將傾討氏接待。復派司令官二人引觀營房及各要塞礮臺等處。而新設之要塞在外重者。并未引視。下午二時。往卜技利 *Bethel*。參觀加省大學。由其校長甘巴氏副校長克地氏招待。復派員陪同參觀其圖書館課堂鐘樓演講堂球場等。演講堂可容二萬人。球場可容八萬人。均希臘式云。惜時間倉卒。未盡所觀。但一入其中。見學生之伶俐活潑。雅可人意。此校有學生一萬數千。實爲美國人數第二多之大學。

十七日與汝爲天固翰譽等參觀山坤頓監獄。此監獄係加省所管。容三千餘犯。實美國之最大監獄。由副監獄官和頓氏出而招待。此地爲半島。面海背山。風景殊佳。山上房屋十數所。至精美。知爲監員所住。有大房屋一。知爲監獄。入其中即見花圃一所。次

第參觀監犯住房。造靴工場。織麻布工場。木工場。鐵工場。印刷所。圖書館。醫院。影片處。犯人夜九時入住房。早六時一律出房工作。工作日八時。餘則看書運動。聽其自然。犯人皆怡然不見戚容。初入監者。須入織麻場六個月。是為最苦之工。自中國工人觀。仍是最易者。凡研究大學課程者可免作工。并由省派教授。以一定時期入獄演講。其學生限中學畢業者。始得研究此課程。聞甚多大學畢業得學位者。聞有一犯。監禁十年。專研究農科。出獄後成有名學者。犯人出獄之日。即為大學畢業之日。亦至趣也。中有星期報。月報。主筆者皆為犯人。言論亦頗自由。由其贈星期報一份。中有論「監獄中教育問題」改良待遇問題」。即可見其一斑。參觀圖書室。余謂天固曰。此圖書室實較廣大法科圖書室為優。實事實也。食有湯有魚有肉有豆。且有音樂。翰譽曰。馮煖可免歌長缺乎。余曰。是鐘鳴鼎食之家也。故入此獄時。祇入監門及住房。見有監獄氣象。餘則惟見工廠學校而已。治監獄學者之言曰。入其國。觀其監獄。而知其盛衰。信哉。十二時半。副監獄官以所乘之汽車偕余等往午餐。途中指曰。此牧場也。此農場也。管理犯人之獄官。所用之廚夫皆犯人。且皆中國廣東人。據云中國犯人有五十餘。

均易管理。入餐時有餅一。中用色糖砌成二詩。自署「旅囚感賦」。詩尙不惡。記末句有云。「匡時主義是三民。」似非無心肝者。餐甚豐。意爲廚夫加意者。席將終。副監獄官曰。「昨夜余問作廚之犯。汝知明日來此者係中國何人。彼答曰。美國之華盛頓一流人也。彼欲見君等。君等願與見乎。」余等允之。伊親入引廚夫數人來見。并撫其背。足見其平等。餐後。參觀女監。在男監之右。係新建者。室甚寬敞而幽雅。犯人種花及作手工更自由。且有高歌者。引觀住房。一見訝爲大家小姐閨房。房中陳設。五色雜陳。甚至水廁亦覆以繡布。此外影戲場。跳舞場。應有盡有。犯人祇一百餘人。出門時守門者向余等言曰。「此地勝斐律孟旅館乎。」余等笑而領之。斐律孟係余等所住之旅館。市中之有名者。據監獄官云。犯人四之一爲愛情。四之一爲劫財。而每人每年由政府支出供應各費計二百七十餘元。仍擬增加云。查其女犯少。而男犯如此多者。因女人犯罪。美國例得寬也。

十八日。汝爲天固翰譽參觀江尼古報。余則參觀士丹佛大學。校長已赴古巴 Cuba。由其政治系主任出而招待。旋參觀辦公廳。課室。禮拜堂。圖書館。藏書樓。博物館。

美術館。學生會。中國學生會。體育館。其球場則新建。能容十萬人。較卜技利大學爲大。西人賽球。視爲重大事。每年卜技利與士丹佛賽球。無不坐爲之滿。入場票每張十元云。此大學係一省長捐資辦理。校例收三千五百學生。而女生限收五百。以紀念其子士丹佛者。故卽以其子士丹佛之名名其學校。其子係在意大利留學。因一女子而死。故此校對於招收女生有限制。美人往往一人出數千百萬。獨建公共事業。士丹佛如此。而前此所遊之歐戰紀念堂。金門公園之博物館。均如此。甚可佩也。至美國每市均有圖書館。均爲鋼鐵大王所捐辦者。其他某王某王。無不競辦公共事業。無怪美國文化之日進也。

二十日休息一日。爲各同志所浼作字。亦到各埠必不詭免之一事。廿一日上午由教育局介紹。並派員導觀各學校。先至士作頓衾馬學校。此校附近華埠。專爲華人而設。近亦許西人入校。但西人無入之者。美國向以無種界標榜。實則無處不存種界形迹。聞三藩市前曾爲日本人設專校。不許日本人混入其他市校。日本人起而向美政府抗議。美政府以無權干涉地方事婉拒之。日本謂美政府已無權干涉地方事。當直接行動。卒由總統

羅斯福 Roosevelt 召市長到華盛頓 Washington 與商。始解決此事。其時之市長。即現今之市長也。到校後。由校長哥羅威路氏導觀全校。招待頗殷。此校校長以及教員。似均係女子擔任。其學級。係由幼稚園至小學四年。學生年齡至參差。管理亦未見得法。據聞三藩市華僑學童統計入當地學校者。小學約有一二〇〇人。初中約有三〇〇人。高中約有二百人。此外入教會辦之幼稚園有四百餘人。而吾僑自辦之華文夜學。計中華學校有二六〇人。南僑學校有二四〇人。陽和學校有一八〇人。此外教會辦之協和學校。有一八〇人。以如此多之華僑。只有小學以上學童一七〇〇人。已覺其少。而此一七〇〇人。兼入夜校華文學校者。只得其半。幼年全受外國教育。耳濡目染。其能不為外國化者又幾何。言念前途。杞憂曷極。次參觀商業中學。此校有學生二千餘人。中有中國學生十餘人。校長已赴波士頓 Boston 教育大會。由其副校長大國民親引參觀各課室。每到一課室。并由各教員學生試驗功課與觀。當至速記室。并請余親演留聲筒。云將為紀念。至歷史室。適教羅馬史。教員指一西人學生演講。該學生起立直講。間有誤者。由教員立予更正。次指一中國學生演講。該學生不起立演講。再連指中國學生二人。亦

如之。此真難堪者。嗣參觀該校禮堂。能容二千餘人。據云係由隔四街移來者。美國常有將整間屋由此移彼者。於途中常見之。但如此大者。則未之見也。是日下午本有數校擬參觀。乃因與天固會約一共和黨有力黨員某參觀其俱樂部。遂於下午二時由某親自駛車迎往。車行郊外約一小時。其俱樂部至矣。一望小山起伏。松柏參天。雜以花草。開歸俱樂部範圍者。有一千餘畝。每百餘步即有小木屋一間。屋多因山因樹而築。據云係每一黨員即自築小屋一間。以爲行樂地云。無何。至其本人之屋矣。入門一大廳。前半有床三。後半亦有床三。中間檯椅櫃物。廳後有小房三。一爲廁所。一爲浴室。其一則一開門但見無數酒罇酒瓶。某一告以酒類。某者係由飛機運來。某者係由潛水艇運來。言畢詢何所嗜。詢後取酒各予一巨杯。由後門導至廳側。乃一露天小跳舞場。地以板製成。松柏蓋其頂。極爲雅緻。飲後導遊。則有露天戲院。可坐數百人。週環以樹。有露天公衆跳舞場。據云男女酒闌雜沓時。冬則折四週之枯枝舉火其中。跳舞於傍。夏則折四週之綠葉鋪地爲茵。恣其坐臥。有露天會場。可坐百餘人。附以露天公共食場。容人數亦相等。復入一室甚大。中列木檯數十。椅無數。云係賭室。賭具則應有盡有。此

外普通之種種游戲場。體育場。無不畢備。則不待言。其習槍也。云係由一人在山頂放鴿飛翔。以槍擊之。卽此可知其遊戲規模之大。據云此特其小者。尚有一俱樂部。其地可占二萬五千餘畝。每選舉以此爲發蹤指示地。并欲約遊。因行期已定却之。此俱樂部以家庭組織法組織之。其會長曰父。會員曰子。入會皆政治上握有實力之人。當地最高官吏。亦在其內。入會須納會費五百美金。遊後某出一冊屬題。以留紀念。余率題四語云「入世出世。塵襟洒然。深山大澤。龍蛇生焉。」某甚喜。再三云欲譯其意註其旁。遊畢仍由某親駛車返。至則入夜七時矣。此次在三藩市參觀各處。最有趣味者。則於最黑暗地發見光明監獄是也。於似光明地發見黑暗俱樂部是也。

二十二日收拾行李辭行。忙却一日。因明日雖三藩市也。此次到美。在美國可謂在酒禁森嚴之時。却無日不有酒飲。不過在中國酒席。係用茶壺盛酒耳。到各處參觀。主人多以禁酒事相詢。或談笑。亦足見美人之注意此事。聞中央雖禁酒。而地方則多放棄。聞某省長云。官可不飲。酒却不可不飲。近且甚多弛禁之論。女子本多主禁酒者。但某省女議員。竟多數主張弛禁云。但雖如此。禁酒之後。中等社會以下。獲效亦不淺云。

二十三日由三藩市赴沙加免度 Sacramento。中國人稱爲二埠者。卽加省省會也。先期由沙加免度黨部派三人到三藩市借往。三藩市亦派數人相送。離埠約半小時。卽有數十輛車來歡迎。到埠時已入夜。至旅館稍停。卽赴黨部及華僑各團體合開之歡迎會。會畢赴宴。同志及僑胞均表熱烈的歡迎。至可感也。宴後與同志談黨務。至夜三時始休。

二十四日是日本擬在沙加免度參觀一日。因北加斐 Bakersfield 黨部以電話來促云。中西官民已預備歡迎。非往不可。祇得匆匆分謁同志。至下午一時卽乘汽車前往。夜十時後始至。至則汽車數十輛預候。中有西人汽車十輛。市長及市立某校學生。本在歡迎之列。因夜深不果。警長亦親來。巡警列隊者數十。余等每到埠。均由當地官廳派警保護。然皆二三人而已。此其特例也。余及汝爲所乘之車。駕駛者。云係前市長之子。而此車則爲汽車公司所假之最新式者云。是夜歡迎巡行後赴宴。席中男女學生甚多。莊諧雜陳。頗極興致。因華僑有家屬者。以此地爲最多云。

二十五日上午參觀煤油井。此地出煤油最多。當至煤井時。一望無數高數十丈之木架。據云有百十萬云。此木架卽抽煤油之所。油礦深淺不同。油脈亦無定。礦源至淺者萬

零五百尺。深者有二萬餘尺。油盡見水。則此礦油已盡。有云水下仍有油。此則未經驗明云。至油脈則此地無者。每移少許卽有。每一木架。卽一抽油機。機至簡單。每四五架卽有一發動機。機亦簡單。一人管之卽足。此種煤井。美籍人卽能領得開採權。採後卽賣與煤油公司。公司以此油分析可有三十餘種用途云。故煤油大王。非親自採煤油也。煤油製成後。其運往外國者。由地中設管流諸港口。卽以煤油船裝之。三藩市海港。卽有一管口。其長可知。煤油在中國全部銷數未明。聞兩廣每年則爲數六千餘萬元。故當觀其用機抽油時。一上一下。不啻吾國人之膏血同時爲其抽去。念之至爲惶悚。歸途所經山路。有名曰華人路者。係紀念中國人開創之意。聞此埠爲華人開創之一。開鐵路時。曾壓死千餘人。故此埠西人對中國人感情甚佳云。午後赴黨部歡迎會。晚赴宴。中西共百人。西占六十。當地官紳均在座。席間由西人某代表全市市民致歡迎詞。夜二時半又乘車赴羅省。由北加斐至羅省。火車須越一山頂而過。有數千尺高。惜因連日小恙。不能起視。實覺可惜。

二十六日早乘火車至羅斯安極立斯 Los Angeles。簡稱爲羅省。有汽車數十輛歡迎。

黨部同志當地華僑均參加。此地黨部亦名羅省。到後開歡迎會。晚宴會。均甚熱烈。余以病未能赴。

二十七日上午赴威氏許家服藥。午後體覺略舒。乘汽車遊埠外各小埠。晚赴同志宴。二十八日乘汽車赴河邊鎮遊。先至橙園。此園實橙園之巨擘。運銷中國之橙。亦出自此園之公司。一望果實纍纍。可歷數小時汽車之路程。次至紅人學校。此校專教育紅人者。其意義有二。(一)將保存世界上人種之一類。(二)美國患人少。將紅人教而用之。較諸移民來者無危險性。校舍至寬。且甚堂皇雅麗。不但學生悉予住所。聞有并其家屬而亦予以住所者。其懷柔可謂至矣。校內有小學。有中學。學生數總在千人以上。一望而知為紅人者不過十之一。其人形體似與黃種人接近。一望而錯認為白人者。竟在十之二。聞主持招撫紅人者。故縱白人與交。以變其種。不久恐將悉為白人。於第一目的終當拋棄。學生尙活潑。且不少儀表秀麗者。適值午膳時間。未得主校事者詳詢一切。匆匆而去。亦一憾也。再行一小時許至鎮。覓一酒店午餐。餐室幾滿。在此居住者聞多為富人。坐定其女居停卽來招待。蓋知為中國人也。無何其男居停亦來招待。留宿留餐。

備極殷勤。餐後導游其酒店。據云此酒店係伊父遺其兄妹者。其父創此鎮。卽有二十八華人爲助。中有一人至忠誠。其父母有病。皆非此人進食不食。現此人雖回國。其酒店特築一樓紀念。故彼兄妹待中國人甚爲親切云。導遊一室云。曾爲羅斯福等總統所住。向來謝絕參觀者。其酒店有十餘室。藏物甚多。幾成一博物館。中有極貴之畫與氈。而有二三室則專藏中國物。據云伊親至中國購買來者。并云將再往中國多購。室中無日本物。詢何故。據云日本之文明來自中國。有中國之物。可以無須再有日本物矣。歸途經一山。係土酋舊駐處。山勢高厚。中有泉水。清冽可愛。復有一溫泉。已有人築浴室於其側。溫泉水勢亦不弱。其流尙能成澗。

二十九日與許威遊海傍飛機場及各小埠。海傍離埠約汽車一小時之程。埠人常遊焉。且如此類者有數處。暑天則海邊常有千數百男女作海水浴。此間設種種遊戲場。類賭者十之六七。中有一室。云爲華人街。專暴華人之短。至爲可惡。

三月一日應某影戲公司之約往參觀。影戲之發達。以美國爲最。美國之影戲以羅省爲中心。爲善爲惡。本有足觀。乃是日到該公司。該公司竟預備影香港風景。裝飾許多不

倫不類之華人。見之甚憤。不終覽而去。附近影戲場一市頗大。營業專靠各影戲公司。美國凡有一大工場大農場或大學校。即特建一市。以應其需求。甚普遍也。

二日參觀西商會。會中陳列美國之物產。其巨大出品區。并製爲模型。加以電影說明。如煤油池。木場。牧場。果園之類。會所甚大。分科辦事。室甚多。美國有一特點。則商會勢力甚大。外國來人到各處參觀者。以西商會介紹爲最便宜。嗣赴南加大學參觀。此校係教會所辦。學生有六千餘人。由校長維夫比引觀辦公各室。各科課堂。及學生會。每到一處。介紹主任者親爲說明。意至誠懇。至社會研究室。詢其美國社會近何趨向。答云趨重實用。出其圖表。則跳舞場影戲院。均已成爲研究問題。有美國國內人種一表。云爲今日美國教育上絕大之問題。至哲學室。其哲學主任云。美國非唯物論。乃係主唯心論云。至學生會。建築甚大。樓高數層。有餐館。賣物處等等。皆學生自經營。其校長與學生甚融洽。與學生言。且常雜諧語。至最上層時。適有女生十餘。乃彈琴唱歌。以表歡迎。并饜以水果餅食。至介紹部詢其學生畢業能如所學得職業者有幾成分。據司其事之學生云。此校可得七分。據校長云。全國統計只得三成有奇。是亦美國

教育上極大之問題也。此外男女學生，又各有一會所。參觀男學生會所時已晚。未能盡觀。

三日上午參觀省立卜技利大學。係勞斯安極立斯分校。美國近因入大學者多。原有大學不能盡收容。乃於各大埠設分校。第一第二學年。在分校肄業。第三年以上。始進本校。學生學校。均有便利。卜技利羅省分校此其一也。此校原係師範學校。故文科肄業可直至四年。其餘各科則二年而已。學生六千餘人。以習文科者爲多。文科之中習教育者。又占大半。而女子復居八成。因美國中小學教員多用女子也。據其學生會司介紹部者云。教育科畢業者在六成以上未得職業。據聞加省教員俸給較厚。月有百四十元。故他省人亦趨之。以此人多職少。美國中小學教員。多未婚之女子。一結婚則學校多不繼聘。以已結婚則有家累。多不能專責。亦勢所必然。此外女子多習商業。但聞畢業得職業與否。不在程度高下。而在貌之美惡。美國社會情形可見一斑。至美國大學學生普通計之。女多於男。而中等畢業升大學者。男女統計約六成云。到校由校長招待。談後派員導至圖書館。各課室。體育場。學生會參觀。當至英文室參觀時。前列三排半爲女生

。第四排爲男生。第五排則坐一黑種女生。初訝大學亦分種界。繼詢知坐席係隨學生自擇。然黑女終獨坐在後者。抑種界積久使然耶。而校舍不甚宏偉。據云今年須另建。下午參觀市內萬國公園之博物館。館係省立。中國物甚少。中有一架專貯中國人煙具。美國暴露中國人之短。隨處可見之。噫。

四日爲同志作書。晚在中國式之戲院觀電影。此院用中國宮殿式。費二百萬。甚壯麗。乃飾中國演戲人作招待。狀殊可哂。

五日。以連朝勞頓。故稍事休息。原定明日赴山姐古 San Diego 軍港。已擬當行李。因汝爲病而改期。日間遂空過。晚在黨部商榷黨事。

六日參觀市內某分科中學。初進門見一學生。獨坐觀書。見人至。乃爲傳達。適校長未至。由校員出招待。隨即導至一處。囑一學生導參觀。始知是校一切歸學生管理。惟其規程至與省憲抵觸時。校長得制止之。故一切委之學生。每至總路。即有一值日學生設座於此司監察。此校有鐵廠。機廠。木廠。印刷廠等等。且甚大。一切皆學生實習。全無工人。其化學室有天平六架。某生理室有顯微鏡十餘架。其設備。中國大學尚不如

。有一課堂。有色種人最多。據其教師云。中國人甚聰明。黑人悟性雖不如人。記性實不低下。是在啓發如何耳。聞去年加省中學化學論文。列第一者爲中國女生。中國人聰明之不讓人。可以一證。其體操則有兵操。美國不獨中學強迫軍事教育。大學第一第二年亦然。當參觀卜技利大學時。據其校長云。該大學第一第二年。有五分之一。爲軍事教育。聞學生對於此科多反對。而政府則力迫實行。其軍事教員係政府所派。於一定時期。政府復派員檢閱。覬國者於以知其微焉。參觀畢。校長出而招待。據云此校有學生二千七百人。年費四百八十萬元。學生書籍等費。均出自學校。此校在本市爲三等中學。在羅省內。政府設立之中學校有六十。私立者不與焉。美國教育費支出之多。與其學校之盛。聞之爲之咋舌。嗣參觀萬國公園內之物產館。凡羅省出品皆陳列。係國家所辦。晚觀影戲場。此戲場以影戲爲點染。實注重女子裸體跳舞以招來客。現在之裸體。尙有二三處用小巾遮蔽。聞前此且無之。政府屢干涉莫能禁。聞係政黨所包庇。裸體跳舞在美國戲院無不有之。不過此戲場特以爲主戲耳。未終場而行。嗣至跳舞場。欲跳舞者可於在場女子中任便選人。每銀一毫跳一週。似以五週爲起點。聞其款則跳舞之女子

與場主均分云。

七日乘汽車游某山。此山在羅斯安極立斯似甚著名。車行一小時有奇而至。至則山勢險惡。望之索然。乘輿而來。興盡而返。不果上山而歸。晚赴中國羅省學生會演講。演講之前後。男女學生奏琴甚歡。

八日游各小埠及海傍。復至海港。此港爲東亞郵船至美之終點。港甚大且良。有軍艦數艘泊焉。岸傍堆棉花木板無數。知爲美國出口品之大宗貨物。歸途參觀圖書館。此館係政府所辦。爲此地之最大圖書館。分類藏書。任人到閱或借閱。其借閱祇須取一借書證。取借書證至易。或電話簿有名。或有物業。或人擔保均可。有借書證者。每次可任借書五本。二星期爲期。期滿如再借此書。無人定借。即可繼續。實至便利。是日參觀已入夜。閱書人猶不少。足見美國人智識慾之一斑。

九日參觀一小學。係附屬盲學校者。初觀幼稚園。觀後卽行。嗣其教員來道歉。謂當參觀時。室中開火爐。窗未開。過熱實失衛生。請原諒。致此之故。因初升火爐時。閉窗取暖。原擬須臾卽開。乃因客到之故。熱心導觀。以致忘却。致有此失衛生之舉。其

小學教師之隨事不苟如此。殊足佩也。觀盲童拍球。見其不甚失手。蓋以耳不以目也。課盲童之課本字。用記號。且係凸者。據云盲童成績甚佳。盲者似多聰慧。因聞勞斯安極立斯之下技利大學分校。有西班牙一盲女子學文學。每試均第一。上堂聽講隨用凸字記明。參攷書則用人讀。已用凸字爲記。最奇者則游水亦第一云。據校員云。羅省所屬盲校。只此一所。故勞斯安極立斯所屬之盲童。悉收來此校讀書。數共十人。此十人政府用汽車載來校及還家。每日須二十五元。而堂中普通用費不在內。至於小學。則每區以學童數爲之設備。有此區欲入彼區學校。須得許可方准。有小埠學童不多。報之政府。政府或專派人來教。或用車每日來接入學校。要之十四歲以下之兒童。強迫讀書。不使一人失學也。嗣參觀手工中學。此校亦學生自爲管理。由學生導引參觀。校中鐵場。機場。木場。印刷場。設備均佳。造成汽車有十數輛。簾器亦列一門。四時間關係。課堂未參觀。參觀後校長出招待。爲言此校學生管理甚佳。并述校中組織種種。烹調室亦導入參觀。

十日擬遊愛崙觀海底船不果。因汝爲腹痛。在此多延一星期。



威 聖 遜 山 之 雲 氣

十一日早與汝爲翰譽及羅省黨部同志十餘人。乘汽車遊威爾遜 (Wilson) 山之天文台。此台爲一人捐資所辦。車行一小時有奇至山脚。山高六千尺。由山脚至山頂。途程三十里。買票入山脚門。門者曰。此路頗佳。余等以山雖高峻。得此一慰。心爲之安。執意進門之後。道路悉由原土所成。既鬆且窄。復極曲折。既已來之。則亦安之。祇有鼓勇前進。余與翰譽所乘之車。係一盧同志駕駛。車小而盧同志駛車復極速。不十分鐘。回望汝爲等所

乘之車。既不能見。但沿巉崖峭壁而過。下視漸不見地面。約行三分之一。以車力過用。車頭之水既沸。乃停車小息。併候汝爲等之車。約十餘分。車不見至。復不能下山尋覓。因山上只一路。不能並車而行。上山下山限定時候也。因復前行。路險有加。下視祇見雲海茫茫。不辨一切。又經三分之一路程。車頭中之水熱甚。乃再停十餘分鐘。始直駛至山頂。山頂有酒店。西人固常結伴來遊。是日來游之車。亦有四十左右。因候汝爲等之故。未及午餐。乃周遊山頂。但見松柏參天。積雪未融。半山之下。雲騰霧蒸。胸次爲之豁然。至一時四十分左右。汝爲等之車至。則因車較大。故遲到。至二時。天文台之外門開矣。至二時半。則天文台開門。二三百人魚貫入門。歷數曲折之長鐵梯。共憑台內之鐵欄杆而候。以爲大觀當在目前。稍定。卽有人喃喃而言。言後台內之中軸移動。約十分鐘。云告觀畢。爲之索然。此台之外。尙有一比較小之台。復有一高十餘丈之瞭望處。皆無從觀。始知星期五晚方爲開放期。本日爲星期日。不恰合也。乃至酒店就餐。店主人知余等係遠客。堅留宿。謂今晚卽非星期五。亦當爲遠客要求台內特別開放。余等興致既盡。婉辭謝之。至四時下山之候。余等仍乘車行。下視無際。車又

較速。頗有戒心。至半山而暮霧起。至山脚而霧瀾山上。是日之行。汝爲之女公子云爲「冒險旅行」。駛汝爲等車之胡同志云。「早知如此。再不敢駛我輩上山。」其情形可見一斑。是日在山頂。口占五言云。

「身在最高峯。洪濤萬壑松。風雲騰足下。四望擴心胸。」

晚在所住之旅館影戲院觀歐戰影片。此片演歐戰之各種戰爭均備。但注重空中戰爭。故十之六七。均演飛機在空中相戰。雲霧奔騰其下。每至關鍵處。爲之驚心動魄。豈日間之山險餘威。猶積腦中耶。因此片之演時。夾炮聲機聲以助威。故觀者益覺逼真。因憶在三藩市觀有聲片。演一黑人「孝」與「愛」衝突。每唱音節悲哀婉轉。聲影符合。觀者祇知爲演戲。不知爲影片。科學之進步。真可驚歎。

十二日今日爲 總理逝世三週紀念。在分部行禮演講。下午步行街市。計其店鋪最美者。爲衣服及化妝品。飲食館旅館戲院等次之。美國社會情狀思過半矣。自交通一項言之。火車汽車電車。橫衝直走於道路。羅省有一街。一星期計算。經過汽車共有七十餘萬輛。而最近報告。羅省死於汽車下者。平均日有二人。至屋內之交通。有人駛之升降

機。有自接之升降機。有自動之樓梯。意者代足之機愈發達。足之本來機能。殆將失效乎。

十三日原擬遊孟魯山。因明日他行。須料理行李。繕寫函件。故不果。

十四日早乘火車至山姐古。此地爲美國西方軍港。一九一五年萬國博覽會開於此。其遺址現爲公園。其建築則爲博物館等。天氣至佳。近年人口驟增。已有十四萬住民。到時除同志及僑胞二三百人歡迎外。當地市長及中學校長軍官學校校長等均親至車站。同車至黨部後。卽由學務委員中學校長導往參觀其中學。學生二千餘人。係高中學級。女生多於男生。詢其學生除校中功課外。好讀何書。據云。女生好讀愛情小說。男生好讀英雄小說。嗣參觀其大學。此大學亦係加省大學之預備校。學生有千人。文科則可直肄業四年至畢業。實科則在此肄業二年。再入卜技利本校二年。方能畢業。設備不甚完備。聞美術尙良云。因初到。未午餐。卽導往參觀二校。腹飢甚。草草而行。未得甚要。參觀學校歸來約四時。始午餐。餐畢赴歡迎會。會畢赴宴。至十一時有奇歸旅館。

十五日早由海軍提督派書記到旅館導往各處。先至海軍署。晤其提督。定參觀次序。

此處有軍用大飛機場。初擬往觀。因往返需時不果。祇參觀教練所二處。先至海軍陸戰教練所參觀。據云。此處原有訓練之兵員二千餘。正派二千餘人往中國更番。故現祇數十。所謂往中國更番者。卽更番各國去歲出兵至中國之兵也。聞之心至憤恨。到後。此數十人演操遊戲與閱。其制凡初中畢業者。皆可自由志願入伍。詢其入伍者是否愛國。據云出自遊歷目的者爲多。入伍三星期內。每日五小時操練。二小時上課。一小時電影。滿三星期派入艦學習。則月餉二十一元。食衣在外。經五星期。則派至各艦。往各處。而以中國及南非洲爲多。滿十三個月。則留否任人自由。時期取其短。期普及也。嗣參觀海軍教練所。入門見堆積服裝無數。兵士散坐其間。據云此六百餘人。明日卽須往中國者。海軍亦初中畢業生。可隨意入伍。訓練且不限時期。惟入伍之初。另住帳幕。習海軍生活。并不許與外人交通。經三星期後。月餉二十元。習學五星期。卽派在艦上服務。一年回教練所。就其所長。授以科學。學習二年餘。擇其優異者。送入海軍大學肄業。其餘仍回艦上服務四年。其服務期內。月餉可至八十五元。待遇較陸戰隊爲優。而年期亦長者。因海軍須有特別技能也。與此同等之海軍教練所。美國共有四處。其送

優異學生。每次百名。四所平均分配云。午赴西商會宴。市長等均到。并由市長及西人四五人致歡迎詞。頗融洽。宴後由陸軍學校校長來導引。參觀陸軍學校。此校係私人所辦。由政府派人主其事。教員派自政府。其學級由小學至中學。美國此種陸軍學校共有三百六十餘所。是校學生約五百人。最少者爲七歲。平均每一教員教授五人。其分班至小。有四五人一班者。至小學班宿舍之管理。則爲女子。舍內各貯玩具無數。到校後校長導至操場。引教員一一與握手。繼行閱兵禮。嗣參觀各處。歸途暢遊軍港。各處風景甚佳。其海尖一處。仍存西班牙舊壘。因加省前屬西班牙。羅省山姐古等均隸加省。亦係舊西班牙屬地。故山姐古尙存西班牙舊壘也。至山姐古無他出產。市場靠二萬軍人月所得餉百二十餘萬。在此消費而已。

曉赴譚家公所宴。因美洲譚談許謝四姓。因同係言字傍。聯爲一姓。是晚以同宗資格宴汝爲。余等爲陪宴。宴後至其公所。直燒爆竹至一時有奇之久。恍如國內迎春也者。華僑至美雖久。處處猶保存鄉習。會有歡迎者。打其鑼鼓。吹其簫笛。亦別鄉後之趣致也。然一夕與人談。謂此舊習。恐將漸滅。蓋老者漸少。來者甚難。祇有土生。耳染目

習。趨尙西風。甚有以語華語爲恥者。前此營中國酒館生意。頗獲利。因華僑每逢喜慶。均設筵宴客。今則土生者。改爲入跳舞場咖啡館。生意退矣。此則民族消長之機。不能以一部分事視之者。若不早謀補救。恐五十年後。華僑二字。將絕跡於美國。

十六早由山姐古乘汽車至墨西哥 Mexico 之「的關拿」埠。蓋美國禁酒後。此埠爲賭之集中。美國人視爲行樂地。每日常有二千餘人前往者。美墨交界。只限一木柵。到木柵。見同志及華僑來歡迎者數百人。市長及當地軍官。亦派員參加。一過木柵。則見道路凹凸。沙塵鬆動。人民衣冠不整。粗俗非常。木屋東歪西倒。牛馬皮毛。既長且亂。草木滿佈塵埃。葉亦變黃。入市西望。見一巨築。汽車滿佈。意爲市政廳。蓋美國市內宏麗之建築物。多爲市廳也。詢之。乃知爲賭館。到後。同志云市長候余等見。乃至市廳。有茅茨土階之風。市長室僅可容膝。數語而回。到歡迎會演說。副黨部以酒點相款。一時門外喧嘩。則百十墨國人爭索酒食。良久。而警察不情。用力始行驅散。歸途順遊其市外。則有角力場鬪雞場等等。市內稍整大之屋。非賭卽酒。非酒卽娼。噫。美墨隔一木柵。天固無厚薄於其間。而一一相形。竟若天淵。人治勝天乎。天助自助乎。

返觀國內租界與非租界之別。悚然久之。十二時返至山姐古。午膳之後。由山姐古至墨國之米市卡利 Mexicali。此地乃墨國下加羅省省會也。所以折回山姐古而往者。路良也。汽車中過一段高山。而山復盡石。草木不生。亦僅見者。至美墨交界處。亦一木柵。人物差別。一如「的關拿」。惟此路較寬。新築有好馬路數條耳。時同志及華僑在界歡迎者。比他處有加。赴黨部宴。宴後在黨部談話。至十二時有奇而散。

十七早赴中華會館之歡迎會。午赴黨部歡迎會。均極踴躍。晚赴宴。此地亦以賭館娼寮爲多。賭者甚豪。攜子帶妻前往者甚衆。賭館附酒食處。賭後飲食。飲食後復賭。此輩固大得其所者。娼寮每間均有妓女百餘人。與賭館連帶生關係。亦美國人之行樂地也。其賭館有一間月餉六萬元者。妓則每人月捐二十五元。賭嫖之豪。可以此推之。此埠爲華僑所開闢。前有華僑萬人。今祇四千餘。而此四千餘華僑。有妻室者不過數十。直百分之一。且新闢之街。限制華人居住營業。華人營業於此地。每十人須請一半墨國人作工。日本人營業。則無此例。華僑處此政治經濟壓迫之下。愛國甚爲誠摯。對國事亦甚熱心。而本黨黨部在墨國。尤足佩者。則食煙賭博者。不許入黨。入黨者不得加入其

他有政治意味之團體。故墨國黨員之純潔。全黨恐難多覓。現任此地之總督。前嘗爲華人作工。前任總統。現又運動爲總統之某氏。其妹嫁本黨黨員。故對本黨甚庇護。某氏斷一臂。亦屠狗之流。此次爭總統。已殺其政敵十餘將軍。至墨國將軍。車載斗量。亦爛羊頭關內侯。新奧之國。所不免乎。至其人民甚惰。有隔宿之糧。則不作工云。晚八時乘火車回羅省。

十八早由米市下利到羅斯安極立斯。日間結束各事。夜九時上滿州船。往紐約 *New York*。

在北美停留月餘。人間有何意見。余答以美國西方教育發達至可羨。物質進化至可驚。然社會一切爲物質所壓。則至可慮。若墨國所到之地。則娼賭酒鬪四字。可以盡之。十九早船發羅斯安極立斯。由太平洋南行。今且記船中之事。此船原行太平洋至中國者。其船費較乘來三藩市之大洋丸爲貴。噸數二萬六千。又較大洋丸爲多。且購票時云此一等一之房位。意當甚爲寬展。孰知此船既老。房位又劣。方一開船。風平浪靜。而船已震動不已。飲食復極惡劣。而乘客近千人。幾無餘地。詢其客多。何不多造新船。

據云。此線能否獲利。實一問題。因內地交通愈便。則船運將日減也。美國近來鐵路日趨於虧本。因道路良好。汽車日多也。此則於吾國交通建設極堪注意者。以後除數幹路等鐵道外。餘可築公路。以行汽車。費省而便。兩得其利。此船不分等級。只有頭等。似甚平等。實則中分十餘等級。余等住房。一。一等。船費爲三百六十元。然仍有六百元一千元之房。美國火車。亦暗中分數級。余以爲美國政治亦如此。表面似平等。暗中實多等級也。

七時有奇。船甫開行。船員卽紛紛搬酒出倉。飲客滿座以待。美國禁酒。有名無實。甚至西方有一省。竟公然有酒店。有娼寮。全與其中央政府禁酒禁娼之法令抵觸。近來正爭總統選舉。以禁酒問題。作爲選舉之重大主張。茲附最近兩黨對於禁酒之主張。亦足見此問題。關係美國政治之大。

美國選舉總統聲中之禁酒問題。十五日美京電。今年美國選舉總統。禁酒問題。已成一種令人最注意之事件。民政共和兩大政黨。對於此項問題之政見。雖未明白表示。惟各黨之總統候選員。迫於「溼派」與「乾派」之徵詢。不能不將其對於禁酒之態度。略

爲表白。茲將各候選員所發表之意見略記如下。

民政黨各候選員之意見。紐約省長士蔑氏。略謂組織團體。反對任何法律。成憲法之一部份。乃人民根本上權利之一種。余曾舉行宣誓禮。充任省會議員縣政府執行吏。四任省長。均聲明保持本省憲法。憲法中有爲余所憎惡者。但余應允維持之。故須履行。惟余對於所憎惡者。有反對之權利。余未嘗應允放棄此權利。禁酒律所言。能令人致醉之飲料。其界說殊非正直。且亦不合常識也。

省長列治氏云。禁酒律必須修改。否則必須實行。余深信該律必不能實行。吾黨對於禁酒之運動。當視其爲中央集權。侵略省政府權利之一種。現在最要之問題。卽是中央所定之法律。係關於私人之行爲。而未得大多數人民之許可。或尊重者。則應否存在。最宜注意。余視此爲不能容忍之情形。當卽設法修正之。上議員列德氏云。一切法律。非由大多數人民自願實行與遵守者。則不能實行。禁酒律實令平民視法律爲壓迫之劍。非爲護衛之盾。如果人民視法律爲無益。而須廢除之。則應依照憲法所規定之辦法。而實行廢除之。上議員佐治云。余信禁酒一事。關係甚大。故贊成嚴厲實行禁酒律。

共和黨各候選員之意見。商務部長賀華氏云。余不贊成廢除禁酒律。余且贊成切實施行。無論何人被選爲總統。其宣誓就職。必須如是進行。我國現在禁酒一事。乃旅行社會上經濟上之大試驗。其用意高尚。效果遠大。必須從建設上設想而施行之。盧登氏云。固烈芝 Coolidge 總統致國會之教書。所言禁酒一事。與余同意。余甚贊助其主張。上議員委利士氏云。人民有權鼓吹廢除禁酒律。惟余主張實行禁酒。並不主張各省自行訂立律例。以弛酒禁。上議員葛地士云。余贊成實行一切法律。反對廢除禁酒律。

二十日舟行安適。午餐以後。見遊戲處積滿乘客。向前望。乃有人設種種賭具。在此博勝負。乘一等位郵船而有此。實爲創見。

計由羅新安極立斯至巴拿馬 Panama。第一泊須七日。故連日航行。無可記者。

十九日由羅新安極立斯乘滿州船南行。深幸風平浪靜。寢食俱安。時坐船面。碧海無際。長空一色。每見水族游泳。海鳥飛翔。點染其間而已。此次船客雖多。黃色人種惟余與汝爲天固翰譽一行四人。其中以猶太人爲多。頗爲人側目。而猶太人驕矜自若也。因美國不但金融爲所操縱。近因政治與著作。亦爲所操縱。長袖善舞。多財善賈。美國

人固無如之何。而非一等一之客。常表示輕一等等一之客。而一等等一之客。又常以此驕非一等等一之客。美國此種區視觀念。恐不能小視之耳。至於日間之遊水。夜間之跳舞。男女雜沓。似頗暢快。惟面孔色黃之四人。從未參加。彼等於余等。却尙有禮。點頭道好。無間男女。船中女多於男。老者復不少。足見東西遊興。各有不同也。

二十七日午船抵巴拿馬南岸之巴魯播。山水明媚。至爲可愛。船將泊岸。早望見無數國人。持青天白日滿地紅國旗鵠立相送。船到上岸。與相送之同志同胞數百人一一見禮。海關并特許汽車二輛入碼頭來接。余等乃乘汽車而至巴拿馬國都。歡迎隨行汽車以數十計。

此次遊巴拿馬與巴拿馬運河。欲使明其區域。當先述其歷史。巴拿馬原爲哥倫比亞國 *Colombia* 之屬地。法國曾以四千二百八十九萬有奇之金圓購其地權。以爲開濬巴拿馬運河之用。開濬有年。用去三千六百三十八萬之工程費。卒以黃熱病及工程不甚妥適之故。未能成功。美國垂涎之。與哥倫比亞商。擬永遠租借運河應用土地。哥倫比亞雖無反對之表示。却因法國之約在前。未卽允許。美總統羅斯福。卽宣言將鑿通在尼加拉瓜

Nicaragua 南境之湖。另開運河。不數日巴拿馬以數百人宣告獨立。此一千九百零七年八月一日事也。越三日美國承認其巴拿馬國家。并阻哥倫比亞征伐之軍登陸。次年一月四日。美國即正式與巴拿馬政府訂巴拿馬運河之約。河旁左右五英里及巴拿馬灣中島嶼。讓與美國。美國同時付予二十萬元。每年付予二百五十萬元。當時羅斯福在國會演說云。「我得巴拿馬矣。」此中情形。不言可喻。而巴拿馬國與巴拿馬運河之情形。亦可明瞭。乃以次敘其所見。

上岸之地爲巴魯播。屬於運河範圍內。美之屬地也。其地則以尋得太平洋沿岸之巴魯播爲名。車行數英里至美巴交界處。祇地上以白灰畫痕爲界。入巴界道路與美界一律。惟住屋無美界良好耳。其街市雖窄。尙覺整齊。隨處并有小花園點綴其間。無何至黨部。歡敘片時。因巴拿馬外交總長欲相晤。乃至其外交部。其總長首告以華僑性質甚良。次告以限制移民條例正通過國會二讀會。此條例日人及印度人得例外。中國人每年限十人至巴拿馬。據聞此條例。每國會開會。總有提議。議員受賄後。又可變易。吾僑以此耗款不少。實至痛心。故吾僑日望國強。至爲懇切也。查華僑在巴拿馬運河之美界不能

住。祇可住巴國國境。人數約四千餘。有家者不及十分一。聞巴境現尙可由華迎婦來住云。嗣經其總統府門外。有守兵三四人。并經其部署二三處。大都房屋甚小。有樓尙整好。次遊法國紀念碑。碑高數十丈。蓋紀念法國前此之開濬運河者。游巴魯播紀念銅像。此像成立不久。開幕時太平洋沿岸各國均有代表。所以紀念其發見太平洋沿岸功也。

遊巴拿馬運河水閘。至其管理處。有一水閘小模型。以二人司之。凡船之來往。悉聽其指揮。以一黑人司無線電機。則專司與各船交通者。至水閘之啓閉。水之高低。鐵索之升降。用電拖船軍之行止。管理人止扭其小模之機。地下機器卽行發動。一一如其所定。舉重若輕。無過此者。該管理員復詳爲說明。臨行并贈運用各機鍵之書。歸途遊軍港及軍營。蓋美國防守運河之兵也。只陸軍一項。沿河共有二萬五千。海軍飛機。應有盡有。到美國各地。除其軍營外。不見有兵。惟至巴拿馬運河。則到處皆見美國兵士。飛機復時演習。其保護運河軍事費。去年計算。開爲一萬一千三百萬元。美國對此河之注意。卽此可見一斑。固知其軍事重於商務也。意仍未足。聞又將實現尼加拉瓜濶之運河云。

巴拿馬人口僅三十五萬。其地長四百八十英哩。闊則一百一十英哩。至三十五英哩。其總方里不過三千一百而已。國分七省。省以下爲市。官吏皆民選。總統及國會四年一任。有警察。無海陸軍。財政所入。除每年美國因運河所交之二百五十萬元外。卽爲入巴拿馬國之貨。運河稅關。收值百徵二十五之稅。以十歸美。以十五歸巴。衛生則完全由美管理。甚良好。人民識字不及二成。聞最近教育頗見發達。有男師範。女師範。男中學。女中學。大學則尙未有。國家醫院。國家戲院。外觀有耀。堂堂中國。並此而無。爲之一歎。惟開政以賄成。卽與美洲全洲一致耳。


是日遊至入夜始回旅館。卽赴宴。宴後赴歡迎大會。各團體僑胞。與本黨同志。濟濟一堂。幾無容足地。至夜午十二時會畢歸船。次早七時船開。同志復來送行。科倫 Carlin 同志且同前往。是日早七時由巴拿馬南口巴魯播開行。下午三時有奇抵北口科倫。今且記巴拿馬運河。

巴拿馬運河初爲法國經營。其失敗原因。(一)因多毒蚊。人爲螫者多發病。死者無數。有一醫院醫員職員病者共三千餘名。未死者祇醫員一。看護一。中國人作工者死亦不

少。同船一美人云。當時有一班中國人。共四百餘。死去將近四百。所餘三十餘人。以無生理。卒亦自殺。可云至痛。然華僑則未有言此事者。(一)因工程失敗。初誤太平大西兩洋。洋面相差甚多。施工因而錯誤。且所用挖泥之機。奏效不良。復欲摧山填海。工程浩大。卒之結果不能如預算所期。美國繼之。首謀除蚊。用黑人至山阪水涯。注藥除蚊。蚊蟲卒得除去。黑人死者亦不少。故現時運河工人有用黑人之例云。至此河工程之妙。(一)因山爲河。巴拿馬係土股。高出海面。若欲鑿至溝通兩洋。不特工程太大。且河岸過高。亦易犯崩潰。今不鑿山就洋。乃因山爲河。就山之凹處。疏爲河道。填山之凸處。則現成爲岸。中經一大山。鑿而通流。全河以成。此河高出洋面約九十餘英尺。端賴水閘保其河流。(二)蓄水灌流。此河已因山而成。其缺在水。乃於北岸加東地方。築一隄堰。截合凱爾河之水灌注河道。故此河之水爲淡水。絕非海水。欲使此河無涸竭之虞。除因山爲河外。復因山爲湖。以蓄水力。其湖之大。有面積一百六十四平方英里。深四十五尺至八十五尺。以故河中常一望汪洋。

因於以上二者發生水閘之妙用。河已因山而成。高出海面約九十餘尺。船將如何土又

將如何下。復不使河水洩去。而水閘之妙用以著。此河南口水閘三度。北口水閘亦三度。南口之水閘分爲二處。北口水閘則爲一處。其閘每度有門二重。用鐵所製。厚可七尺。閉時門之上端成爲道路。水閘每度長一千尺。闊三百尺。水閘之底有孔可進水。有孔可洩水。水閘之側有地道。則安置機器。地面則有拖船之電車。因船近閘用電船拖者。防其撞傷水閘也。水閘左右復行蓄水。其布置大略如此。其運用則船進口時。船之兩旁預將鐵索繫於左右岸之拖船電車。車之多少。因船之大小不同而定。



河 運 馬 拿 巴

曾見他船左右各三電車。余所乘之船則四電車。因其大也。其時船在水閘之外。管理人在其管理室內舉手輕扭其桌上小模之機。將第一閘之水洩去。使其與大洋成爲平線。則扭其機。沉其欄河鐵鍊於河底。同時並扭其機。將第一水閘之二門齊開。兩扇貼壁。則乃由電車拖進第一度水閘。管理人復扭小模之機。先閉第一度水閘之二門。使洋水不能沖入。後乃開進水機。水閘底之水由孔湧出。船隨水浮。約加高三十尺。與第二度水閘之水成平線。乃如上法開第二度水閘門。船乃由電車拖進第二度水閘矣。其進第三度水閘亦如此。每次遞高約三十尺。經三次船行高出洋面九十尺而進河矣。船出口也。則反之。船在運河原高出洋面約九十餘尺。初由第三度水閘進水。至與河面成平線時。乃開門。使其進第三水閘。船進後。先將第三水閘門關閉。免至河內之水沖至水閘內。乃將第三水閘之水洩去三十尺。使與第二閘成水平線時。船隨水下。乃開第二度水閘。船進第二度水閘矣。第二度水閘復將門關閉。將第二度水閘之水洩與第一度水閘成平線時。乃開第一度水閘門。船進第一度水閘矣。船出洋也。則將第一水閘之水洩至與大洋之水成平線。而船出矣。質言之。則水閘內之水進退自如。欲船進河也。則船在閘內時。將

水進高。使其與欲進之前一閘成平線。則船平行而進。以達於河。其欲船出洋也。則船在閘內時將水洩低。使其與欲出之前一閘成平線。則船平行而出以抵於洋而已。水閘之作用明。運河之妙思過半矣。至於防水閘之毀壞。另備一大鐵機在岸側。將此機用機塞於水閘。下其鐵板。則水不致潰出。蓋以運河內之水潰完時。須二年有奇。始能再蓄成此水量也。水閘南口有二。北口有二。船可進出自如。同進同出。或一出一進。均無不可。

此河三大工程。水閘其一。其餘二者。則隄堰與加爾布拉 *Orledera Guf* 港是也。

隄堰在北口之左。長一哩有奇。其基址闊半英里。用土敏土而成。堅固異常。其基已闊。故雖高出海面百餘尺。仍不至削立。此隄堰雖以截合凱爾河之水爲主。然恐雨水過多。氾濫爲患。乃於一低平之石山築一瀉水處。水從石牀而出。既不致蝕及河道。且用此水以發電力。爲河中一切電氣之用。斯真一舉而二得者。加爾布拉港在近南口水閘之一段河道。此河道原一高山。其長九英里。深至有四百九十尺者。有一工程師竭其全力專事此港。港成而逝。其難可知。似此高山。不盡石質。復有鬆土。開濬一深。傾圮堪

虞。故盡人力所至。鑿成斜形。其濬出之土。半爲河旁填鐵路土基。半爲河外作陸。至其工程之勝於法國。聞法國係用挖機。美國係用鏟機云。此河由兩岸深水處。計長五十英里。專就河計。長四十二英里。其河底闊處有一千呎。窄處有三百呎。掘河全部工程爲二萬三千四百萬立方碼。法國前費去之七千八百一十四萬立方碼工程。能用者祇三分之一云。其工程費總數一時未詳。但其發出三厘息之巴拿馬運河工程公債。年利須八百二十五萬元。其額之巨可想而知。河成之後。爲商務而設之費亦二萬七千五百萬元。目前此河每年總收入有四千萬元。祇船舶所納費亦二千四百萬元。現所乘之滿州船航行。此次納費爲二萬二千五百元。至其每年全河之維持費。共需二千四百萬元。其數正與船舶所納費等。然獲利亦每年千餘萬元矣。

是早船入二水閘後。見一小湖。再進一水閘。則爲加爾布拉港。河道較窄。但兩旁各有小河二三。港盡又見一小湖。河道曲屈。山峯葱綠可愛。而山腹則已成河道矣。再行則見大島小島雜峙湖中。盡山頂也。其大湖則較低之山所成。故有一處猶見無數枯樹浸在湖中。及望見加東堤堰而出水閘則至科倫矣。此次巴拿馬運河之遊。不特巨大之工程

可驚。卽山明水秀亦至可愛也。未到科倫。同志數人。囑余等證明係同行者。余等深爲詫異。始知運河一帶禁人徒步來往。祇可乘火車及乘船。而乘船又不如乘車之便。因出入尙須證明云。

船抵科倫。岸上同志來迎。因輪止停十餘分鐘。不能入科倫。祇在碼頭與同志見禮後撮一影而已。而同志殷殷不舍之情。實感五中。回憶墨西哥總支部疊電約往。因船期已定。不能前去。至今猶引爲憾事也。

三十一日到古巴原定由原船赴紐約。乃船入港。古巴同志及華僑。以電船來歡迎者共有八艘。人數有數百。鼓樂喧天而來。海關人員。代表古巴政府表示歡迎。余與汝爲天固翰譽等。乃乘總支部之電船上岸。岸上歡迎之中西人士。人山人海。揚巾揭帽。歡呼踴躍。余等從人叢中上車而至黨部。隨行汽車。總在百輛以上。沿途萬頭攢動。大有一見爲快之意。當時同志堅留。并謂已定一星期之歡迎程序。若由原船而行。事實萬不可能。再四辭謝。不得。祇得將行李運到旅館。余等乃乘車游郊外。路政至佳。中間爲行人路。兩旁爲花園。花紅草綠。殊快心目。花園兩旁爲行車路。聞現又向美國借若干千

萬。增辦路政。不久可全國一致通車。遊一俱樂部。現任總統。亦其會員之一。背臨大海。築大浴場。聞風定時。男女就浴者。每數百人。是日因風緊。則人殊寥寥。其建築物至堂皇冠冕。設備亦頗雅麗。時將入夜。各人正準備跳舞。跳舞廳可容千百人也。道經一建築物頗大。聞係美國人所設之賭場。古巴除彩票外。他賭皆禁。惟美國人則特在此承賭。冬春盛賭。夏秋則停云。

四月一日上午拜訪參加歡迎各團體。下午二時赴黨部歡迎會。至五時而散。晚六時應中華會館之宴。八時黨部開跳舞歡迎會。中西男女來者以數百計。肩摩踵接。幾無容足地。跳舞亦祇能在所立地迴旋而已。樂用西班牙。惜非知音。莫能鑒賞。少坐以人過多。先退。乘車遊郊外。蓋城中道路遠不如郊外。是日適星期。晚遊者甚衆。隨處有花園及酒水店。開夜市。以應遊客。月色如銀。綠茵鋪地。亦別饒風致。聞黨部之跳舞會。則直至夜深二時始散云。

二日上午乘車遊城市。是城名亞灣拿 Havana。即古巴之都城也。港口甚窄。入港後。水復汪洋。有如大湖。海岸建築甚佳。岸旁沿途所見。有一紀念美國船之石船花園。



圖 城 拿 哥 亞

聞美國與西班牙戰爭。係借口其船在古巴灣爲人所炸。當交涉起時。西班牙求將船起水驗看。若炸由外發。則西班牙全負其責。若炸由內發。則不負責。美國不許。卽開戰。戰勝後在古巴之西美權力。於焉消長。數年後美國將所炸之船拖沉外海。而建此紀念物以爲紀念。開當時船上被炸死者。無一軍官。祇有水兵百餘。國際上之滑稽。往往如是。次經一黑人騎馬銅像。聞古巴獨立時。此黑人率其五千同種。抗拒西班牙數萬大兵。賴此苦力支持。獨立始告勝利。此黑將軍

卒死於戰。黑人在古巴能在政治上與白人平等。實因此人云。現任農工部長即爲黑人。但事實上白人終歧視之。平常不與接言。每公宴。此黑部長亦從未一到。種界之難混。有如是者。再經一舊城址。現已爲駐兵之所。古巴名雖獨立。實則美之保護國。美艦常有數艘泊其海港。其東南之軍港。則直爲美國軍港耳。故古巴祇有陸軍一師。三等艦二三艘。爲軍備上之點綴而已。其所用鎗至雜。聞有廣東石井兵工廠所出之鎗云。此鎗何自來。意者美國得自吾國上海。轉給古巴。至得自上海之原因。則不忍言矣。城市馬路不寬。市內有公園。然不如市外之隨路皆有。古巴商務初握於西班牙。今則美國取而代之矣。英法亦駸駸日上。吾國商務在此尙能佔一席。古巴人甚懶。其執業多者爲刷靴。次者剪髮。貧苦至不堪。其人不事蓄積。家有隔夜之糧。卽不願作工。在墨西哥時。聞墨國人亦相同。午後在黨部開談話會。晚赴人和會館宴。人和會館者客人之團體也。席間有一中國人。土生者。係現任古巴國會議員。月薪六百元。額外所入。聞有數倍。故古巴稍有聰明能力者。卽相率入政界。無復爲農工商。其教育費約占收入六分之一。有大學一。中學則每省皆有云。另有趙元多者。土生而長於西班牙文。曾著中國人開關

古巴及贊助古巴革命一書。據云古巴初開關時。華人來者。共二十餘萬。皆犴仔客也。香港約五萬。廈門約五萬。餘均來自澳門。此二十餘萬之同胞。其價值若何。則每人祇一百七十元而已。此二十餘萬人。得生還者。不過八千。現仍生存在此地者有數百。餘皆作異域之鬼矣。痛何如哉。至關於民族之消長。尤不忍言。至現在之華僑。則皆後來者。計全古巴八萬有奇。近來又有移民條例。以爲限制。并有人提議每用工十人。須古巴七人。若此則華僑尙有立足之餘地耶。西班牙初開關古巴。除用華人力。則招黑人。因瘴大。惟華人及黑人。較能耐也。而西班牙人至者。實不多。故今之古巴。不啻華人骨血所填成者。華人來者。全男子。黑人則間有女子。故當時華人稍有生育。亦與黑女配偶而生。至古巴三次獨立。華人均參與其事。死者不少。有趙某者。八十五矣。因革命之功。現食古巴之長糧。趙君復出所著書索題。余題之云。

異國錦河山。吾僑慘膏血。述之告世人。未語先嗚咽。

三日赴古巴大學參觀。至則門首掛各國旗。正假此校。開移民會議。各國代表均至。惟中國無預焉。校甚堂皇。建築亦莊嚴。惜是星期。爲紀念耶穌過。校中停課。祇觀其

外表而已。

此校一星期前。在罷課中。其罷課原因。係因現任總統。使國會通過延長其任期二年之案。學生起而反對。政府加以壓力。學生竟多絕食者。當局不得已。始云此案將交國民會議表決。然聞此亦表面事耳。現在總統。固依美國之力。儼然古巴之帝王。一切爲所欲爲矣。

美國借門羅主義之名。以南美中美爲附屬品。最近南美中美。欲圖對付。開一聯合會議。其地點在古巴。古巴固甘心附美者。乃請美國出席。美總統親臨古巴開會。以外交部長爲國際委員長。第一日開會。美總統演說大旨。美國對於南美中美。視同一家。無財者可假以財。有亂者可助以兵。需工程人力財力者樂於供給。各國代表嘿然。對付美國之謀以破。無結果而散。當會之開。各代表皆住余現住之旅館。會議後。此旅館改名爲大使旅館。卽前一月之事也。美國對於南美中美之近情。由此可知。古巴之對美國近情。亦於此可知。故現時美國固力助其現任總統。不特下次選舉。無人可與競。恐有終身總統之望云。

次參觀其中學。亦因停課。不得入內。

再次參觀孤兒院。此院共有孤兒八百人。每人平均月須三十元供給。自初生收入。至二十歲始許其出外獨立營生。其收入孤兒之方法。在一房。將傍路之壁。鑿一大孔。孔置一圓篋。中有軸。篋之一面露出路邊。一面通於院之室內。路中有將兒置入篋內者。機動鈴響。室中人將篋移動。即可取兒。與送兒者不可見面。防其害羞。房中候兒之人。只在夜。不在日。因日中無人送兒也。聞此項孤兒。以私生者爲多。已入之後。是兒卽爲公有。至入學年齡。幼稚初小由院自教。高小中學則送入公立學校。但管理似不甚良。衣服亦不潔淨。而用意則至可取也。晚赴黨部執監之讌。

四日午赴安定堂茶會。此堂係梁胡伍程四姓組織。因歡迎天固之故也。二時赴民聲報歡迎。晚赴支分部黨員之讌。

是日古巴大學校長。函約後星期一。歡迎前往參觀。因行期已定。莫能踐約。

五日起吳氏茶會。則因吳禮卿曾云同行。故有是舉。家族觀念之重。可見一斑。是日乘車遊附近小埠。道經各公使館。地幽室雅。一望宜人。至小埠。則風景蕭條。人民憔悴。

悴。城鄉所隔。不過一小時車程。而榮枯判若天淵。誠可慮也。村人亦甚嗜賭。入一小店。不過四人。卽有二人據案鬪牌。

六日早乘船渡海。約數分鐘抵岸坐電車至馬丹沙 *Matanzas* 道路凸凹不平。店鋪無一整齊。惟電車站見三四老少。強人買彩票。與七八小兒索錢而已。初擬乘汽車往。無怪各人咸見阻也。坐電車赴馬丹沙。計二小時有奇。途中荆榛遍地。無人耕種。旣無村莊。卽見一二住居。亦板木撐支。茅草蓋頂。中經一大建築物。則爲糖廠。美人所經營者。古巴特產。惟烟與糖。從前全在西班牙人手。今則移轉於美人。其出糖加以限制。因恐過多價賤也。據報告。去年古巴銷中國之糖。價值九百餘萬元。居銷數第三位。然詢之僑民。則云不知由何處銷去。依時價計算。則古巴之糖。實不能運銷中國云。十時至馬丹沙。馬丹沙爲古巴一省會。居古巴第三位之省。由都城至一省會。途中無一村落。古巴之草萊可知已。都城附近無大山。此行途中只見小丘。故水源甚缺乏。山中亦無種植。惟時見卑蔴樹。此樹似椰亦似檳榔。古巴獨立被圍絕食時。賴食其子得勝。故禁人剪伐。違者罰五元。因之隨處皆有是樹。

到馬丹沙。由同志乘車導遊市上。登一小山。一廟在焉。其建築不過九十餘年。古巴人視作古物。津津樂道。古巴全國約一百三十萬人。馬丹沙則四萬餘人。已爲繁盛省份矣。午餐後游石岩。此行實爲石岩而來。岩離馬丹沙不過二十餘分鐘。初發見者爲華人。一日種菜其地。落其刀於穴。聞墜聲甚深。告知當局。因而發見。此人因得食長糧。此岩現歸國有。閱余等至。准免票入觀。表示歡迎。數十同志同往。入鐵欄後。向地道行。深可八十餘碼。入後。岩闊處可數十碼。石筍由上下垂。長者有二丈餘。由下向上者。亦將及丈。其形至多。似牙。似筍。似翅。似柱。似花。千奇百怪。路有電燈。至深處時。導者熄電燈。另開探射燈。導余等入峽道。兩旁寬窄不一。高低亦復參差。有時須俯首方能通過。計長共一英里。其石晶瑩發光。石形粗細不等。石尖時有水滴下。有二三處地下。復有水積。其水帶鹹。至盡頭處。有一穴。云有一人。入之不見出。望之有水。通至何處。現仍未探得。斯誠天然奇觀之一也。然入內氣頗悶。汗流浹背。出岩後氣息仍促。觀後赴黨部歡迎會。會畢而回亞灣拿。已入夜八時餘矣。

七日。是日整日均爲昭倫堂歡迎。昭倫堂固譚談許謝四姓之合族堂。懸慧生組庵汝爲

三人之像。想慧生組庵在國內。夢想所不及者。是日放爆竹。打鑼鼓。茶會。宴會。演說。入夜更有演劇。凡祖國之習俗。應有盡有。一笑。

此次遊歷。計至古巴。共經五國。所過之地。同志及同胞。極盡歡迎。漸感交加。每至一處。未來籌備。已來迎送。勞人傷財。心更不安。惟處處均見青天白日之國旗。復得與同志及同胞把晤。斯可慰者。至外人之觀感。則甚良好。初乘大洋丸。至三藩市。經檀香山。歡迎者填塞岸上。同船者頓然起敬。謂吾國人團結至此。至三藩市。歡迎有加。同船之客。爭來握手。及羅省乘滿州船至此。船中祇有黃面皮者四人。因知各人歷史。均有相當敬禮。但詛中國。詛民黨者。尙有人。及經巴拿馬。見無數人歡迎。詢知全非私情。乃訝曰。中國其興乎。民黨其興乎。論調爲之一變。及抵古巴。見以電船來迎者已數百人。岸上更人山人海。歡呼者有人。失色者有人。其時船上乘客船員。口有言言吾人。手有指指吾人。知其觀念之變更。固不淺也。然如此勞神勞費。終覺不安。以後所經各處。當力求避免矣。

亞灣拿自號小巴黎。郊外市政尙不惡。而彼所斤斤者尤在女子裝束之入時。殊可笑也。

。因是週爲紀念耶穌週。政府當局約下星期會晤。然余等行矣。

八日。赴亞占美沙 Artemisa 黨部歡迎會。同志同胞極爲殷殷。當晚卽回。

四月九日早十時。由古亞灣渡佛魯里達海峽 Florida 至美國基維司 Key West。船小而輕。渡大洋。值風浪。顛播異常。尙幸只有六小時。卽已抵岸。雖未至吐。頭暈實甚。至華盛頓之車。須六時始開。乃乘汽車週遊全埠。道路坦平。房屋齊整。惟有一事足記者。則車行時。車夫出一夾單。上列暗號。據云係酒單。無論何酒。均可以暗號購買。路見一人。攜一匣。因告余等曰。此卽酒也。美國人民素以守法稱。禁酒後。犯禁酒令。視作恆事。有識者爲抱隱憂。


下午六時開車。火車中甚舒適。一房坐二人。上下有二床。每床可容二人之寬。另有梳化床。一房中電扇廁所熱氣管洗面處均備。浴室則爲公有。因昨日赴亞占美沙乘坐汽車。路途過壞。被播不寧。歸來又赴黨部之宴。至午夜始息。是日又爲船播。故車開卽寢。是夜沿途情形如何。莫能觀矣。

十日自早至晚坐車。覽沿途風景。此車由南沿海岸北行。一路除數城鎮外。無甚整齊之村落。地多未闢。惟時見松林。并有刮松皮。以器盛取松膠而已。美國近來人民趨於城市。以致農地乏人耕種。實爲目前之大問題。且人就逸樂。故西方天氣佳。則日形發達。而南方尙形榛莽也。

十一早四時有奇。抵華盛頓。其經佛魯里達。吉俄爾給亞。南喀爾勒那。勿爾吉尼阿各省。由熱帶至此。頗覺寒冷。是日因天雨。且舟車疲勞。除坐汽車週遊全市一週外。即在旅館休息。退而思之。覺華盛頓雖舊城。然全市規劃。至爲整齊。觀其以國會議事堂。爲全市中心。分東北東南西北西南四區。以區分道路。均井井有條。每路交叉處。成三角或圓形。以爲公園。中置銅像。全城奇卉奪目。殊覺宜人。公園散布於各區。故華盛頓無特大之公園。如此有一注意者。則吾國市政新着手。除舊市改良外。新市務宜先行全部計劃。採取最新式之圖案。因科學日發達。則一切市政。亦宜因之隨時制宜也。舉例言之。交通一項。前爲火車電車。今除幹路仍賴火車外。其餘已以汽車司其權。故火車公司。今有虧本者。市內之電車。今亦代以汽車矣。目前車庫。已成爲一大問題。

。將來或更進而需要放飛機之處。亦自在意中。若此則今日交通進步中。舊城市之路。已覺其窄。尤覺未能適用。則吾國市政當知所擇矣。

十二上午遊動物園。下午遊華盛頓宅。由城前往。一時有奇。汽車可達。車所經處屋房不如加省各處之整齊。有樹林。而無菓園。亦東美與西美不同之點也。到門首。遊者甚衆。排列在門外候者。尙有百餘人。時適春假。各地來觀之學生爲多。然亦足見美人之崇拜其國父。回憶總理在中央公園開弔十日之熱烈。吾國人之崇拜



華 盛 頓 國 會


國父。固未讓他人也。入門後。見園地甚廣。屋亦不小。背臨大河。尤覺風景絕佳。聞華盛頓生時。家中料理園事有黑奴數十。以視總理莫利愛路之屋。合園地不過二畝。且爲同志所贈。并會爲革命押款數次。卒由同志贖回者。其相去天淵矣。入其屋。則陳列一如其生時。尤感總理逝世後。中央執行委員會。曾決定保留士敏土廠總理住處一切陳設。以爲紀念。交廖仲愷辦理。乃鮑爾丁竟據以居。共產之橫行本黨內。相彼雨雪。先集維縶。有由來矣。吾望同志早日實行此決議。勿令華盛頓住宅專美焉。屋側百餘武。則爲華盛頓之墓。一石屋。中有二石棺。墓前尙有數墓。則其親屬也。歸途游亞令頓無名英雄墓。下葬一戰死不知姓名之兵。以代表戰死之英雄。背後有紀念堂。後堂藏關於戰事之徽章。前堂爲演講廳。堂之外。有石碑無數。則南北戰爭及歐戰死者之墳也。此地原爲南北戰爭時南方首領李將軍之地。南方敗後。沒收之。及後其子起訴。不敢直訴政府。訴其管墓人。卒得直。償其價焉。此法治國之美談也。晚觀劇。此劇入場券五元。人稱妙劇。但余觀至半卽行。統計至美共觀劇四次。無非演愛情。中間插數十青年女子歌舞。多者十餘次。少亦七八次。裝束務競新異。尤以露體爲入時。實毫無情理可

言。祇競青年女子肌膚。以爲招徠。余稱之曰「市肉」。用「市肉」之眼光。以觀美國之劇。此所以索然無味也。然必有人從旁笑之曰。「此君太不知趣。」

十三日上午觀美術館。博物館。美術館不一。現所觀者。室不甚寬。物亦甚少。至博物館。則甚宏大精麗。屋分四層。藏物至多。約可分爲動物。植物。地質。人種。古物。五部。人種部中。以有辮之滿洲人代表中國殊難堪。而前清西后之像亦在焉。其指甲長二寸。當時固表示其華貴者。孰知今日爲人所訕笑。下午參觀國會。堂皇壯麗。應首屈一指。室中書物雕刻。尤精美可愛。左爲上議院。右爲下議院。適二院均開會。先至下議院參觀。議員額約百餘。在席者不過四十餘人。并有人坐在講演台沿板上。依講演台破睡。次至上議院。議員九十餘人。在席者共十八人。議員如私談。自表面觀之。從前吾國國會。實無如此齷敗。然美國法令出此。而蒸蒸日上。固由其信任委員會所至。終因此而根本懷疑代議制也。上下兩院議場光綫至適合。其頂平。用玻璃。音浪亦清。空氣亦好。然前日竟通過改善兩院空氣案。上院二百餘萬。下院三百餘萬。大理院同在一處。但未往觀。次至國會圖書館。高大華麗。藏書甚多。卽中國籍亦有一十三萬本有奇。

。聞居世界第三位。倫敦第一。巴黎第二。此其三也。入門右側。設有中國風景畫。及宋明書。再次遊林肯 *Lincoln* 紀念室。卽林肯被刺逝世處。被刺係在一戲院。刺後至隔壁之醫生室救治。故逝於醫生室。後此二地。均用以紀念林肯。但室甚小。林肯一生所用之物存焉。其原日戲院。適用爲徵兵處。故未入觀。復至林肯植物園。休息數十分鐘。乘汽車往觀波多瑪瀑布。水勢甚急。激石奔騰。但不高耳。聞華盛頓會計畫施工於此。故往觀者。多抱一觀華盛頓遺蹟之心。

十四日亞美利加 *America* 大學法科主任。來旅館導往參觀大學。年老矣。因對余等備極歡迎。親行引觀。上下樓。覺其氣喘。遂不願多觀。但詢其學校現狀。彼仍鼓勇導觀黑人大學。因亦不願多行累伊奔波。略觀卽回。此次參觀黑人大學。係出自余意。蓋聞美國有黑人大學二。此其一。入後。其校長不在校。由其祕書長出而招待。及引觀各處。此祕書長係黑人。與各人握手後。同行之一西人。係立陶宛 *Lithuania* 國之代表。暗指而目笑之。美國輕黑人。卽此可見其一斑。此校爲一等大學。世界黑人。均有在此肄業。計共有十七國。其學科。各科均備。惟習者。以教育爲多。醫學法律次之。年費僅



堂 念 紀 之 肯 林

六十餘萬元。政府撥三分之一。以故房舍甚單簡。聞多半係黑人畢業後。有職業者捐助建築而成。以視美國其他大學。年費若干萬者。相去何止天淵。人種不同。欲其平等。決無是理。思之惕然。此校長。現爲黑人。職員所見亦皆黑人。教員則黑人均有。歸途導觀之法科主任語余云。黑人不向政治活動。然醫生律師。尙多好手。噫。黑人豈僅政治上不能平等耶。近日各縣有限制其選舉權者。有限制其同學校者。據憲法以爭。竟莫如之。

何矣。

十五日遊白宮。卽總統府也。長不過一百七十英尺。除辦事室外。一定時期。可任人遊觀。宮中各處。懸歷任總統。及歷史有關之像。以比國會。大小判然。人云美國重民權。於此可表示云。次參觀財政部。外交部。海陸軍部。外交部海陸軍部係設在一處。美國其深明外交不能離海陸軍之意味乎。再次至林肯紀念堂。歷數十級而上。只一大廳。中塑林肯像。別無飾物。兩旁祇記林肯就職及南北開戰之宣言。廳內外共有石柱數十。皆三人方可合抱者。據云建此碑時。每州出一柱。然柱數只有四十四。與美國現有州數不符也。然此廳之莊嚴。因全無雕飾而益顯。其後登華盛頓紀功塔。此塔爲方形。高五十五丈五尺。每面之基。闊五十五尺。以次減少。至頂只三十四尺。砌石而成。建築時。徵石各國。中國亦有石在焉。惜乘升降機。未得一觀。至頂每面有二窗。眺望全城。有如指掌。

十六日遊軍人養老院。遊後乘車遊市外。河山秀麗。風景宜人。惟房屋不如西方新整而已。參觀印鑄廠。係印紙幣及郵票者。次參觀萬物標準評定處。係實驗一切最新之品

物而評定其標準者。引導者逐部逐件詳細說明。其微細之處。則一安士之重。尙可爲二千萬分之分差。用指按一鋼條。可見其波浪之擴大。至試風試電。所述尤妙。科學之發達如此。歎觀止矣。直觀至晚方回。亦只觀其一部。歸後收拾行李。備明日赴紐約矣。

十七日早九時乘火車赴費城 Philadelphia。沿途有數城鎮甚大。氣象亦佳。至十二時有奇至費城。費城爲美國第三市鎮。人口可二百萬。係古城之一。自一七九〇至一八〇〇年美國建都於此。到後同志宴於一雜碎館。其館甚大。靡費數十萬美金所建。陳設華麗。音樂跳舞。色色均有。專招徠西人者。雜碎館盛於李鴻章到美以後。東美處處皆有。資本動十萬以上。電燈廣告。非常輝煌。紐約諺云。土地爲猶太人所有。人民爲愛爾蘭所管。街市爲唐人廣告。蓋謂猶太人爲地主。愛爾蘭人爲警察。中國人雜碎館廣告多也。卽此可見雜碎館之發達。然食品則爲中國之下乘者。而西人業已嗜之如此。尙以良者應。更不知西人嗜之若何。余深信中國之食。實爲世界第一。宴後遊獨立廳。廳內中懸自由鐘。爲美國獨立時之紀念物。今有一破痕矣。其右廳一。尙有座位十數。則云赫赫有名之費城憲法會議處也。次遊國會聚議處。據云當時各省代表在樓上聚議。國民代

表在樓下聚議。是爲美國兩院之原。壁多油畫。殊精緻。皆畫其歷史上之事績。華盛頓結婚。林肯放黑奴等事均有。廳中一隅。木板四方。有釘爲記。據云係華盛頓就職總統處。門內樓簷。有旗十六。係當時十三州獨立之後。加至十六州時之紀念旗也。遊一長橋。中行汽車。兩旁行電車。兩旁上層行人。云係最新式者。經靈佛尼大學。因時間將屆上車。不及參觀。其市政廳甚宏壯。有高塔可四百餘尺。惜未能登耳。至時仍乘火車赴紐約。入夜至紐約。住一附近火車站之旅館。館內有二千五百房。房中電話廁所設備。當然應有盡有。且有無線電接音機在牀頭。欲聽音樂及演戲者。祇須掛上。洋洋盈耳矣。門有複壁。欲付物與工人。但置複壁中便得。工人可以無須入房擾人。館中有暗探十人。衛生交通。各有專司。儼然一市政也。食堂分六等。以等別價。誰謂美人平等哉。


十八日乘車遊市。及於郊外。訪孫先生之故人許文。年七十餘。猶健步履。昨夜曾至車站接余等者。郊外景物良佳。順路至水塘。參觀其入管之塘。塘水上射丈餘。水花噴天。頗一奇觀。據云以此滅殺微菌云。其蓄水之塘。則直一大湖。

十九日參觀博物院。院殊宏大精美。中列地質礦物人種古物動物植物。除陳列外。尤供給各校之研究。次參觀美術館。館亦壯麗無倫。中分石器金銀陶瓷油畫等等。其油畫每幅皆如原物。歎賞竟不忍去。次參觀哥倫比大學。傍晚沿海埠而歸。海景甚佳。

二十日遊葛蘭總統墓。墓在哈得森河 Hudson 之濱。建於屋內。圍以石欄。屋中有其遺物。屋後有李鴻章手植之銀杏樹。旁立方石。鐫文其上。蓋李與葛蘭有舊。葛蘭已故。故爲立石樹樹也。後其樹將死。請植物醫家活之。亦美談也。余等至山姐古。所住之旅館。名曰葛蘭。詢之。其主人卽葛蘭總統之子也。美國總統退職後。一切如平民。卽此亦可以見一斑。

次遊五十六層世界有名之高樓。舉頭四望。紐約雖大。如數縷紋。以後參觀其各層。有爲交易所者。有爲律師寫字樓者。初意各層爲賣雜物。後乃知其爲一大規模之商場及住所。

次參觀紐約市政廳。及教育局。知紐約去年。市歲入五萬一千二百五十二萬八千八百三十一元。而用於教育者爲一萬一千萬元。其歲入之數。固令人失驚。其教育費之多。



物 築 建 高 最 之 約 紐

尤令吾國教育家聞而羨慕也。無怪其女秘書長向余誇曰。紐約一市。無失學之人。查黃君炎培。民國四年。攷查紐約教育費爲美金三千九百萬圓。業鄭重記之曰。「稽其歲額。合華幣幾及一萬萬元。一市之費。浮於吾國矣。」曾幾何時。已由三千九百萬。而增至一萬一千萬。以視吾國教育費。不惟無增。且因戰事而日減者。其感歎爲何如耶。去歲中學畢業者共一萬七千九百八十四人。進大學者一萬二千八百九十七人。至中學教員。男女各半。小學教員。則百人中女子占九十五人云。詢其紐約移民如此複雜而多。當局擬以教育。使其融成美利堅民族。其效如何。則應之曰。幼者成效甚佳。壯者成效似未易言。美國於此點。亦一大問題也。後由其局長。以函介紹參觀一中學一小學。至中學。適放學。未觀而返。其校長約星期一前往參觀。以屆時當他行謝之。

二十一日是日因廣東政府有旅費由匯豐銀行 Corporation Banking 匯至。乃前往收。匯豐銀行在吾國儼然政治舞台老板。在紐約則汽車夫竟不知。再詢始覓得。

歸途見一簇一簇人。各擁一女人行。其女人則持一竹牌。上書反對政府出兵尼加拉瓜。始知爲美國之民衆運動。亦得以一新眼界。其運動似極自然。不似有以命令指揮者。

此其所以爲美國民衆運動耶。

因縱車遊市內。紐約因人口近增至七百萬。故房屋地面數十層。地下亦數層。其交通地底地面空中均有車路。而各車仍擁擠不堪。有一次余乘地道車。竟無坐位。立者滿車。足見其繁盛。其電綫。則空中滿布。有如蛛網。其公園。處處均有。最大者爲中央公園。有八百七十九英畝之大。有亭台池沼。異卉名花。森林石像。以點綴焉。至紐約雖以富裕。而貧者却亦聚於此。其窮人所居之處。即接富人所居之處。一則一人而大廈高樓。一則一房而數人混居。有一日晚餐。竟有一女乞丐來討錢。施一角。道謝而去。亦美國罕見之事也。至晚回旅館。收拾行李。準備明早赴博靈盧 *Batle* 觀瀑布矣。

二十二早余偕會君友豪赴博靈盧觀納格拉 *Nagler* 大瀑布。因汝爲等在紐約尚有別約也。火車八時後始開。余乃於七時半乘汽車週游中央公園。朝暾未上。薄霧輕籠。樹色山光。益形蒼潤。火車沿赫德孫河。向西北而上。風景殊佳。隔岸時見村鎮。樹林掩映。樓閣參差。儼然圖畫。中途見積雪尙厚。微雨霏霏。時雜雪片。由熱帶而來之人。益覺另有趣致。

旁晚將近博壺廬。微雨未止。積雪已消。七時抵博壺廬。入旅館晚餐後。乘雨徒步。遊各街衢。最令人感觸者。則電燈最明之廣告。即吾國人所開之雜碎館。吾國不惟無殖民政策。政府且從而摧殘之。而美洲所到之處。無不見吾國人足跡。且大都有中國街焉。吾國民族之殖民天性。真是令人崇佩者。

二十三日晨。專僱與一汽車友豪共遊納格拉瀑布。蓋世界名勝之一也。納格拉河。介於美利堅加拿大之間。匯綺麗 Lake Erie 杜郎島 Lake Toronto 兩湖之水。至納格拉河床突然低降。峭然壁立。水勢一瀉



布 瀑 大 拉 格 納

。若決大防。遂成瀑布。中間一島。瀑布因分爲二。島之右完全屬美境者。曰美利堅瀑布。島之左屬美境者曰馬蹄 Horse shoe Fall 瀑布。屬加境者曰加拿大 Canada 瀑布。初由納格拉。經一橋。水由上流洶湧而來。中遇石塊。奔騰澎湃。導者曰。此上瀑布也。特瀑布之上流耳。

渡橋至島。徒步循途而下。耳不絕雷霆之聲。目惟見雲霧之氣。至其島端。憑欄而望。右側一大瀑布。名曰美利堅瀑布者。水高一百六十尺有奇。其闊約十倍之。倒瀉銀河。浩蕩奔放。降至河底。激渦上旋。隆隆之聲。灌耳爲震。水花噴天。瀾漫空際。聞人言太陽當空。對映爲虹。是日適霧。祇見雲氣氤氳。幾不知是霧是水。

大瀑布之旁。有一小瀑布。約闊二十尺。導者曰。此新娘瀑布也。新婚者多來觀焉。向左而觀。則馬蹄瀑布在望。乃轉乘車前行。至馬蹄瀑布處。仍歷徑憑欄而觀。此瀑布直連加拿大。惟此祇能觀其側面一部。其闊在美利堅瀑布二倍以上。高則稍弱數尺。水聲之大。水氣之濃。則等量齊觀。吾人立足其間。雖曰晴空。亦殷殷其雷。濛濛其雨。况當春寒。懷乎不可久留。返而登車。衣履早已碎珠萬點矣。

再次至與島連之三姊妹小島。渡橋越石。以觀瀑布之上流。滾滾長江。挾波衝浪。曲折跳突而來。水花四激。石瀨喧嘩。其氣勢已壓倒一切矣。

回車。渡長橋而至加拿大界。此端屬美。彼端屬加。須有護照。方得前去。友豪未攜護照。此次破例允予借往。異數也。

余此次所經。凡歷兩國之境。景物判然。尤以美墨爲甚。獨由美至加。則國境雖分。景物如一。非特其民族同。其政治能力亦同。

過橋卽經維多利亞 Victoria 花園。溯河而上。沿途遇勝境。輒停車瀏覽。初至一屋。可由屋以升降機降至河中。從下觀上。嗣復乘車再至一屋。屋外臨河一望。瀑布全景。悉行入覽。瀑布之闊。共約三千餘尺。島右者。約千餘尺。島左者。約二千餘尺。島左之瀑布。有如半環。在加境爲正面。始能盡觀。斯時從水氣中望去。左右兩瀑。迴環映帶。雲蒸霞蔚。氣象萬千。而水勢衝瀉。更如千軍萬馬。聲聞數里。嗣入屋更換雨衣。帽雨靴。坐升降機。降下百餘尺。中有地道。共有三穴。其一穴。可仰望而觀瀑布之倒流。其二穴。則穴口瀑布懸流而下。卽西遊記所形容之水簾洞耶。水濺衣溼。未幾乘機

上升。乘車仍溯河行。至一水力發電廠。欲往參觀。導者曰。美境之機。較此爲大。盡回觀乎。乃迴車。遊一山。此山位於納格拉河左側。登之則納格拉河此段之全形。歷歷在目。不但瀑布已也。房屋馬路。均甚良好。有二三屋。專設眺望處。以供遊客眺望。另有一屋。曰神泉處。中有一井。方可及丈。水約尺餘。舉火燃之。則全井皆火。引以鐵管。則火在管口而出。置之手不傷。覆以巾則火透上。而巾依然。據云。印第安土人。（卽紅種人）擊石着水成火。以爲神。祀之。及今雖不以爲神。然科學者尙未發明其理云。余聞四川有火井。係以煎鹽者。不識類此否。至取其水飲之。一如恆。無色無味。奇已。

自是沿河而下。至一急湍處。坐升降車。降數百尺。憑欄追河而觀。上流河面闊二英里之水流至此間。其河面不過二百餘尺。以故水深而勢復洶湧。其急行每小時達二十餘英里云。再行則至一潭。側潭以下。水勢漸緩矣。乃乘車由原途渡橋。返美境。而觀水力發電廠。

當投刺往觀水力發電廠也。廠中司事人招待甚殷。先映廠中各影片與觀。後再導參觀

各處。此廠由數里外。卽鑿河導其瀑布之水至此。用以發機。高約二百尺。其水力轉機。每分鐘可三百次。據云用煤所得之成數。百可卅五。用水則百可得九十五云。其水力有用側壓者。有用直壓者。其機有二十餘。小者馬力可一萬。大者七萬。據云七萬馬力之機。可供三十萬人用云。全廠機器。祇用七人管理。現供二百餘萬人使用。因此生一感想。使人失驚者。今假定一處有二百一十萬人。復假定每一人挑水可供三十人之使用。則二百一十萬人之用水。須七萬人挑之方足。今用機器。祇須七人管理。而此二百餘萬人。卽用水不竭。是運用機器。一人之力。可抵十萬人。以四萬人之力。卽可抵吾國四萬萬人矣。吾國若不力重科學。使用機器。其能再以四萬萬人口之數。自豪其力量哉。雖機器之用。或有地有時而窮。而管理之省人。亦未必悉如此水力廠。然舉此以推。吾人能不猛醒乎。此廠經營二十餘年而成。資本八千萬。受政府監督。近與加拿大訂約。各不加馬力。據云係爲維持世界和平之關係。至各水力廠。只用此瀑布水力之半。其半則預備爲補充云。吾國巫峽之水力。有名於世。深愿其能早供吾人之利用焉。

觀水力發電廠畢。驅車而回。一路風景良佳。博壺廬則一九〇〇年美國開展覽會處。

今爲公園。且有學校設其中。其路政甚佳。中爲花園。花園兩旁爲車行路。車行路外爲人行路。人行路中除一部份爲士敏士築成供人行外。尙種草如茵。途經一屋。導者云。此一九〇〇年開展覽會時。麥堅尼 *McKinley* 總統被刺處也。故博壺廬現有麥堅尼之紀念碑在焉。

參觀其市政廳。蒙其贈余及友寮以該市門鑰各一。蓋表示其優禮。

并由其局長。介紹參觀教育局。該局所管之學生人數。幼稚園六，六五〇人。小學五，九七五人。中學一二，一八六人。職業學校一，六八三人。半日學校七，〇三八人。夜校二，五〇〇人。暑期學校一五，〇〇〇人。其教育經費。則占全市收入百分之三十。尙有市立大學。分文理法醫各科。另有私立大學受市補助者二所。省立師範一所。區區一小市。其學校數量。學生數量。已足令人失驚。至教員。小學大都爲女子。中學則男女各半云。是夜乘車至紐海文 *New Haven*。紐海文屬康內克的告特省 *Connecticut*。二十四上午六時有奇。至紐海文將行李寄車站。因在車站早餐。即往耶魯 *Yale* 大學參觀。此行全爲參觀耶魯大學。故不入旅館。此校爲美國著名大學之一。創於一六九六

年。內分研究科本科理科醫科神科法科美術院音樂院林科等。

此校完全男生。惟研究科有女生。余詢其學生東方學校男女多分校。西方學校則男女多合校。究以何爲較佳。答曰分校不至分心。可用功。

其圖書館有中國學生一人。在此管理。據云此校待中國人甚佳。其管理東方之圖書。則爲日本人。

此校二年以前。尙強迫宗教。但上禮拜堂時。各人皆閱報看小說。今聽自由。始無此狀。

余午膳於其會食堂。學生有先食者。有後食者。據云一年生照例後食。且食有定味。二年以上則可選擇云。美國大學。對於一年生同學。往往予以苛待。今此校食事。由校管理。亦分差別。奇矣。校中食事。雖由校管。關於衛生方面。則由市政府派員監督。其導參觀烹調室之女子。則市政府所派之衛生監督。烹調室內。大都爲學生之作工者。作工若干小時。則可免膳費云。

是校有兄弟會數所。參觀其一。似專爲男生交際之設備。二年以上之學生。始得入兄

弟會云。

次參觀一中學。此中學畢業。多入耶魯大學。此校雖男女同校。其授課實男女分班。據余所見其教員亦男教男。女教女。詢其分班理由。是否因便於管理。抑因程度。據其副校長云。管理方面之理由爲多。然課授男女同班。亦殊不便。以生理言。爲男女應課授者。各不同也。詢其西方中學。有由學生管理者。此校如何。彼悍然鄙之曰。西方人聞新卽試。用軍隊式。以學生管學生。名自由。實則否。若我東方。則一切示學生以法規。非至犯事。學校不予干涉。乃真自由也。此節曾詢華盛頓美利堅法科主任。據云東方學校。對於學生自治會。除學校允許之事外。一切無權。至學校允許之事。則關於學生體育方面之事爲多云。至一商科學校。則略觀而已。

四時後乘火車赴波士頓。波士頓係麻省 *Massachusetts* 之省會。廿五日早在波士頓參觀麻省工料大學。此亦美國著名大學之一。內分土木工程。機械工程礦科地質建築物理電氣工程化學工程等科。此校建築。係整個者。中分數層。層中相連一氣。機械卽設於每層之前方。歲費三百萬。所入常有餘甚多。卽仍積爲基金。其學校亦祇有男生。

參觀哈佛 Harvard 大學。此校成立於一六三六年。爲美國老而著名之大學。由波士頓前往。過一橋。其地名曰劍橋 Cambridge。據云美人初來設此校時。擬仿英之劍橋大學。故以名焉。各科設備均佳。圖書館藏書。尤較各校爲多。亦祇有男生。

次參觀拉丁中學。此校學生畢業。多升入哈佛大學。其校長云。此校爲美國最老之中學。初來美之五月花船。到美三年後。卽設此校。中無停頓。直至現在。全收男生。

詢學生自治會事。彼卽舉西方學校放任學生而痛詆之。詢軍事教育事。據云波士頓已行強迫制矣。美國學校對於學生。東方中學以上男女多分校。卽合校亦多分班。西方則男女生大都合校合班。至學生自治會。西方權頗大。東方則非學校允許範圍內。一切無權。而學校允許之範圍。多不出學生體育之事。而美國之談教育者。則普通皆抑西而揚東焉。至學制。雖有用六四二及六五一者。然甚少。全國大都皆用六三三制。軍事教育。則省立市立者。中學以上。多已強迫。且暑假期中。政府設軍事體育會。獎勵其國大學生加入。

波士頓。爲英人來美登岸處。復爲美國抗英獨立首義地。文化復集中於此。目前更爲

東美之軍港。古蹟甚多。惜時間不許。祇匆匆遊其獨立紀念碑。海軍港。海關。禮拜堂。并參觀其市政廳。是夜乘車返紐約。

二十六日繕寫函件。并完字債。收拾行李。以備渡歐。是日整日未出旅館門。

二十七日上午。仍料理行裝。下午游動物園。植物園。皆美國首屈一指者。是夜八時上輪船。夜一時展輪渡大西洋赴歐矣。

此次在美。有最抱歉之事。則到美之後。美洲黨部。函電紛招。多未能往。甚至加拿大總支部。墨西哥總支部。亦然。若芝加哥 Chicago 的采 Dehlor Hich 波士頓。杜郎島。則原約前往。卒之不果。尤覺不安。此則身雖去美。而精神無日不縈迴者。

此次余等抵美。同志及華僑。甚至當地官民。固極力歡迎。同時共產黨則到處攻擊。屬共產黨之中西機關報。每日總有攻擊之文字。而尤以余爲甚。實增熱鬧不少。

自一月十四日。由上海啓行至今約三月有半。足跡歷日本美利堅墨西哥巴拿馬古巴及加拿大六國。惟觀於美利堅注重教育。則深願國人留意取鏡焉。

美國教育經費。多者占地方三分之一。少者亦占五之一。其額數則紐約一市。去年由市

收入撥出者占一萬萬美金。由其市教育產業值三萬萬餘元。所生息之收入尙在外。卜技利一大學。年占千餘萬美金。羅省一中學。年占四百八十萬美金。建築費均尙在外。全國幾無失學兒童。窮鄉僻壤。亦使兒童有機就學。學以實用爲歸。各處中學。大半一如工廠。中學畢業者大半入大學：省立市立之學校。中學以上多強迫軍事教育。政府另有軍事體育會。以獎勵其國學生加入。此尤不能不予特別注意者。

法蘭西

四月廿七夜午一時由紐約啓輪渡歐。數日雖有小風。然以船有四萬八千噸之大。遂不覺震動。飲食起居一如恆。此次航行前後七日。船費三百五十美金。是爲一等之次者。其上尙有數級。故旅行最多爲舟車費。若以尋常久寓一地作預算。相差甚大。


五月四日。上午十時船抵法國 France 之斜布爾 Cherbourg。此地爲法國北方海軍港。與英國對岸。拿破崙一世 Napoleon Ier 封鎖英國時。集重兵於此。至今突出海中之砲壘仍存。船到法國。同志張掖。王燦芬等。由巴黎 Paris 來接。卽轉火車赴巴黎。沿途丘壑起伏。多爲牧場。人家稀少。頗有吾國鄉村氣象。夜七時。至巴黎。總支部同志早

來車站相接。知展堂梯雲亮疇哲生均先後已至巴黎。因卽往晤展堂。因數人居住各別也。談次甚暢。并知其由西而來之一切情形。與由東而來者。完全不同。至爲有味。

五日上午。各同志來晤。駐法同志向來對黨主張一致。故相談至快。下午晤展堂梯雲爲數時之暢談。仍各述所經各地情形。亮疇亦於傍晚相晤。

六日游露浮博物院 *Musee du Louvre*。法國國家博物院有十二。此其最大者。亦卽世界之最大者。此院係六百餘年前之王宮。歷代擴充。面積達二十萬方尺。除一部爲此院外。尙有一部爲財政部。一部爲裝飾博物院。院中雕刻。珍寶。器皿。繪畫。五光十色。至爲大觀。卽以繪畫論。亦是較有名之紐約美術館。益爲精富。畫中關於宗教者爲多。大抵歐洲文明。除去宗教。當減去大半。畫多人物。尤多裸體。大者縱橫數丈。人物百十。皆畫學大家。聚多年精力。以成一畫。大者形神如生。一二人物之畫。更盡神色。昔人有評畫者云。某畫一身之力。聚於次指。某畫一身之力。聚於尾指。在此館觀畫後。益足證其言之實。幾有觀止之歎。院前爲屠易魯里公園 *Jardin des Tuileries*。昔爲王宮。最初曾爲瓦窰。故有稱爲燒瓦場者。園有凱旋門。係巴黎六凱旋門之一。嗣至裝

飾博物院參觀。關於裝飾家內之物爲多。亦有中國物陳列。途經綱果魯都場 *Place de la Concorde*。此場係世界游覽場之最有名者。中央有一石碑 *Obelisque*。係一石所成。此石來自埃及。故刻埃及文。一八三一年埃及王贈送法王路易非力甫 *Louis-Philippe* 者。前後有噴水池二。旁列女神像八。係表彰法蘭西八大市府云。尤足起人與感者。則此地實路易十六 *Louis XVI* 夫婦斷頭處。帝王末路有如此者。再過爲亞力山大第三橋 *Pont Alexandre-III* 此橋跨塞納河 *Seine*。爲巴黎最宏麗之橋。因俄皇亞力山大第三與法王會於法京。行此橋奠石禮。故名以爲紀念。歸途并上阿非爾鐵塔 *Tour Eiffel*。塔高九百餘尺。有電機可分三級而上。其第一級。則劇場跳舞場餐館小商店均有。下視屋宇如石堆。人物如螻蟻。此塔建於一八八九年法國大革命百年紀念之萬國博覽會時。建立者工程師阿非爾主其事故名。塔在公園中。其公園頗大。遊後另乘車至十九區布迪說蒙公園 *Parc des Buttes-Chaumont*。園爲中英公園式。所謂中英公園式者。因歐洲公園向仿羅馬。極其方整。後英人至吾國。見吾國之園。因地規畫。澗曲有致。遂合二者而建公園。此式因名曰中英式。蓋整散兼有之公園也。歸途乘地道車。換車數次。上下皆數十級



巴 黎 凱 旋 門

。足見其深。縱橫交錯。足見其多。
七日赴總支部。與同志晤面。旋遊
凱旋門 Arc de Triomphe。巴黎有凱
旋門數。最大者在星場 Place de l'Ét-
oile。門下無名英雄墓在焉。有一穴
出火。長年不息。其側常有花園。蓋
遊客以弔歐洲大戰無名英雄者。拿破
崙一世自創街式以此爲中心。有十二
條街道集點於此。故此門四通八達。
門高大各可數十丈。有種種雕刻。門
既爲街道中心。汽車環而行者。全日
如串珠。游畢欲觀布倫大道 Avenue
du Bois-de-Boulogne。遂舍車步行。

所行之路。其闊爲一百四十米突。中有林路二。車路三。跑馬路一。建屋者尙須隔路約十餘米突。以前所見道路之宏美。當以此爲最。嗣遊巴特布倫森林 *Bois de Boulogne*。有人稱爲野公園也。林在城外。樹木葱鬱。中有小湖。尤澄碧可愛。遊人雜沓。車馬喧闐。而打槳謳歌者。復穿插湖內。實公共行樂最適之場所。遊畢參觀拿破崙一世墓。其建築物甚壯麗。頂爲圓形。中有凹。深可數米突。其闊相彷彿。拿破崙一世石棺在焉。四壁雕刻。至爲精美。地近塞納河。係巴黎繁盛處。蓋依拿破崙一世「余願葬於塞納河畔。常在最愛法國國民中間」之語。而葬此。而此語卽鑄於其墓後。拿破崙一世墓背爲廢兵院。 *Hôtel des Invalides* 陳列武器甚衆。壁間甚多關於法國戰史上之畫。勝負皆有。最近關於歐戰者。亦有二三小幅。繪德兵之野蠻。及福煦 *Foch* 將軍計畫軍事等畫。院中有石像甚多。院之中央。塑拿破崙一世像。奕奕如生。遊廢兵院後。乃遊十四區大舉區 *Cité Universitaire*。此大學區各國均新建有學生宿舍。日本亦有。惟中國則無。其旁有拆餘之城。并登臨焉。復遊盧森堡 *Luxembourg* 公園及天文台大道 *Avenue de l'Observatoire*。中有加內像 *François Garnier*。係一八七三年。法國侵掠安南東京時戰死

於河內者。此侵略吾國屬地之紀念。心旣不快。嗣見一噴水池。中有銅製地球。四人負之。係表示地球上。黃白黑棕人之意。乃表示黃人者。係露體女身。其頭則剃。其辮則折。尤爲難堪。歸途觀蠟人館 *Musée Grévin*。入其中。是真入。是蠟人。常常錯認。因館中塑像。種類不一。並故塑觀者。而觀者又故雜入蠟人中爲戲。如是真與僞莫辨矣。像中有耶穌歷史。法國革命歷史。甚多。中有一套。爲拿破崙一世之大宴會。塑男女無數。豪華不可一世。另有一套。則塑拿破崙一世在荒島絕命時。陋室一隅。布床帳中。挺臥閉眼。只有一最忠實的老勤務兵。坐椅掩面痛哭。令人生無限感慨。至俄國現時飢民狀況。均有像焉。晚。展堂梯雲亮疇哲生等來寓晚餐。并有由馬賽 *Marseille* 特來歡迎之同志。故暢敘至十二時。

八日參觀偉人廟 *Panthéon*。廟中所葬。以學者爲多。武功者亦不少。門外有二石像。左爲盧梭 *Rousseau*。右爲干內 *Cornéille*。地穴藏棺。則首列左爲福祿特爾 *Voltaire*。右爲盧梭。屋內壁畫甚多。均精美。其後以次遊盧森堡博物院 *Musée du Luxembourg*。小宮博物院 *Petit Palais*。大宮博物院 *Grand Palais*。賈那華勒博物院 *Musée Carna-*

Vallet。國立圖書館 Bibliothèque Nationale。文案庫 Archives Nationales。聖心大寺 Sacré-Coeur。聖母院 Notre-Dame。總法院 Palais de Justice。大宮博物院。正陳列時人作品。入選者轉陳列他博物院。賈那華勒博物院。係陳列巴黎歷史一切沿革之品物者。因此對於廣州市政關於保存歷史品物。未曾注意。頗有抱憾。其圖書館藏書至富。爲世界第二。印本書有八百餘萬冊。即抄本書亦有數十萬冊。但建築宏麗則不及華盛頓國家圖書館遠甚。文案庫係藏檔案之所。總法院係包含司法行政各裁判機關在內故名。聖心大寺聖母院皆教堂。建築均至精美。聖心大寺。在山巔。登之可望全城。晚至奧杯拿 Peta 國家戲院觀戲。入此院。極爲隆重。須服禮服。院中之華麗堂皇。應爲戲院之首。演員亦歌藝均佳。無怪人之共羨巴黎戲院也。

九日游凡爾賽 Versailles 此地有故宮。歐戰和約簽字於此。故世界莫不知名。離巴黎約半小時火車。當乘火車時。距巴黎不遠。見其貧民所居之屋。既小復陋。彷彿吾國江北沿鐵路之村居。正值春光明媚。途中風景甚佳。無何凡爾賽至矣。此地昔爲帝王游獵。因游獵而有宮。歷代帝王多駐此。路易十四 Louis XIV 在此卽位。其文德武功。皆極




圖 公 賽 爾 凡

煊赫。爲法人所崇拜。故立其像於門首。宮內備極壯麗。壁畫尤美。畫多繪法國歷史事實。關於拿破崙一世者占大半。當年氣蓋全歐。猶可於畫中彷彿見之。中有玻璃長廊。普軍占法時。在此宣布德意志 Deutschland 統一。故歐戰和約。法國必擇此地。使德國簽字者。殆亦聊報東門之役之意義乎。宮前噴水。爲種種形式。最有名於世。限於每月第一星期日開水管。是日非其時。未得一飽眼福。噴水池外。公園甚大。樹木青蔥。林外有水。可以泛舟。另有大小離宮 Le Grand Trianon Le Petit Trianon。大離宮內。復有大公園。

小離宮則路易十五 Louis XV 皇后所居。至今其品物悉仍其舊。晚赴旅法全體華僑及總支部所開之反對日本出兵山東大會演說。主張一致對日。會中全體慷慨激昂。當時簽名回國加入軍隊。抵抗日本者數十人。殊可佩也。

十日參觀美術學校 *Ecole des Beaux-Arts*。鑛業學校 *Ecole des Mines*。工藝學校 *Ecoles d'Arts et Métiers*。中央藝術大學 *Ecole Centrale des Arts et Manufactures*。

參觀美術學校時。由其祕書長 Edouard Gaerin 招待。此校分三科。(一)建築 *Architecture*。(二)繪畫 *Peinture*。(三)雕刻 *Sculpture*。學生約百人。男女同校。有時分班課授。全年經費。祇五十萬佛郎。教授年金。多者一萬五千法郎。其少者祇三千六百法郎。據云薪金之少。係由各人皆以教授爲名譽。故樂就云。正式畢業者。由政府給以文憑。政府年撥二十萬法郎爲獎勵金。每年繪畫雕刻二科畢業者。其第一名送至意大利實習考察。四年回國。必須有作品陳校。校中考試甚嚴。三月一小試。小試時十二時內不得離考試室。每年一大試。考期七十日。最初十三日。不許出外。先成雛形。方許出外自由繪作。出後與同行各友言。參觀美國學校。見其經費之多。情爲之急。參觀法國學

校。見其經費之少。氣爲之壯。後至鑛業學校參觀。由其教授引至各室。一一爲之陳說。其津津有味者。則爲埃及所得二萬年前之鑛。列品之多。至十餘室。詢其教授薪金若干。但云不多。不肯告以實數。再詢之。則云有特別者。則每小時。有至二百法郎者。

參觀工藝學校。由其祕書長 Paul Landais 引觀。凡影相電影電器汽機織機留聲機等。皆陳列自初期至現在之品物。每至一室。皆預將全室機器發動。故參觀益覺真切。至無線電處時。有一像片。其祕書長告余曰。此發明無線電之學者。現其人窮無以度日。爲之慨然。至織造處。有埃及三千餘年前之織品。其色不變。可見其當時藝術之進步。吾國其可以古文明自恃而不自警乎。有歐戰時德國之紙衣。其形一如布。據云惟不能洗水耳。參觀未了。與中央藝術大學所約之時間已至。乃告別。其祕書長仍殷殷訂後約焉。

參觀中央藝術大學。由其祕書長及總務長引觀各處。其機器多由各工廠所送。蓋工廠出一新機。送至此校。供學生研究。則學生畢業。即營購此機應用。實廣告之至妙者。其教授多由各工廠之工程師兼。故年薪亦廉。此校特別者。據云爲強迫預備軍事教育。 *reparation militaire*。其學生畢業。即可得砲科軍職。校內分授物理化學地質鑛學工業

電學機械治水學等。

十一日參觀巴士達微生物學院 Institut Pasteur。由其總務長引至各室參觀。詳細解說。巴士達爲發明微生物學者。國際熱心防止微生物人士。捐資起此院。以紀念之。同時卽爲研究微生物之所。院內附巴士達之墓。甚精固。特開鑰引觀。墓外長廊。列與微生物發明有關之學者像。至其圖書館。則坐而觀書者。皆頭白鬚長之人。深敬外國學者。終身求學不懈。

次參觀光學應用專校。由其校長引觀各處。一一詳爲說明。此校成立於歐戰後。因歐戰時。見光學與軍事上。關係甚大也。其建築費半由政府供給。半由私人捐助。校分二級。其上級一年畢業。所學爲最高理論。與實用。欲入此級者。須先習高深數學數年。其次級則專養成工廠應用手藝家。三年畢業。半日課授。半日實習。上級學生三十名。大半由政府資送各種軍官來學。此外爲光學實業界資送。校內常年費爲七十萬法郎。一部分由政府發給。一部分係捐助。一部分係學費。其儀器則多由實業界所捐送。

再次參觀女子大學。及其附屬中小學。由該校長及主任招待引觀。此校係教會人所設

。大學生不過數十名。中小學生有八百人。當參觀其中學上課時。有一學生在課門外立正。聞係因上課偶語之故。竊歎二十年來所未見者。其上課學生。嚴肅之中。仍有活潑氣。其宿舍亦清整。據寄宿其中之廣大畢業生李佩秀黃綺文二女士云。向未許人參觀宿舍。此次實特別云。并云校中待遇伊等至爲親切。而二女士則在巴黎大學上課。詢各級學校男女應否分校。其校長固主張中學以上絕對分校者。問其法國中學教員。與大學教授。薪金所差無幾何故。則云大學教授應增薪金。既多主張。未實現者。國家財力之關係。其主任言法國女子教育狀況初級教育與男子同。凡男女學生欲爲教員者。須進初級師範。初級師範男女之學制同。而班不同。至中等教育男女向來不同。男子課程較高。例如男子中等教育有希臘拉丁文。而女子中等教育則無。男子中學畢業可得中學畢業文憑。女子中學畢業祇可得修業證書之類。惟近今年。女子中學教育課程提高。幾等男子中等教育。如女子可以考取中學畢業文憑之類。此特就國立中學言耳。若私立中學。則課程完全與男子中學一律。此趨向近益普遍。至大學則男女同學。女子進大學者爲數甚多。多人文科。至法科醫科則不如男生之踴躍。就經驗所得。如中等教育培養得宜。

則高等教育不讓男子。尤以文科爲然。蓋誠心求學及性質清靜實女子所長也。每年中等教育考試。據統計。女子甚多居前列。則可見近來法國女學之發展。

十二日參觀衆議院 *Chambre des Deputes*。院壁皆有歷史畫。其議場無總統座位。國務員席。亦與議員同列。特在中間劃一隔耳。議席分左右派。愈左者其次序愈左。以次遞計至右。議場中光線。聞日夜如一。圍牆有鐵叉。聞防議事時爲人冲進者。

次參觀巴黎大學。其視學出而招待。問其法國行大學區之利弊。則云其利則能因地制宜。其弊則人才往往有區域之限。問其大學教授。何以能中學教員薪金相差無幾。則以任中學教員之程度。實際不讓大學教授。故待遇亦相差不遠。問其男女教員之成績如何。則云大學女教員甚少。中學則男教員之考試嚴。現在亦擬將女教員考試加嚴。使男女中學能程度相等。問女子入大學者。何以少。則云女子中學畢業。或就職或嫁人云。此校學生有二萬餘。年費三千萬法郎。政府祇支撥七百萬。巴黎大學。除各格外。另有高等師範。其地位較各科爲高。人材亦甚多。凡大學畢業。欲爲教員。尙須經考試。高等師範畢業者。則無須焉。法國各區大學。皆係國立。非國立者。不能爲大學。與美國私

立大學林立者不同。巴黎除大學外。有學術院。學者集此講學。與巴黎大學頗有學派門戶之情勢。至大學教授。年薪最多爲四萬八千佛郎。中學教員。最多者爲三萬六千法郎。其全國學校數。大學一七。高等及專門學校二四〇。男女中學六八一。小學八七二七九。

十三日赴駐法總支部巴黎支部比映古 *Billancourt* 支部之歡迎會。午與各同志會餐。餐後。遊巴特布倫森林。品茶於亭。泛舟於水。洵足樂也。晚十一時半。乘火車赴里昂 *Lyon*。

十四早抵里昂。同志同學來車站相接。因一夜車中不得寐。頭涔涔作痛。但有預約。仍住參觀中法大學。由其校長 *Rayet* 招待。引觀各處。此校成立於民國十年。校址原係舊日砲台。乃當日里昂西山險要之一。中有羅馬水道遺跡。經法政府撥歸中法大學。改作校舍。全部計二百餘畝。有樓房五座。校內設補習班。其正式課則赴里昂大學直接聽講。余長廣大時。復派學生至此。定額六十名。今缺額多矣。午與同志會餐。餐後。由中法大學校長引觀里昂大學。由其醫科主任及教授二人接待。參觀各處。一一由其各主

任者詳述。歸途遊里昂公園。覺不支。乃返。晚赴中法大學校長家宴。宴後赴中法大學歡迎會演講。是夜安眠。病亦愈。

十五日參觀里昂新中學 Lycée du Parc。由其校長引觀。至爲誠懇。對於學校情形。所述尤詳。其管理甚嚴。自習遊戲。均有人監督。宿舍有舍監同住。猶以舍監牀未能適中照料爲憾。觀其上課。學生見客至。皆起立。由校長囑坐。方坐。并令學生講解背讀。皆甚清晰。其廚房由大學所派醫生。監督其衛生。法國中學管理至嚴。起居課息。均有監督。報紙亦限制觀閱。對於女生尤嚴。雖信亦有檢查。聞美國西方有學生管理學校者。認爲奇事。嗣參觀市立圖書館。館中出其九世紀十三世紀等抄本良本見示。意甚厚。但所云正事進行之檢書最新方法。則美國早行之。廣州亦行在數年前。觀公共所設之運動場。尙未完工。云可坐四萬人。較之西美。實甚小。法國則以爲大矣。因法國注重體育。遠不如美國。美國各校。多有游泳池。法國則否。亦一證也。嗣赴里昂支部歡迎會。晚赴中山大學海外部學生茶會。

十六日乘車回巴黎至楓丹不老 Fontainebleau 下車。宿焉。爲參觀楓丹不老故宮也。



(一之畫爭戰崙破拿)畫壁之宮老不丹楓

十七日乘車遊楓丹不老森林及街市。至十時參觀故宮。因此時始開宮門也。此故宮有呼爲拿破崙一世故宮者。實則歷代法王皆曾駐此。拿破崙一世特其一耳。此宮歷史壁畫甚多。亨利第四 Henri IV。路易第十四。拿破崙一世等之當時陳設。猶保其舊。拿破崙一世之牀。有二級之梯。因拿破崙一世短小。而牀高。故上下以梯也。在法觀重要故宮二。生有二感。(一)建築與用品皆至精良。與吾國清宮。良惡不一者。迥不同。(二)法國數百年前之帝王陳設。猶依舊。吾國總理骨尙未寒。居處用物。業非舊觀。宮外有湖。湖外有園。皆極宏雅。宮旁有中國博物館。所陳皆吾國品物。庚子時

爲法人所攫者。閱之無限傷心。出故宮後。環遊郊外。山青水綠。樹秀花鮮。蓋法國人隨處有林。實增風景不淺。午餐後遂乘車返巴黎。

十八日休息在寓。繕寫各處函件。至法後。各處函件久未答也。下午則汝爲等由美至。暢談一切。

十九日因翰學初至。偕同重遊露浮博物院。亦以該院品物精美。遊後餘味尙多。欲再一飽眼福也。午與汝爲翰學同赴同志宴。宴後參觀巴黎商品展覽會 *Foire de Paris*。此會每年五月開一次。關於法國之農產品。工業品。商業品。應有盡有。會場甚大。中有汽車載遊人。前數日法總統親至參觀。示提倡及鄭重意。法國出品。機器新奇。遠不如美國。舉例言之。則美國製糖機。置糖其中。可直至上罐。皆不靠人工。法國則祇見包糖機。其包糖仍靠人工置糖於機。相去天淵矣。其農業用器。仍多仗人力。係小農制之用器。與美國大農制者完全不同。化妝品裝飾品。則華麗奪目。非美國可及。酒類之多。尤覺壯觀。法國之嗜酒。同世所共知。其陸軍學生。亦每日有一定之煙酒。會中物有標準價。較市內爲廉。因與翰學購塑像數種。

二十日坐汽車再遊巴特布倫森林。因軍行速。幾與他車相撞。車夫惶急。斗然汗流滿額。車停時。車夫自言爲俄國華族。今流離於法。猶在大學讀書。因囊殮不繼。始行駛車。萬一出事。將罹於法。情何以堪。讀杜甫「可憐王孫泣路隅。但道困苦乞爲奴」句。爲之黯然。是日同行數人。登山臨水。至晚始回。亦效法人星期日竟日在公園之逸興。

二十一日參觀參議院 *Palais du Senat*。議場座席。分左右派。如衆議院。亦無總統席。總統來時。祇可在正面旁聽席參觀。國務員席。在議員席第一列。現內閣總理。卽參議院議員。議員席上。有銅板像。係議員中之有特別學問功勳者。故在席上留紀念焉。其圖書館。甚華偉。各室盡歷史畫。皆極美麗。內有甬道。石級數十。係拿破崙一世所建。其至議院。卽行此道。嗣至東方文化院 *Institut des Langues Orientales*。欲參觀中國物品。因星期一不開。轉至動植園 *Jardin des Plantes*。其園之大。不及紐約。入動物園。須納費二法郎。入昆蟲室。又須納費一法郎。國家財力之豐絀。亦可於此觀之。二十二日參觀市政廳。其大廳柱頂間。有美女裸體塑像。係表示各府者。其飯廳。繪

耕耨者漁者牧者各像。蓋除歷史畫風景畫外。盡皆裸體美女畫。或以之表示春夏秋冬。或以之表示喜怒哀樂。或以之表示自然。或以之表示歷史。或以之表示詩文。或以之表示藝術。觸目皆是。均極華貴。凡法國之建築物。不論宮殿學校。美者皆繪裸體畫。不獨此區爲然矣。嗣遊巴士的獄 *Bastille*。故址。今旣巍然銅柱。塑自由神於其頂矣。巴士的獄係法國一八三〇年大革命時所破者。後在其地立此銅柱。其後羅蘭夫人 *Madame Roland* 被刑於此。所云「自由自由。天下幾多罪惡借爾之名以行」之言。卽臨刑時。翹首望此自由神像而言者。

二十三日因將離法國赴瑞士 *Geneve*。收拾行李。并與汝爲亮疇作長談。巴黎之遊。不覺浹旬。非特山水秀麗。房屋齊美。卽人物亦較儒雅。特事事不免守舊性重耳。處處皆現美術。道路建築。畫壁雕石。最爲顯著。人但云法國奢華。實則巴黎耳。巴黎之奢靡。又皆遊客。非法國人也。法國人旣勤且儉。卽女子亦無不時守一藝。能耐苦寒。至其學校。管理至嚴。用費甚省。復注意養成人之優美性情。而注意體育及職業則不如美。至其教授。爲學不倦。終其身於教育。不以新微而變志。尤足令人感佩者。余因歎美法

教育家。均能爲教育而耐窮苦矣。美國教育家。薪額多者。每年雖有一萬元以上。其低者亦有一千餘元者。較之工人。不如實多。其收入實爲下等。其窮苦無異法國也。若夫頭白如銀。仍埋首圖書館。則吾國尤不多見焉。

二十四日因未起程赴瑞士。往遊芳森森林 *Bois de Vincennes*。巴黎有二大森林。謂如人之有兩肺葉。前曾兩游巴特布森林。今乃更遊芳森森林。以見法國人對於市政培林之注意。

此林大於前者。亦有人工之湖。可以泛艇。同志遜之（張掖別字）自云長於掉艇。乃週遊全湖。碧水晶瑩。打槳所經。激成微波。推波成縵。有如羅綺。而白鵝三五。相逐蕩漾。似解人意。來相迎送。四望叢林。覺無邊際。但見綠陰接天而已。

倦遊而歸。見有上海報至。出國以來。此爲第二見。蓋三藩市後。直至今日始再見也。遂坐閱數時。未再出門。大都明日黃花。而日俄陰結。日本出兵山東。蓋明目張胆。則於報端見之。當在里昂時。進步報記者來訪。余以法報載山東日兵橫暴事。每多爲日本所蔽。彼問有何證據。余曰日本不能出兵山東。猶中國之不能出兵東京橫濱。今日本

竟蔑公理而出此。則當其出兵時。卽其橫暴時。何至殺我官民。而法報尙爲所蒙也。該記者唯唯。次日猶載其一半。隱其一半。我不自強。決無公理可言。我國人同志千萬以理自裁。庶內固而外能競。萬勿惟勢惟權之自爭。拱手讓帝國主義及軍閥官僚之張目。

瑞 士

二十五日午十一時有奇。與蕭君錫三乘火車赴瑞士日內瓦 Genève。車由東南行。所過除城鎮外。其鄉村則田中草長。人工少施。以視吾國農民。慚色實多。卽遇見耕者。其雍容亦與官紳等。豈法人安閒之態度。農民亦一致耶。

晚八時後。至瑞士境。遙見雪山。過境時口云查護照。實一打照面卽了事。蓋瑞士招徠遊客。爲國家社會收入之大宗。故取寬大主義也。

已至。住湖邊一旅館。一望湖中燈火。有如萬點明星。遊興勃發。步行湖畔。渡橋而南。此橋名白山 Pont du Mont-Blanc。跨湖南北。橋下綴以電燈。有如火龍。抵湖南

岸。再雇汽車週遊全市。入夜不過十時。行人稀少。以視巴黎十時以後正熱鬧者。大不同矣。


於此有一事足記。當余初至歐時。夜間不寐。直至將寐。則天亮矣。殊以爲苦。莫知其由。及汝爲等到歐亦如此。始悟美歐時間相差數小時。歐洲天亮之時。正美洲就寢之時。故初至歐。習慣不改。非至天亮不能寐也。且歐洲鐘點提早一時。故歐洲每當八時後。天猶未黑。余在國內雖非夜十時就寢不可。在歐則能延至十一時矣。若至挪威之終日不見黑處。又不知寢興變更何如耳。

瑞——

——士

二十六日晨在床未起。窗前燕子呢喃。似來促人。開窗一望。日色挾湖影山光而來。爲之心曠神怡。乃草草朝食。乘輪週遊全湖。此湖北瑞南法。故瑞法平分湖權。瑞士稱爲日內瓦湖 *Lac de Genève*。法蘭西稱爲麗曼湖 *Lac Léman*。湖形如偃月。東西長七十二啓羅米突。南北最寬處十三零九啓羅米突。面積五百八十啓羅米突。水色碧澄。清秀可愛。

初行北岸瑞境。轉入南岸法境。再行北岸瑞境。共歷十餘城市。至孟塗羅 *Montreux*




岸 永 城 堡

。乃由水登陸。乘電車上其山巔。至雪
界始止。瞰盡全湖。因此湖在湖中目力
所及不能盡也。復至犀永城堡 Chateau
Chillon。憑弔愛國男兒波尼伐得 Boni-
vard。追尋羅馬戰爭古蹟。戈矛猶昔
。故壘重新。此千餘年臨湖之建築物。
將與此湖而並壽。

傍晚趁輪而歸。抵寓九時矣。是日作
竟日湖游。覺此湖之美。光映朝陽。則
金龍萬道。影澄夜月。則白鍊平鋪。微
風吹蕩。恍織羅紋。薄霧輕籠。如蒙紗
幃。加以飛燕差池。浮鷗上下。益增活
潑。而入夜燈光倒影。儼若星羅。則更

有一景。至其沿湖。有城有市。有林有園。豪華而無塵俗。尤爲難能。然皆非此湖之最勝處。蓋此湖四面環山。層巒疊嶂。東行則爲柏泥斯 *Alpes Bernises*。南行則爲白山 *Mont-Blanc*。衆山非特高峻。而終年積雪。尤顯奇形。衆山繞湖如環。而衆山遂爲湖所有。山勢既奇。山脈尤遠。任擇湖之一處以觀山。山各不同。各有奇境。山境之變無窮。而湖之勝亦無窮。山頂積雪雖白。山中林木甚青。而積雪之山。有時白雲騰繞。不知是雪是雲。尤不知是山是雲。若落日餘暉。烘映積雪。則向之白者。轉成緋紅。是山之景無窮。而湖之勝更無窮。湖大不難。湖



瑞士內瓦湖之盧梭島

大而清碧難。有名山環之難。有衆名山環之更難。吾於此湖。幾歎觀止。

歸後輿猶未闌。乘月再至湖之西南小島。參觀盧梭銅像。盧梭生於日內瓦。地向屬法。故法以爲法人。瑞以爲瑞人。其銅像之標明。則曰日內瓦人。聞盧梭向葬是處。後法人取其遺骨藏之巴黎偉人廟。盧梭死而有知。應悔著書成名。致死後不能正其首丘。

有須注意者。此湖因大。不得已用三四火輪載客歷各城市外。並無其他電船汽船。只有坐四五人之一小艇。遊客掉之。滿湖均有。因感西湖勺爾一水。有人在湖中行電船汽船。恐碧澄之水。不久將攪成黃濁。斯時將改湖之名爲塘。而電船汽船一行。小艇撞覆堪虞。尤關生命。

二十七日晨起。本擬遊白山。因特往汽車已滿。乃改遊洛桑 *Lausanne*。洛桑在北岸。湖邊瑞士之一州也。人口約有七萬。街市房屋。至爲齊整雅潔。且隨處有公園。適有會事。市上汽車均裝人物遊行。觀者塞途。是處上山頂。亦用電車。其山 *St. Charles*。右一帶爲林。步行其中。遊人祇有三五。出林見人正布置大會場。備下午跳舞飲者。乃至山頂一餐館午餐。席在樹下。湖光山色。盡供杯盤。至樂無比。

餐後下山遊街市。則遊人喧嘩矣。經過一大學。因往參觀。學生有一千餘人。其美術室。地質室。動物標本室。植物標本室。以余所見。中國各大學似未有過之者。瑞士人口不過三百餘萬。土地不過一萬餘方哩。聞其分二十餘州。常有笑之者。然其一州竟有如此大學。則吾人應爲愧死。此外尚有理化專門學校。商業專門學校。則未往參觀。三時有奇。再上山觀其大會。則數百紅男綠女。村嫗野老。飲者飲。跳者跳。別有鄉村風味。又非城市比矣。

再至午餐餐館處。其旁樹林。已滿坐遊人。有鬚髮皆白之老者三。拉風琴。擊鐵叉。唱歌其間以悅客。客與以錢。不問多少。


再遊森林。則遊客滿山滿谷矣。森林中有小塘。塘邊有小動物園。

下午五時有奇。候船者滿岸。半時許渡至南岸法境亞美昂 *Evian-les-Bains* 乘車環遊一週。此地係法國西南方火車北行終點。亦一耍市。但街道房屋園林。皆不及瑞士境各城市。無怪乎人遊日內瓦湖者。皆云瑞士矣。

乘火車返日內瓦。購一等票。初僅與錫三兩人。至換車時。則二三等客皆擁至一等車

。車行亦不準時。儼然吾國之火車矣。

二十八日早乘車遊白山。白山在法境。其最高峯一萬五千七百八十一英尺。係阿爾卑斯 Alps 山之最高峯也。阿爾卑斯山東西橫亘。跨意大利。瑞士。法蘭西。奧地利。四國邊境。由白山而東北。蔓延與匈北境者曰喀爾巴阡山。再東北逾中俄高原。窩瓦高原。爲烏拉嶺。正東蔓延者曰達郎西里瓦尼亞山。逾黑海接高加索山。東南蔓延者曰的那利舍阿爾卑斯山。而盡於巴爾幹 Balkan 半島。向南蔓延意大利 Italia 者。曰亞牛寧山。向西蔓延於西法之間者曰比里牛斯山 Pyrenées。東西



白 山 之 冰 海

亘於西之北境者曰坎大布連山。是白山爲歐洲之最高山。亦卽羣山之祖也。因其高大。遂終年積雪。

是日早八時有奇。乘汽車往。未幾。過法境。一路皆山。車行其中。初則羣山夾平原。人家甚多。而雪頂之白山。遠遠在望。但經路隨時不同。寬窄不一。經過各山。復大小互異。通阻有差。當地勢寬展。山在兩旁。則白山巍然。鎮壓中樞。適當路窄。視線爲遮。則峯巒秀出。高出雲表。有時羣山無阻。則白嶂前橫。有時山峯當面。則銀河分瀉。

車行一時有奇。峯迴路轉。已在山脚。夾谷而行。仰視山腰以上。一白無垠。萬壑千巖。形狀不一。雲騰日炙。氣象更變化無窮。或則石壁高峙。百怪千奇。雪所止處。翠柏密如麥秧。時而三五房屋。點綴其間。時而懸流巨細。發爲奇響。

再行一時有奇。至白山下之沙穆尼崙 Chamoni。此處爲改乘上山電車至白山附山處。蓋白山不能登也。因數日前仍降雪。車路爲阻。乃改至柏針山 Mont d'Aiguille du Midi。乘懸空電車登山。車懸鐵線上。以電推行於空中。隨山勢而升。下望尙不甚危。

。至所止處。其上積雪甚厚。不能再升。其下仍白雪布滿。再下始見柏樹如毛。間雜花草。舉目四望。羣山業已如附。唯見無數白髮老人萬頭息坐而已。尙恨未能立馬第一峯。以小天下焉。三時乘車而回。一路山峯如笑。當面迎人。直至六時始行回寓。晚觀戲。無甚高妙技藝。

是日道經一墟。正是墟期。村人赴墟。填滿街市。購賣以牛爲多。衣服甚爲儉樸。

道旁人家多業農。男女耕種。皆服衣裳。穿革履。非甚忙碌者。且人亦不多。至法境

與瑞境較。則園林道路。亦瑞境良於法境。

二十九日參觀日內瓦大學。由其祕書長招待。此校分爲六科。(一)理科(二)文科(三)社會經濟科(四)法科(五)醫科(六)耶穌理教科。此外尙有附屬學說。如理科之化學院。醫科之牙科專門。社會經濟學之商業高等專門之類。

校內職員每二年由教授選舉一次。校長。副校長。祕書長。各科科長各一人。

教授分爲正教授。特別教授。助教授三種。正教授與特別教授之分。非以學問。乃在經驗及服務年期。選舉職員。惟正教授始有被選權。此外有特別講師。係有名學者。於

某科擬演講。得校長許可。學生納費自往聽講。其費半歸學校。半歸演講者。現有正教授六十一人。特別教授十一人。助教七人。而講師則至七十八人之多。其薪金正教授每年自九千佛郎至一萬五千佛郎。特別教授每年四千至九千。助教則以鐘點計。(按法國用紙佛郎。一法郎約合中國一毫。瑞士用金佛郎。一佛郎約中國四毫半有奇)

經費每年一百五十萬法郎。政府撥一百二十萬。學費收入三十萬。

學生現有九百餘。最近理科有一百六十餘人。女生有五分一。文科百人以上。女生過半。社會經濟學百四十人。醫科二百四十餘人。女生均十分之一。據其祕書長云。歐戰前。此校有二千學生。中有俄國六百名。歐東各國三百名。受歐戰影響。今無矣。

當與其祕書長談話時。適一學生至。其祕書長簽一單付之。因告余曰。此校有一特別組織。即學生年納十佛郎保險費。有病者校中每日給予三佛郎。現所付單即是此費。此費取自保險費中。有盈無絀。以後并擬逐漸減少保險費云。再詢其校中更有何特別組織。則云尚有實驗室保險費。學生每年納費四法郎。若因實驗受傷。則醫治悉由學校擔負。此外尚有全國學生所組織之癆肺會。現在日內瓦湖山間築有病院。該會年納費五佛郎。

。有病入院。僅日納費六佛郎半。最特別者。則此病院各大學皆派教授往授課。既免寂寞。又能求學。成績甚佳云。

詢其全國大學情形。則云共有七大學。但各州辦理各不同。至強迫教育。日內瓦州至十五歲。其餘各州祇十三歲云。

此校植物院有名。由其科長 Dr Robert Chodat 導觀各處。其科長係海帶專門。發明新海帶三百餘種。其餘各植物發明亦多。院中植物標本室有十間。中有東三省西藏之植物二箱。其圖書館係專藏植物書報。共有七萬本。中有一部。現世界上僅有六部。此其一云。另有關於西藏東三省之書。問何自來。云或購買。或交換。中有關於東三省者。係日本文。爲之汗下涔涔。中國不自理。他人爲理矣。據云伊得某夫人之助。將往中國採取植物。并云此院與維也納 Vienna 植物院爲最良。惟也納有一教授。在中國五年。亦專心研究中國植物者。至此院與世界各校。均有交換品。吾國之南京中山大學廈門大學亦在其內。

瑞士以時表著名。市上觸目皆鐘表店。因往購以留紀念。購後并參觀州立之鐘表學校

。由其校長及秘書招待。各室由主任教授。逐爲解說。日內瓦製造之鐘表。非經此校驗後。不能出售。學生不多。蓋不能多教也。每級以鐘件分。其最精者。當爲發條。則全女生。據云鐘表有手工有機工。手工良而價昂。至所成表。小者云爲女生所成。意女子較精細也。另有電器機。則非特能表示用電若干。且能按月按時而預計用電。以定貴賤之價。

日內瓦雖瑞士之一州。地復不寬。然因風景之佳。遊人咸趨。國際聯盟會在此。作國際中樞。尤增價值不少。聞國際聯盟會。現另購此地森林。值佛郎一千九百餘萬。以備另建云。國際聯盟會中有威爾遜之像在。至其人民似甚優秀。復皆有職業。可羨也。

三十日因定赴瑞士國都伯爾尼 *Berne*。早起收拾行李。繕寫函件。原擬十一時起程。卒因函件未清。至下午二時始乘火車而往。甫上車。覺甚熱。車沿日內瓦湖北岸行。偶念此湖朝景暮景晴景月景。均既領略。雖未目睹降雪。然雪景固歷歷接於眼界。惟有雨景未得一飽眼福。安得沛然下雨。償盡所欲哉。正一面望湖。一面凝想。乃忽見空中黑雲一片。瞬息展布。日色無光。雷聲隆隆。居然雨下。雜以斜風。但見急雨渡湖。湖隨

雨隱。立時湖山藏形。如霧如煙。不辨遠近。直過洛桑。雨始停息。遠望雨未止處。黑雲壓湖。有如紗幃。而陽光照處。則見金光從雲中透出。雨氣映成霞色。此時湖中之水。恍若深黑。山林有似膏沐。向覺熱者。亦轉清涼。爲之狂喜。回憶十五年春。與留法廣大學生游西湖。盤桓數日。細數前後遊西湖三次。晴景雨景風景月景均遇。惟以未遇雪景爲憾。乃是日遊山。卽遇降雪。急回湖掉艇。以賞湖景。及歸衣履盡溼。手足皆僵。其快慰正與此等也。

車行所過。皆山菁林密。家屋精良。道路通達。其農人耕田。皆用人力。鋤也鎌也。一似中國。用機器者甚少。過四時而瑞京至矣。入旅館後。卽雇車遊各地。初至其公園。園門當前。有一地球。塑五人飛遊郵像。萬國郵政在瑞士同盟之紀念品也。五人卽表示人種。園不大而甚雅。完全如中國式。曲折依山而成。中有人工小池。蓄鴛鴦等水禽。有一隅可眺望全城。并有木圖詳列。能望各山。標以名號里數。以便瞭望。次至其國會參觀。衆議院有議席一百九十餘人。蓋每二萬人選出一人也。中爲議長席。兩旁有閣員席六。因瑞士聯邦行政院以七人組成。每任總統由此七人中選出。總統不得出席國會。

。故開員席祇有六也。議員席後有四十四座位。爲每州議員代表二人之席。其樓上則爲旁聽室。參議院更上一樓。席數四十四。每州選出議員二人之數也。餘坐位亦同。瑞士國會頂壁。均繪畫表示職業文藝種種。惟標幟以孩童。非如法國以女子耳。再至博物院。則院門適閉。門前有萬國電報無線電同盟之紀念品。中國未見列入。其後過瑞都有名之長橋。橋甚高。蓋瑞都依山建築。此橋爲兩山通路。下有清溪。溪岸人工建築。甚齊整。岸旁草木甚多。尤覺雅觀。過橋不遠。御者停車。導觀熊。蓋熊爲瑞士所崇尚。其國都伯爾尼卽熊之意。故其雕刻圖畫。多以熊表示。而遊客來瑞士。亦以觀熊爲樂。此地有熊數頭。有一熊正沿樹上。至樹半而坐。似馴養甚久而能解人意者。再歷半小時。全城皆遊畢。因地不大也。所以擇都此者。因瑞士合三民族而成。故有曰法國瑞士。有曰德國瑞士。有曰意國瑞士。西界法。北界德。南界意。不欲有所偏。故以較中之伯爾尼爲都也。都旣因山而成。屋自因山而築。頗同香港。秀美則遠勝之。近來國際事件。多在瑞士。大都以其國合各民族而成。富於調和性之故。至瑞士境內。多高山大湖。則不特爲其國表優美。實則爲其民增幸福。否則比利時 *Belgium* 亦永久中立國。卒之未

能如瑞士得保和平者。以瑞士山高湖深。不便作戰。比利時則否也。

卅一日早步遊公園。經國會過長橋。徘徊不忍去。因橋之水與兩岸之林。青翠可整也。并觀其有名之大鐘樓。十時本與其大學約往參觀。乃因錫三以奧捷德三國之護照未簽字。欲於瑞都辦妥。遂不果。迨至下午辦妥。則因雨未出外。雨止又乘火車赴琉森 *Luzerne*。火車所經。無童山。山水皆清麗。處處復加人工點綴。益增其美不少。無怪世人之以瑞士爲世界花園。計五時開行。七時有奇至琉森。飯後步行其湖旁。路樹整齊如一。枝葉相連。人行其下。有如長廊。而綠陰更可愛耳。正當雨後。湖山潤澤。嬌翠欲滴。無何月出。益覺明媚。并隨步游市一週而回。

六月一日晨乘輪船遊琉森湖 *Lac de Lucerne*。及麗吉山 *Pigi*。琉森湖又名四州 *Lac des quatre Cantons* 湖。因湖四週有四州。此四州爲瑞士建國之基礎。故名焉。瑞士之湖。大推日內瓦。美推琉森。其名貴可知。加以有建國之光榮歷史。有英雄輩出其間。遊瑞士者遂亦以是爲中心。故其旅館之繁華。舟車之便利。日內瓦亦遜色焉。此湖雖小於日內瓦。而港灣則較多。甚至湖壩深入山際。山遂插入湖中。如是湖外有山。山外有湖。

山既包湖。湖亦繞山。而湖山遂兩顯其美。初由西向東行。兩岸山勢拱護。山樹之青。與湖水之碧。相映益妍。而北岸一灣一曲。皆有亭台樓榭。依山臨水。人家旅館。更不知凡幾。稍行兩山伸出。若山窮水盡者。一過山灣。湖形袤延南北。形勢斗然寬宏。再過二灣。乃登陸乘車登麗吉山。昔人評浙江西湖與惠州西湖。一爲宮中西子。一爲浣紗西子。吾於日內五湖與琉森湖。亦曰淡裝西子與濃抹西子而已。

麗吉山爲瑞士名山之一。非以其特高。以其峯頂可見四週山峯。及覽盡全湖也。乘車初上時。四望除湖水環繞外。萬山如拱。或遠或近或高或低不同。或雲或雪或林或石亦異。忽而本山雲氣蒸騰。行約半小時。雲氣滿布。咫尺模糊。不獨向之湖山莫辨。卽當前之草木亦失顏色。同車遊客。咸爲怪愕。車復徐上。越山而行。峯迴路轉。雲氣全消。麗日當空。下視湖山。噴然在望。特大小易形耳。曠觀左右。似可與齊者。惟有青天。車行共停數處。每處均有華麗旅館。雅潔住居。車行共約一時。而至終站。復有人家旅館。乃步行登山之極峯。斯時也。大有天上地下。惟我獨尊之概。時遊人六七。東瞻西望。販婦三四。正擬陳設貨物招客。時雲暫起。錫三欲爲余攝影。正商近景取旅館一

角。遠景取最遠之雪峯。鏡配未妥。而雪峯幾爲雲氣全障。攝後。錫三曰。似祇可見旅館耳。摒當影相機未畢。而雲氣驟然四迫。旅館全失。對面已不辨人。遊人悉已走散。惟見販婦鋪設猶未妥耳。余與錫三言曰。此數婦正陳物求售。而濃雲已布。恐此日生意休矣。亦匆匆下山。至旅館午餐。此旅館有房七百。可住千餘人。價則每日至少七佛郎。其餐室至大且美。乃據其臨窗一席以餐。忽見東南雲開。湖也山也。既見一部。少焉復隱。而西南漸開。餐畢雲似漸收。乃急造峯以竟其勝。時西北湖山。均清晰在望。余坐峯巔木凳背湖山。錫三爲攝影。未幾雲又飛來。遂轉望山北。但見峭壁千尋。山脚盡處。湖水清碧。無何雲在對面萬山叢中之高峯。冉冉向山上升。遂又轉眺他處。目不暇給。爾許天雲爲開。四山畢現。觀畢而下。男女遊人。時又紛集山峯矣。

此次在麗吉山極峯觀覽。忽而天氣清明。遠山如拱。近山如伏。有雪者白。無雪者青。而琉森湖之水。縱橫屈曲。一碧無瑕。忽而輕雲四合。週圍如幃。不見一物。遑論萬疊湖山。忽而雲開此處。湖山偶現一角。忽而雲鎖彼隅。湖山隱其一部。忽而山半有雲。羣峯有如懸空。忽而羣峯雲抹。天山兩若相連。或則縷縷徐騰。或則驟然連結。或則

空中橫來。或則山腰細展。其生也莫知所來。其散也莫知所去。但見黑者。白者。濃者。淡者。厚者。薄者。聚者。散者。變化瞬息。湖山易形。天殆故神其技。使一定之湖山。化萬種之狀態。以供遠客之飽覽。余之眼福。真不淺哉。至一時有奇。乘車下山。此次由山南而來。乃由山北而返。車行山谷。山陽既窄。眼界亦狹。雲之變幻亦希。山之真相畢現。初見積雪。繼見翠柏。終雜野花。而石壁懸瀑。峭巖幽洞。復隨處發見而已。車由北而西。至山脚。更換火車回琉森。一路有山相送。湖水亦時笑迎。至三時後。而抵旅館。休息約半時。再往公園。觀其紀念石獅。此獅係將山石就山鑿成被射垂死之獅以紀念法國大革命時。法王之瑞士衛隊官兵盡爲法王死者。獅長二十八尺。觀者便嘖嘖稱贊。因思吾國大同府千佛山之佛。亦就山石鑿成。其數之多。應不下千。其正殿之大佛。高大若干。却未細計。但其時同行十餘人。立於拇指上攝影。以視二十八尺之獅。實天淵之別。聞此佛像工程共一百三十餘年。終北魏之世以經營者。不特外人不知。吾國亦少知之。足見吾國人對於歷史及藝術未能微加注意。殊可慨也。繼觀石獅右方之油漆室。乃繪普法戰爭時。法敗兵退入瑞士。瑞士解其軍裝。供其救護之情形。大雪滿

天。法軍人瑞境狀。瑞兵出隊狀。人民給養法兵狀。瑞兵解除法兵武裝狀。人也馬也。行者立者。坐者倒者。祇覺其真。不覺其畫。其他房屋樹林景物。一一酷肖。更不待言。真歎神品。最妙者繪鐘。則前者真。後者繪。繪車亦前者真。後者繪。遂使人將繪者與真者視同一物。此種繪法於三藩市及其他各博物院均見之。然能如此數千百人馬。一一與真者無別。應推此畫。其後乘車週遊市內一週而回。

二日早九時有奇。乘輪由湖直至忒爾斯巴蘭 Tullinge。今日重來。儼如故人。一灣一曲均皆面善。至十一時後。而忒爾斯巴蘭



瑞士四郡之威廉忒爾紀念處

至矣。來此爲訪威廉忒爾 William Tell 故蹟。及觀人工巖穴。忒爾爲瑞士敗奧大軍。脫離奧國最著名之人。而其最初事蹟。則因忒爾經過木柱所掛奧大利的都統革斯勒冠 (Crown)。不依令行禮。奧都統欲死之。曰。汝善射。今置蘋果於汝子之頭。能中蘋果則宥之。忒爾用箭二枝。置在弦上。一箭中果。奧都統問何因用二箭。忒爾不答。許免其死罪。乃言曰。一箭若傷吾子。一箭卽射爾心。奧都統大怒。縛致舟中。將閉諸巖穴。忽暴風雨。湖波大興。乃解忒爾之縛。命其相助。迨船出險。忒爾躍上湖石而逃。今仍名其地爲忒爾斯巴爾。上岸乘車。觀忒爾銅像後。卽至湖邊。經人工巖穴。而訪忒爾躍逃故蹟。於湖邊有屋一間。中繪四圖。一爲忒爾射蘋果。一爲忒爾由船躍岸。一爲忒爾射奧都統革斯勒。一爲忒爾與其二首領宣誓建造共和國。全是造成之紀念品。然其鼓勵民氣。招徠遊客。莫不兼受其益。向在吾國。所至各處。古蹟皆無人保存。甚至國父孫中山先生之遺物遺蹟。今亦未能一一收集。良用痛心。至三時後回寓。準備六時赴祖立希城 Zurich。此城乃瑞士之第一城。商業尤盛。在瑞士東北部。二日傍晚。卽由琉森來祖立希。頭等車中。只余與錫三。因坐車頗足判斷各國情形。美國車無一二三等之分。實

則因錢多寡。坐位不同。但美國之車。最錢多之位。時時人滿。足見其國之富。法國之車。明明分幾等。但頭等之客不多。聞坐頭等者。大都爲國會議員。政府人員。及新聞記者。不須購票者。若短途之車。竟至亂坐。至瑞士則按票坐車。雖無美國之富。卻無法國之亂。行未至半。已見祖立希湖。約行二時。而祖立希至矣。乃步行街道一小時。其電車汽車之絕馳。大有紐約巴黎之風。大銀行大店鋪大旅館大別墅。瑞士他處卻未之見。此處歐戰前商業完全爲德國獨占。今則法意侵入矣。

三日早乘汽車遊市上一週。乃乘登山電車。登湖旁琉璃白山 *Dillberg*。是日適星期。遊人極踴躄。歐美人士。每逢星期。無不作郊外遊。登山者有焉。臨水者有焉。入林者有焉。往往舉家前往。每人多背負一囊。一日之飲食。及雨具。咸備於斯。卽老叟乳嬰。亦有往者。而學生尤多。其怡情山水。較之其他。實至可取。至瑞士遊山之車。無論電車火車。雖登極高之山。皆不覺危。因其迂道以求安也。車行甚緩。俾遊客得以盡情賞覽。且車旁山花至多。禽鳥親人。足見其國人對於公衆之物。保護周至。俾無情草木。得以暢茂。有情禽鳥。不至驚駭。此山高不過八百餘米矣。特瑞士多高山。少平原。

惟祖立希平原較大。山亦不高。故八百餘米突之峯。遂可周覽附近城市山林。而千尋萬壑之雪峯。則仍外環密密也。此山林本甚茂。高處尚有八層之鐵棚。高八百餘米突。登之則一望更能窮目力焉。但見沿湖之西北端。闕闕撲地。湖邊山坡。亦盡人居。小山起伏於內。大山環繞於外。興盡下山。午後參觀博物院。同時參觀之兵士甚多。入瑞士國處處有兵營。處處見兵士。較之美法。不至其軍事地。不能見軍人者不同。院內分類陳列。物不甚多。地底有一室。係藏貴重物者。有專人管掌。有人至始開電燈導觀。則貴重之徽章珠寶及古物也。適此地開美術展覽會。往參觀。繪畫雕塑。以較巴黎大宮博物院。日前所開之展覽會。技術相差似甚遠。品物多少。自更不如。歸途租小汽船遊湖。此處爲商業地。故電船汽船。往來甚多。此湖由西北端斜行東南。形長有如大河。其偉大不及日內瓦湖。而港灣甚少。復不深大。沿湖森林。亦覺較疏落。其美麗不及琉森湖。惟居民多。工商業盛。則瑞士全國。應推此湖之祖立希焉。船初沿南岸行。至一小灣。則海水浴場在焉。千餘男女。將浴者。正浴者。浴畢者。莫不興高采烈。湖旁多人家。夾岸青山。惟東南方面。雪峯矗立。若塞去路者。傍晚由北岸回。經一林甚雅。遊客

復多。故抵岸後。步行再遊其林。直至入夜始回。

四口參觀其國立高等雜藝專門學校 *École Polytechnique de Zurich*。及州立大學二校。皆歐洲著名之校。先至國立高等雜藝專門學校。由其祕書長招待及引導參觀。此校係國立。全國祇有一校。與各大學之屬州立者不同。內分十二科。(一)建築。(二)市政工程。(三)電工。(四)化學。(五)藥科。(六)森林。(七)農業。(八)鄉市。(九)數學。(十)軍事學。(十一)數學。(十二)自然科學。每科有一院長。全校有一校長。一副校長。均每二年由教授公選者。校長繼任只許一次。教授分正教授。特別教授。助教。講師。惟正教授有被選權。其制一如日內瓦。大學教授。普通薪金。高不過一萬六千佛郎。但特別情形。有高於此額數者。經費每年七百萬佛郎。除收入學費約三十萬。餘悉由國家支出。至學生現有一千四百人。瑞士約千人。其餘為外國學生。最多者為荷蘭。有七十餘人。次匈牙利六十人。再次法國三十餘人。其畢業期限。長短不一。每年分二學期。有八九學期畢業者。有六七學期畢業者。市政工程與自然科學。學期最長。須九學期。方能畢業。中有一學期。完全考試。足見其對於學生考試之注重。科各有院。院有

房屋數十間。樓高數層。據其祕書長云。歐洲最大最齊整之學校也。并云。與此同性質之學校。德國有一。但規模較小。明日爲該校開若干年紀念會。其校長日前即赴此會到德。

此校注意實習。尤注重實用。故各院陳列品質實驗室至多。即森林科而論。其蟲害實習室。多至十餘間。至瑞士多高山。其森林多種柏。竟在十分七以上。其次桐。其次柳。據其教授云。平原近溼者二三十年可成林。山上成林。則非百年不可。參觀市政工程科時。正預考畢業。其試題乃使學生計劃祖立希一曠野之建設。學生圖案甚多。某處宜住家。某處宜工廠。水道如何。馬路如何。各各不同。遂將此曠野。變成錦繡之城市。參觀其藥科之藥室。中有關於烟草之品。陳設中國之雅片煙具。水煙筒。一見令人難堪。出國以後。在公衆所見中國之物。良者大都戰敗爲人所掠。劣者即烟具之類。何時與國民共雪此恥哉。此外略觀其化學電工各院。其餘各院。則以時屆午餐。未往觀。

次參觀祖立希大學。其校長候至十二時。因余在高等雜藝專門學校參觀未畢。不能如期往。及往時。由其祕書長招待。及引導參觀。此校地質學動物學之陳列所。爲歐洲各

國冠。當此校行落成禮時。爲歐戰前二日。各國大學均有代表赴會。尙未離瑞。戰事已生。其祕書長述此事時。大有友敵瞬息之慨。其講堂共有六七十。有十二講堂。具電影照射燈。他處所無。學生有溫習室十餘。附設小圖書室。此校內部之組織。與日內瓦大學。大同小異。校中最高機關爲董事七人。州長其一。卽爲會長。其餘六人。由州民選舉。此會有升降大學職員。修改大學章程之權。此外有教授會。由教授所組織。每年集會二次。每二年選舉校長及院長等一次。凡欲爲教授者。有相當學業。得自荐於教授會。由會通過。交董事會判定。已判定後。雖因未有額位。未得卽任教授。而大學亦與以津貼。此種支出。每年達二十七萬佛郎。亦足見其厚待教授。其分科爲六。亦與日內瓦同。學生人數一千五百。四分之三爲瑞士人。餘爲外國人。其各科學生。以法科爲最多。有五百二十人。文科二百六十人。醫科三十餘人。理科二百十人。餘爲他科。其女生占二成。余詢其何以比男生相差甚遠。彼甚訝。以爲歐洲男女生之比例。實無如其高云。

瑞士教育。州自爲政。中央無特設管理機關。其特別者。則一管理高等專門之董事會

。會亦七人所組。祖立希除大學外。有一平民教育董事會。所謂平民教育者。實合小學中學而言。亦七人組織。其會長卽州長。計祖立希州教育費。現共二千七百五十七萬七千餘佛郎。大學教育佔四百九十二萬。平民教育佔一千六百一十餘萬。退業教授津貼一百萬。津貼教授俸屬費（教授逝世後遺族）五百四十餘萬。此州居民共二十二萬。負擔教育費如此之多。但每提出新教育費。（如建築費）須人民通過。人民自來並無否決者。足見其人民程度之高。與其能力之大。州內共有大規模之小學二十餘所。費悉公出。其強迫教育。雖止十三歲。然學童無不讀滿其小學六年。高小三年。共受九年教育者。

又祕書長引至天台觀時。指大學以北數百座房屋言曰。此爲學校區。區內悉屬高等專門及大學有關係之房屋。

參觀畢。驅車赴意大利之米蘭 Milan。車向南行。初尙見湖及平原。繼則入山谷中。經過許多山洞。但見阿爾卑斯之萬壘雪峯。由遠而近。每過一山洞。卽有一谷。大者且有村落。始由右山脚行。忽轉而左。然無論如何轉山過洞。山谷開處。必兩山夾河而流。此河之水。均來自雪峯。大都積雪所化。或曲折而來。或高懸而下。最奇者。峯下之

水。與峯上之雪同白。蓋河皆亂石。水流奔激。悉成浪花。與積雪輝映也。行行復行行。過阿爾卑斯山主山脚大山洞矣。此洞長十五啓羅米突。歷十五分鐘始過畢。據管車者云。歐洲最長之山洞也。瑞士至意大利。有二大山洞。此其一。前次登此山之高峯。今日過此山之隧道。升天入地。任意遨遊。其樂無比。向之水向北流者。至此轉而南流。而浪花似雪。則仍如故。如是再過幾多山洞山谷。回望阿爾卑斯之無數雪峯。已入雲霄。當前之山已變爲青。將至意境。見美麗之湖。繁盛之市。無何。達意大利境。車則仍舊。管車者悉換意人。照例驗護照而行。至夜十時許。而米蘭至矣。因貪看山。暈車不息。到旅館精神不支。腹復飢甚。乃飲牛奶一盃而寢。

意大利 摩納哥

五日懨懨欲睡。訂定遊車。亦辭退。至晚勉強坐汽車遊行。未半小時。不支而回。是夜錫三以養藥爲名。得館主許可。養粥與食。食後精神頗振。蓋昨日已飢。今日鎮日因厭西餐之故。復厭意大利人西餐每加以酸。全未進餐。祇飲牛奶。遂至飢病交加。飢療而病亦減也。

六日下午坐公共遊車遊其大教堂。此教堂偉麗推世界第三。羅馬 Rome 第一。倫敦 London 第二也。建於西歷一三八六年。悉用大理石築成。前有一百三十五高峯。其峯勢恍若阿爾卑斯山。峯中具二千石像。皆精妙之刻。堂內有大石柱五十二。門則用古銅

鑄成。此堂可容五萬人。其大可知。一八一〇年此教堂曾贈王冠與拿破崙一世。其後尚遊二教堂一墓地。墓地建築至美。雕刻至精。種種色色。無一相同。教堂墓地本最厭遊者。然教堂爲意大利文明美術所繫。墓地係此地雕刻精品。遊米蘭若不觀二者。別無可觀也。回時游其新式街道。店鋪建築。高低割一。街頂蓋光瓦。街下鋪花石。恍如長廊。祇許人行。不許驅車。

米蘭在意大利北方。爲意國第二都會。商業最盛。絲業尤稱於世。但道路已多不寬。復不整潔。公園亦不大。路樹尤少。此地在意大利以富名。故貧狀處處表現。最奇之事。則有中國前清沿至今之領事。其人則意大利人。復路遇一賣珠串之中國人。到瑞士意大利後。遇見中國人。此爲第一次。與語不通。後知係浙江青田人。數萬里來此謀生。只知幾意幣。他無一語通者。聞常遭其警察拘拿。亦不能一語剖白。法國亦有之。殊可憐也。米蘭於今日意大利最有名者。則現時棒喝團 *Fasciste* 首領慕沙里尼 *Mussolini* 爲米蘭人。棒喝團之發源亦在米蘭。一九一九年三月棒喝團在米蘭發起。與社會黨共產黨對抗。時僅有一千人許。迨一九二二年十一月開第一次大會時。參加團體。達二千二百。

黨員總數約三十二萬。造成今日之意大利局面。現今米蘭猶爲棒噶團要地。主其政者係一機器工人。與慕沙里尼最密切者。前數日意王到米蘭美術展覽會。有人施放炸彈。棒噶團立召其地全體黨員開露天大會。申示黨員一致。以鎮壓反動派。足見其氣魄。故到意大利後。黨之作用。完全表見。其掛徽章之黨員。於車到時。似各有所司。黑衣軍隨地可見。在各處引導觀者。亦爲黨員。想亦寓偵探之意。是日曾向引觀之棒噶團黨員。問其此處尙有社會黨共產黨否。彼以手作勢答曰。有之卽拿。今無矣。

七日精神仍不佳。但以米蘭非休息地。卽南赴海邊熱那亞 Genova or Chiavari。此地係意國西北方要港。航線以此起點。航艇密織海面。是日適耶穌典禮之日。滿街塞道之遊人。教堂尤甚。是日草草乘馬車遊行。見道路皆係舊石路。一如中國之舊街。路樹多半無之。有者亦參差不一。多在枯焦。余無人工。園林甚多。屋雖高大。塵垢布滿窗戶。經哥倫布 Christophe Colombo 生長處。有一斷柱。中刻字。尙有斷柱十餘。參觀二教堂。皆甚秀麗。

八日參觀其舊王宮。非其時。不能入。參觀其美術館。石刻繪畫極少。然甚精。遊其

墓地。數分鐘即出。車夫訝曰。此處最少須四十分鐘。方能觀完。何其速也。足見其雕刻之多而精。孰知東方人之不欲以哀痛地作賞玩場哉。登熱那亞之麗吉巴山。四望附近之山。悉由此分派。南臨湖。東西北皆山。房屋則環海遞進。各山頂皆有炮台。尤足爲軍事重地。是日途遇一黑衣童子軍。詢其操時有若干人。幾歲須加入。悉以不知爲答。殆守祕密耶。

九日黃君履健由米蘭來訪。履健係廣東大學海外部學生。在米蘭學絲者。意國北部之留學者。吾國止履健一人。下午乃乘車遊海旁。一時有奇而返。是日并觀哥命布石像。及在海旁遊哥命布園。園甚小。林樹尤無整理。處處皆表現意國窮狀。意國因人多地少。財窮。遂多移民他國。美國限制移民。在華盛頓時。其大學主任云。美國移民案。多半爲意大利。美國人談及意大利人。卽謂爲貪詐及不潔。法國亦有同樣壓迫意大利人者。因意大利人入國。卽貶價求工。雖苦工亦樂爲。稍有入息。卽當地娶婦。又不入人國籍。有罪卽逃回本國云。美法各國。常爲是言。聞意當局。近更注重移民法。吾國華僑遍五洲。多爲人歡迎。而國家任其自生自滅。以觀意國。應爲頹顏。

八日乘車向世界最小之摩納哥國 Monaco 及法國南部游矣。

十日由熱那亞乘火車來法國南部。初原定由熱那亞直至羅馬等處。今折至此者。因精神不佳。法國南部氣候宜人也。車沿海西行。所過山洞甚多。蓋此間山脈多至海始盡。沿途多有村莊市鎮。種植以葡萄橄欖爲大宗。車中頗爲蒼蠅所擾。出國以來。蚊子似全未見。蒼蠅間或見之。並未被擾。惟米蘭至熱那亞。及此次所乘之車。蒼蠅乃大示其威。令人無刻可寧。因思欲社會安寧。盜賊固應肅清。然若不將蠅蚊肅清。仍未能達於真正安寧。因其擾人秩序。吸人膏血。無孔不入。無刻或停。較之盜賊尤不勝防也。至聖里摩 San Remo 換汽車入法境。車中仍不少蒼蠅。法意交界處。各在海邊石巖。路旁設關。意國出境。自無問題。法國入境。亦一看護照卽了。入法境不久。神氣似爲清爽。始知氣候使然。同一海邊。所差不過數十里。氣候判若天淵。遂使昏爽有間。奇哉。其時車中蒼蠅。亦不知遁往何去。則尤奇矣。有一事須注意者。則意境內處處壁上印慕沙里尼之像。火車中另有黑衣軍查票。此則棒喝團之宣傳及偵探方法也。再過數村市。而世界最小之摩納哥國至矣。



摩納哥大賭館

摩納哥在法國東南。濱地中海 *Mer Méditerranée*。面積八十七方里。人口二十萬三千。居民以賭爲業。歐洲賭客悉集於此。國庫收入亦悉賴賭餉。原定至尼西之 *Nice*。經此急欲見其大賭館。乃停車。須購十法郎之票。方能入內。并須檢護照。謂係入國之例。意其爲備賭博盈輸之調查乎。其賭館之堂皇。則前面花園。林深花靄。四通八達。交通便利。背臨大海。一望汪洋。築亭築場其邊。以音樂供客之飲茶酒。司門者。服輝煌之制服。入內有大休息室。再左入則賭室在矣。室中大賭檯二三十。據以賭者。每處總有百人。男也女也。

老也少也。或立或坐。或喜或歎。擠滿其中。而賭國之怪狀。乃悉入眼中。前至米市卡利。欲至賭嫖飲館一觀。未果。至里昂至其某山大賭館。則未開場。祇見其賭場宏偉。設備之華麗。及所據之山之幽雅而已。然較之摩納哥賭館。則又萬萬不如矣。賭場側有大戲院。樓上另有甚大之寫信室。閱報室。因將入夜。遂由原車赴尼西。

尼西爲歐美人避寒地。四月以前。旅館公衆遊客車等較夏天相差數倍。遊一戲園。築在海面。左有賭博場。右有跳舞場。戲場休息。卽賭博場跳舞場開始。巴黎無此現狀也。乘馬車遊街市一部。甚寬大清潔。至夜十一時。乃歸旅館就寢。此處旅館有臨海者。有據山者。余樂觀海。故在海旁旅館。擇其高樓面海之房而住。一望海天無際。至爲快意。而天風送海濤。尤覺可滌煩襟。孰知是夜海風頗大。初則貪其激響之悅耳。繼乃聲喧不息。無從入寐。此次旅行。車過阿爾卑斯山。因貪看山而暈車。此次因貪聽濤而失眠。皆可記之事也。

十一日晨。依床觀海。初觀波平作深藍色。無何遠遠似有白波冉冉而來。愈來愈近。則繼來者愈多。激岸之浪。亦漸漸愈大。浪花起處。水色純白。白浪下處。水色變碧。

浪漸大而碧色亦漸擴。近浪處成淺碧色。愈遠則色愈深。直至與藍色相合爲止。是日風愈來愈大。至出門時。眼所望多半作碧色矣。是日乘公衆遊客車。遊坎市 Cannes。沿海西行。至一處海邊。車停。御者言曰。此處風景絕佳。盡各攝影。但見海水變環。對面海岸。卽爲尼西。人家繁密。人家之後爲青山。青山之後爲雪山。雪山之後爲白雲。儼然圖畫也。至坎市後。另雇車遊行其市。市民有五萬。法國南方避寒之一所也。街路房屋均至清潔。至其中學。入內參觀。此校曾爲華法教育會收中國學生處。錫三亦曾肄業於此。故其校長一見。甚親切。引至其住室。與其夫人相晤。其夫人更諸方相留。絮絮不休。直至車返時。始辭別而行。轉致校內一切情形。無從詢問。祇參觀其所寄宿舍而已。據其校長云華法教育會因送學生事。尙欠伊四千法郎。今伊年老。明年休退。請余爲代設法。促華法教育會償清。免其虧累。此賬內容。一時未悉。但以前留法勤工儉學生及半官費學生。因主持者最初計算不週。以後復無法善後。遂使各處欠人學費。而學生中亦不少因費缺致死者。此事在國時。已飽有所聞。到法後聞之尤痛心。誠願以後主持者。加以慎重爲要。

十二日乘汽車遊拒拉士 Cresto。初由山谷行。風爲兩山所阻頗熱。嗣漸行漸遠。過許多山谷。而至山腰。復經許多山腰。將至山頂。始所行者爲土山。故林密草青。人家散處。至此則一望石山。雖間有草木。亦從石隙生出。並不高茂。經過二三石巖。中經一石洞。石洞之旁有數十丈之小瀑布。再經多少石山。到一處。又有瀑布一處。瀑布激成之石洞。有二十餘尺。水亦頗曲折。雜以大石野花雜樹。頗有幽趣。其後復由之字形之路。曲折繞至山頂。中有人家十數。皆石屋。此等人家。一切應感不便。復聞一老婦呼一坐路旁刺繡之妙齡女子曰。若不歸家看守。則影相鏡被竊我不管。該女子含笑。匆匆起去。豈此絕頂之屋。尙有梁上君子耶。而法國女子之習性。亦可於此覘之。其時下望。小山如土堆。小山上之人家疏落點綴有致。向遠南望。則見大海。而海風吹來。隱隱猶聞濤聲。此後車雖復西行。然已向下。經過數山後。乃豁然開朗。見無數人家。依山而住。復有電車行於其間。蓋拒拉士至矣。拒拉士係法國製花露水之地。故其地隨處種花。紅白爭開。芬芳撲鼻。殊雅境也。此間人家大都以花爲生。採花多用女子。早四時至八時工作。過此花少香也。參觀其製造花露水廠一。則百年前所創設者。同時車經別

路。不再行山。初經山邊花田。繼經松林。嗣則村落。至沿海旁行。再過數市。卽回尼西矣。

十三日乘汽車遊摩納哥國。因前日經過。只觀其賭場。他未及觀。車東行約一時而至。先參觀其王宮。其偉大萬不如其賭館。門前只立持槍者一人。與賭館門前司事者十餘人不同。以二佛郎購票入內。有制服引導者一人。入門天井皆細石亂堆。行其中。聲響甚大。殆亦守備之法乎。有樓房數十間。其左云爲王所住。靜若無人。其右則許參觀。入廊。卽見中國大花瓶四。以次參觀其各廳室。皆華美可愛。壁懸其王家之繪像外。并懸法國路易十三等之像。中有議事廳一。則爲王及其閣員議事之地。據云國有政事。由王及閣員二十四人議之。無國會。有衛兵九十。警察一百五十。并有美術專門學校一所。其中座爲教堂。王所祈禱處。閣員亦得參與。次參觀其水產博物館。此館有名於世。地之下層。爲水族之生者。其地上及樓。則陳列各水族標本。及漁具。聞其今王之父。(卽前王)係水產專家云。此後乘汽車。不半小時遊盡其全國。其國依山而成。面臨地中海。除半山以上皆不能建築外。覺無寸地不加人工。其屋宇密列。有若石榴子。道

路良好。地方清潔。賭爲巨禍。乃造福于此二萬餘人。覺入其國。似無窮民。亦世界之最奇特者。傍晚乃回尼西。

十四日由尼西乘公共遊客汽車。回意大利熱那亞。去時由海東行。今乃越山而返。歐人供遊客。總使人處處新奇。故遊一地。往往來去不同其路。此次越山之路。開闢者爲拿破侖。其路甚佳。法國南方之路。可與美國比。優於法國北方實多。法國凡旅館筵席及買賣有捐固矣。而尼西等處。每客住旅館。須納市政稅一佛郎。此其路政較良之故歟。車逐漸由下而上後幾大半在山頂行駛。左山右海。頗極大觀。導者每至有古蹟勝事則高言告衆。若者爲某山。若者爲某市。若者爲幾年前物。若者爲某世紀物。直至將近意境之孟東 Menton。車始復至平地。沿海而行。入意境後。仍至聖里摩。改乘火車。聖里摩意人日夕經營。欲與法之尼西爭衡者。現相差尙甚遠。至六時有奇。抵熱那亞。本日在頭等車中。遇一棒喝團員。偕其父與妻同行。其父與妻亦團員也。彼此相詢後。暢談其團中情形。據云。伊爲住法南部尼西之黨員。在尼西開設大餐館者。歐洲各國隨處皆有該黨之組織。法國南方尤多。因意大利反對該黨之人。逃在法者。共有百餘萬。爲

不利棒喝團之宣傳。故特設黨部以對付之。尼西方面。有黨員四百五十餘人。中有外國人。每年集大會二次。平時不開會議。惟黨員得任意聚集。如俱樂部之類。以交換感情。每星期復有演講會一次。演講以黨之歷史及目的爲主要。間亦有演講科學及世界史者。演講員限於黨員。演講地在領事館。至黨費則每年共十二意幣。愿多捐者聽。復出其黨證相示。面爲黨徽。內爲像片及籍貫等。背有章程數條。專爲海外黨員設者。(一)黨員應守規章。否則逐出。(二)黨員在某國時。應守某國法律。(三)黨員不得參與所在國之政治。及其政治談論。(四)黨員在某國貿易或求學。應盡力前進。(五)黨員有互助之義務。復暢言一九一九年至二十年。意大利爲共產黨搗亂。致國不成國。民不聊生。幸棒喝團出而主政。始行挽救。彼復縷述其於一九二一年時。在某地與共產黨作戰及受傷情形。彼復曰。現在意大利之好人。皆已入棒喝團。談及意大利生活程度之高。答曰。並不高。若各種附加稅等。則人民爲國出力理應然者。

十五日參觀熱那亞大學。由其校長招待。此校有理科。法科。經濟學科。藥科。醫科等。醫科復分內外二科。此外尙有化學學院。植物學院。學生共有一千四百人。內有外

國學生一百五十人。

教授有百人。每有薪金多者爲四萬意幣。

全年經費。除教授薪金完全爲政府直接給與不計外。其餘各費共三百萬意幣。其中一百八十萬爲政府撥付。餘一百二十萬爲學生學費。暨地方資助。


詢其校長以教育方針。及棒喝圍下之教育。據云。教育方針在養成愛國之國民。悻此旨之學生務去。取純不取多。至棒喝圍執政之後。對於教育。極力注意。計意國有十大學。務於三年之內。俱使其成爲最新及規模極大之學校。故各大學。俱有大宗款項。爲建新校或實驗室。以熱那亞大學論。目前政府撥一千六百萬意幣。於熱那亞城外。另建大校舍。計一九二七年。全國預算爲一八，三五三，三〇三，六五五意幣。教育費則爲一，三一八，九六四，八三五意幣。此項教育費。與全國建設費同。近年國家各費均減。惟教育費獨增。本年增加一萬一千萬意幣。故意國每年預算除國債外。軍費爲最多。次則教育費與建設費。大學教育權獨立。校長由政府派。得以自由改訂章程。及聘任教授。至此復重申曰。教育權雖云獨立。但政府所派之校長。悉爲最親切之黨員。亦即

無不爲有益於黨國之教育。此十大學爲國立。米蘭尚有完全黨立之大學。各科均備。且極良。費出地方。不出國家。米蘭地方。完全爲棒喝團。卽謂出之自黨員可也。本年熱那亞大學。派一物理教授往瑞士。一化學教授往法國。一醫學教授往英國。另派學生往歐美各國。歸來亦無非爲黨國。至中學及小學各有負責人。其教科書。則悉由政府編制。其再三言者。則云吾輩黨員。爲黨做一事。卽爲黨盡一分力。固不在多言也。

其接待室中懸慕沙里尼像。兩旁則爲意王像。至其校長接待及談話。均甚親切誠懇。正在放假試驗時期。對於考試甚爲注重也。

十六日早到羅馬。蓋昨夜坐臥車來也。途中均在睡中。無可述。但車似頗震動耳。到後。稍事休息。乃乘汽車馬車電車及步行。漫游全市一週。聞教堂多至六百餘。大而且古之建築物甚多。殘廢之水道。城樓。地道。尤不少。隨處均見噴池。石像。銅像。埃及尖塔。道路寬大。但築路多半用石塊。較中國舊石路尤不整。路樹尙少。塵土甚多。公園雖有。都不大。草木亦凌亂。惟公園中。甚多紀念石像。今日乘車。到處車夫皆欲以詐取財。出國以來。此爲創見。人言意大利人多貪詐。至羅馬乃始驗。

十七日乘公共遊客車。至郊外遊。初至羅馬皇帝海特林 Hadrian 舊皇宮。此宮之建。在二世紀。其周有十二啓羅米突。今雖斷壁頽垣。然若者爲戲院。若者爲水池。若者爲廳。爲房。爲浴室。爲廚房。爲長廊。爲隧道。乃一一具在。其工程之堅實。可想而知。至結構之奇巧。規模之偉大。雕刻之精美。陳設之華麗。尤可於牆壁。柱礎。石塊。地磚中見之。聞歐美博物院。幾無不有其品物。其名貴可知。步行觀其遺址。撫其殘缺。歷二小時。不過涉其大略。復乘車至塞平山 *Spole*。觀瀑布。瀑布有四五。其大者闊不過二丈。高有數十丈。此瀑布並非天然。乃用管引溪流而成者。午餐於一旅館之葡萄架下。即可憑欄而觀此瀑布。此旅館甚著名。各國元首至此視瀑布。均就餐焉。每一元首至。彼旅館爲立一石。今有十餘石矣。餐後遠別路而回。參觀與太子別第。此第原爲一教主所創。歷經易主。後爲與太子妃之物。而爲與太子別第。歐戰之生。由於此與太子被刺。意大利加入協約國後。以敵產收沒之。其室依山而成。中藏古物。室外爲園。甚多噴水池。式亦至多。園林亦頗密茂。大有法國凡爾賽宮之風味。至晚回羅馬。晚餐於一著名麵店。此店亦有二國君主曾就食者。其店主因此獲獎。是夜其店主因遠客之故。



聖 彼 得 教 堂 之 聖 馬 路


。親來調味。至爲有神。食後并索題其冊。是日進餐之處。均有各國元首關係。再述所住之旅館。以足其三。善所住之旅館。名曰太后旅館。此名之來。則因旅館對門王太后之偉大別宮。乃王太后不願住其宮。竟在旅館賃一室而居。去年始死。故旅館名焉。亦一奇也。

十八日遊世界最大之聖彼得教堂Saint Pierre。門前一大圓形長廊。中有無數石柱。上有無數石像。據云爲羅馬舊戲院遺址。中爲埃及尖塔。兩旁爲噴水池。則云在後建者。教堂之大。可容八萬人。其華美亦至無倫。單就其壁上之宗

教歷史言之。維妙維肖。無論矣。却非用筆所畫。乃用花石砌成。但非有人預告。則竟至不辨。神化可知。聞其建築之材料。悉取之門前之舊戲院。及羅馬皇帝海特林別宮等。至羅馬有一事最堪興感者。則羅馬皇時代所遺之建築物。無不偉大異常。其牆壁尤厚。但此厚牆壁。悉有整齊之釘孔。蓋其鏤壁之良好花鋼石。悉爲教皇取去。別建宮廟也。噫。羅馬皇帝以力取世界之物。聚於羅馬。基督教皇乃以術取羅馬之物。聚於宮廟。螳螂捕蟬。黃雀在後。特不知挾彈者爲誰耳。

聖彼得之左爲教皇 Vatican 宮。其博物院有石刻。有織品。有畫品。無物不精美。實歎得未曾有。其圖書館共有二百萬冊。有一部分因遊客常欲竊取以爲紀念。遂行封閉。內容莫悉。其未封者。則琳琅滿目。向所未見。并有世界最大之書。及世界最小之書各一冊存焉。并游教皇宮。觀其砌石畫品。用購一小幅。以爲紀念。本擬一觀教皇。聞觀教皇者。其至敬之禮。須吻其足趾。乃謝不敏。

游圓劇 Circus 場。此爲羅馬人游戲及賽會所。其中有力士與力士之鬥。力士與猛獸之鬥。猛獸與猛獸之鬥。此外尚有水戰。羅馬投基督教徒與獅子食。亦在此場。此場可



羅馬之古劇場

容八萬觀客。分八十門。出時此八萬觀客。須於一刻鐘出盡。其建築一層高於一層。最高者離門場有一百六十尺。地下之建築。爲養獸及力士出入處。相門處。亦奇妙異常。於以佩服羅馬人建築奇才。目今地下有建築。空中有建築。當然科學發達。實則羅馬時。水道建於空中。地下之建築物。更不知凡幾。以視今日應誇先進。此場後竟爲羅馬普通人建築取材之地。經過若干時。國家始禁止。至今尚依然兀峙。保存其偉大之舊物。真偉哉。

此外參觀聖恩劇路。此爲海特林陵寢

之殘部。觀其上爲堡壘。其下爲一小博物院。並觀教堂二處。皆精美偉大。向所罕見。十九日參觀一教堂。其高大精美。自不待言。但此教堂之舊規。係羅馬浴室二十分之一。其浴室之大觀可想見。次參觀一國家博物院。亦浴室之一部。其石刻像半爲浴室之物。多狀浴室情況。其他各品。亦悉精美。另有一院。則藏古墓碑者。於人名之側刻器物。一望而知其人生時或賣酒或泥工。是可省墓誌之撰。參觀偉人廟。此建築完全舊羅馬物之保留者。其頂圓。四壁無窗。圓頂中央開一圓窗。直徑有二十八尺。全室光皆布滿。初爲羅馬諸神之廟。繼爲基督教堂。意大利王亦有葬此者。參觀教皇皇子之宮。皇無子。兄弟之子也。雕刻油漆棹椅物具。皆貴不可言。歐戰前教皇之子。曾招待德皇子於此。德皇子曰。異日教皇皇子駕臨。德國實無此良好居處招待。不可一世之德皇子。尙爲嚇倒。他可知矣。參觀動物園。此園有名於世。其特異之點。則虎豹熊獅之類。不囚以鐵籠。各鑿石山。後有高壁。前有深澗。遂使此等野獸。如在深山大澤中。益顯精神。其品類則黑豹。木人。皆少見者。尙觀教堂二處。皆美大之至。意大利地極塵囂。但一至教堂。則纖塵不染。萬籟無聲。眞別有天地。歷觀羅馬建築物。水道。隧道。城

垣。雖工程偉大。吾國長城運河。尙能過之。其宮殿則秦漢亦必不如。不過彼尙存故物。我祇有空文。惟若干萬人之公衆場所。如劇場浴場之類。則吾國竟無從覓得矣。羅馬當年之雄。二千年後。徘徊其遺址。猶令人想像得之。

二十日參觀羅馬大學。其校長 Prof. Federico Millosovich 及東方學院一教授華嘉 Va-
 § 同來招待。此大學創立四百餘年。有四科。曰法科。曰文科。曰醫科。曰實科。此外尙有附設學院。此舊校。除辦公室外。爲法文兩科校地。至醫實兩科。則創新校於羅馬郊外。據其校長云。羅馬大學以醫實兩科爲最著名。醫科有各種醫室。實科則物理化學實驗。尤特新也。

學生有五千人。女生約十分之一。多學文科。至醫科則幾無女生。外國學生甚少。所
 有者亦來自東歐。以巴爾幹半島諸國爲多。亞洲則僅印度學生二人。其校長云。以羅馬
 大學與巴黎大學並論。本國學生實相等。惟其外國學生幾倍之。所以巴黎大學表面盛於
 羅馬大學。而法國文言之廣及他國。亦由於此。故羅馬大學。現極歡迎外國學生。數年
 前有外國學生免費之舉。今雖因乏經費。亦祇收半費。用意可知。并申言歡迎中國遺派

學生前來。溝通文化。并聯絡中意感情。對於退還庚子賠款。爲教育經費事。彼年來頗爲出力。極望吾政府正式派員交涉。彼當從中贊助。言時其意甚懇切。

羅馬大學經費。一九二六年至一九二七年。收入爲一千六百四十八萬七千七百餘意幣。支出爲一千五百四十三萬八千四百餘意幣。有餘之款。多半撥爲該校醫科醫室之用。

羅馬大學。附設一東方學院。該院有教授六人。出有中意文化研究報。中有中文鉛字。詰何來。則云自鑄。該報出版。已彙有十餘大集。其教授極望中國學校時時予以交換。現意政府出版世界大地圖。交其教授華嘉審查中國之部。此外尙欲出一超過英國所有之世界百科辭典。共三十二大部。關於中國之部。交該院審校。其教授殷殷請爲之助。

至意大利學制。幼稚園一年至二年。小學五年至六年。小學畢業後不進中學者。可進高小二年。中學分爲二級。初中五年。高中三年。大學則法科文科四年。實科四年至五年。惟醫科則六年。強迫教育至十三歲。卽幼稚園小學及高小也。

全國中學畢業。得進大學者。不過五分之一。至學生則多喜得中學文憑。因可收中等教育之効。且中學有拉丁文及英法德各文。意大利人以能通上項文字。爲有教育之人。

人多重之也。

意大利全國教育之統計。

學生人數。

幼稚園四十七萬三千六百五十二人。

小學三百二十萬五千四百二十人。

初中六萬九千一百七十五人。

高中二萬零二百六十六人。

中學專科六千三百二十九人。

中學工藝四萬五千二百十八人。(此項學校有航業農業礦業商業工業美術音樂各種。航

業有學生二千三百四十一人。農業有三百八十八人。礦業有一百〇二人。商業有一千

五百七十五人。工業有一千九百九十一人。音樂有六千四百五十三人。美術有一千四

百三十一人)

大學與高等專門之學生統計。

國立大學十校。共有二萬九千八百六十人

私立大學十校。(如黨辦教會辦者。共有一千零三十六人)

各種專門七千三百六十一人。

商業高等專門六千三百二十三人。

年齡與識字之統計。

六歲至十二歲。男百分之七十二。女百分之七一。

十五歲至二十一歲。男百分之八二。女百分之八一。

二十五歲至三十歲。男百分之八四。女百分之七七。

五十歲至六十歲。男百分之六八。女百分之五八。

六十歲以上男略過半。女小於半。

意大利教育現狀。當可於上表觀察。至其中學多係國立。間有私立。已日形減少。中學以下則地方自辦。但地方貧者。政府助之。或竟由政府辦理。卒之富裕地方。如北蒙省(現意大利王出生地)受教育者。男達百分之九十四。女達百分之九十二。如西西里

Scilli。沙里昂。男女之受教育得半數。故政府現正思統由國家辦理。俾能受同一教育云。是或兼有黨之作用乎。

至教員薪金。小學每年多者八千意幣。中學每年多者二萬意幣。大學每年多者四萬意幣。

至軍事教育。另有陸軍大學等。但陸軍大學學生。可至羅馬大學聽講。羅馬大學亦有軍事教育一種。

參觀其黨務學校。係由羅馬大學校長代約。并由東方學院教授偕往。其校長因赴國務會議。特留其祕書相候。預出書籍相贈。詢其黨中情形。據云現棒喝團除舊黨員外。不收二十歲以上之黨員。因二十歲以上在當時不進棒喝團者。即非反對黨。亦屬不贊成棒喝團之人。收之適爲內部之讎。故絕對不收。言時似甚決絕。至二十歲以下者。自小學即加以訓練。至十八歲加以考驗。倘其對於棒喝團忠實者。即收爲黨員。計現時收十八歲考驗後所得之黨員。已有一百萬以上。最近有十萬預備考驗者。決定收者已有五萬。至訓練方法。除使其愛國。及明瞭意大利非棒喝團不能振興外。即注重軍事教育。言至

此時。復申言曰。現在除實力外。言不及其他。現在軍隊中之軍官。悉爲棒喝團員。詢其農工運動情形。則云現意大利無他黨。棒喝團決定辦法後。卽向農工及職業團體組織使其受棒喝團指揮。明年選舉國會。卽將由職業選舉矣。詢其黨務學校內容。則云凡黨員均可報告入校訓練。訓練後卽派至各處服務。無定額亦無一定畢業期也。最後言彼於國民黨甚明瞭。以後總望兩黨能益親切。使二國均受利益。至入夜始告別而行。

棒喝團政府下之官吏議員。雖未標明非黨員不許任選。實則非黨員實際不能任舉。現時之國會。係由各黨競選者。今則非棒喝團不能立足。他可知矣。此節熱那亞大學校長。曾明白相告者。至受軍事訓練後之團員。負黨中軍事之責。卽在平時。亦得服武裝。帶武器。除在軍隊外。政府多授以偵察之職。火車及稅關尤多。凡團員國家未與職務者。得自營生。惟政府得日津貼數意幣。以示優異。據前日軍中所遇之棒喝團員云。團員實際均有事。無事者。可向團中報名代覓。又云團員除此種權利外。尙有不受警察時時詢查之利。因意大利盤查甚嚴。非棒喝團之家。警察每數日卽詢查一次。防反動派也。故現在意大利所住之人。無一人不明瞭其來歷。及情狀。反動派再無所容足云。

至於意大利白樺囑主政後。則異口同聲。均云日有進步。黨事悉由慕沙里尼。及其重要黨員主持。其他黨員祇執行。各處機關。樺囑國之徽與意王之徽同列。惟教堂尙未有樺囑國徽耳。中國古云。天無二日。民無二王。惟於羅馬不適用。因羅馬爲教皇領地。同時意大利王亦未忘情。直至歐戰發生。意大利在羅馬發表對奧宣戰。明白表示羅馬爲意大利都城。各國在羅馬。有二公使。一爲教皇之公使。二爲意大利之公使。至羅馬教皇。自意大利統一後。卽不出皇宮外。恨失去其統治權也。


二十日在那不勒斯 Naples。因昨夜由羅馬來也。那不勒斯位於羅馬東南。爲意國第一大都會。人口有九十餘萬。地瀕海灣。其海灣卽名那不勒斯灣。房屋由海灣起建。至於山坡。故逐層增高。至爲雄偉。其初爲希臘 Hellas on Greece 所有。故舊建築物。有希臘式。到此地卽令集視綫於地下城。及維蘇威 Vesuvius 火山。是日卽命駕先遊。

是早乘火車南行。至捧拜 Pompei 地下城。車經火山而過。初見濃煙火燄。陣陣噴發。結成雲氣者。俄則漸嗅硫磺味。車旁見巨石。及黑沙泥塊。導者云火山所噴之物也。車行一小時有奇。而地下城至矣。地下城何物。有不能不先說明者。此城創於希臘。盛



威 蘇 維

於羅馬。人口約有二萬之多。羅馬富人。因其濱海可避暑。多聚焉。原名捧拜城。西歷紀元七十九年。維蘇威火山爆發。此城與里扣倫尼城同被淪沒。竟至不辨。久而忘之。野草生其上焉。人亦遂建屋種植。另成一世界。十五世紀及十七世紀均有掘見。但無科學智識。取其珍品。遂亦置之。至十八世紀意政府始正式發掘。遂使二千餘年前之古城。重見天日。所以今日之地下城。已非在地下。乃在地上矣。其中街道。牆壁。石柱。地板。甚至壁上之畫與字。依然舊觀。考其原因。則此城被陷沒。係火山所噴之灰沙。逐漸降下。故人物雖被窒息掩沒。而建築等物。竟至不傷。即所掘得之人屍。亦皆完整。外包灰沙而已。




。此城共有八門。街道不廣。都用石鋪。牆皆用磚。悉如吾國。甚至鋪石築牆法亦同。惟劇場。浴室。運動場。噴水池。則甚壯麗。屋中地板。砌以花石。牆上多有壁畫。大屋多不建在大道傍。四週有廣場。廣場與街道復隔以小門。有時廣場與街道之門。不能直接。用小道以聯之。豈以

山
此示尊嚴耶。屋中多有蓄水池。街較兩旁之人行路爲低。數十步卽置二巨石於街中。不妨車馬之通過。人亦得行其上。殆當時未明水道。以此備

天雨時之蓄水及通行耶。屋之房不大。尤少窗。多有二層。其上層甚低。意似爲僕人所住。城中掘得之物。多藏於博物館。此城祇有一室。藏其小部用器。飾器。食品。玩品。金也。木也。泥

也。布也。麵包。蔬果。一一俱全。并有破埋之古屍十餘具。此城旅行。發見引導員慢客車。述之告旅行者之注意。當入室觀壁畫時。有三四室。引導員以其中有淫畫。囑女客勿進。此本正理。有一女客不悅。引導員乃竟不約齊而他行。余等詢之。答不要緊。意其爲當地熟人。後乃知其爲美國單行之女客。幸他幫有美國人。此女得約伴以歸。若我國人則余自離巴黎後。共見數人。旅行者竟未遇見。何從覓伴同歸。此次引客之公司。爲小公司。或者意大利人較不可靠。故有此怪事。然而險矣。至歐美後未嘗見轎。惟此域有轎備人坐遊。亦特見者。



一之圖城下地名亦城拜梯

歸途遊維蘇威火山。山下人家葡萄園甚多。乘電車而上。初則山菁林密。漸行漸見火山噴出之黑土焦塊。及至火山。則全山盡鬆動之焦泥硬塊。寸草不生。時見雨流之溜痕。至此乃換乘直上之電車。而登至一千三百米達之山頂矣。此山特高。形復有似日本之富士山。衆山皆俯伏其下。一路來時。見火燄濃烟。由此山噴出。以爲至山頂。則火山噴火處矣。孰知不然。步行十餘分鐘。則此山現一大圓口。圓口壁立巉巖。下面有圓形之地盤。此地盤焦黑。而現油質。隨處有裂痕。痕中卽有小煙冒出。地盤中央。有一圓錐形之孤峯。峯現深黑色。中夾深紅。或帶黃橙。則琉璃質也。峯頂一圓口。直徑約有半里。此方爲火山噴火處。濃煙滾滾。或白。或黃。或黑。或紫。時挾火燄直衝天空。更有沙石灰泥隨之而起。此山之上。固無時而不雲氣陰霾。在下望之。以爲雲氣飛騰。似甚舒徐。登此而觀。始知急劇萬分。變化倏忽。更時發劇聲。如風號。如雷鳴。如驚濤。如裂帛。使聞者駭怪不定。此火山自紀元七十九年爆發後。以後尚有九次之噴發。至千二百餘年始熄滅。至十八世紀又屢有噴發。一八七二年則噴發六七日之久。至最後之噴發。爲一九〇六年向那不勒城方面下沙雨十五日。但無傷死者。向後一城。則受噴

不慮及者有六七十人。傷者數百。居其傍者。固時時股癢在抱也。

此次車費每人需百意幣。政府抽其半。意大利稅重。可想而知。故在意大利游。預算竟超一倍。因其公共博物院等入遊亦須十餘意幣也。是日由羅馬所住之旅館。轉到博喝團黨部常務委員兼祕書長杜拉度 *Tirato* 約晤談函。此函署日爲十八日。郵局印爲二十日。而二十夜余離羅馬。未能接待。其黨局辦事亦如此遲滯耶。因不款再回羅馬。以函謝焉。

二十二日首參觀水族館。次參觀博物館。此館大半陳列地下城品物。色色均備。足證明二千年前希臘羅馬。其文明實與現今不甚差別。其銀行鐵櫃中存木券甚多。殆亦今之紙幣耶。有一室則專藏地下城所得雕塑繪畫之祕戲。亦博物院之創見者。後乘升降機至那不勒斯山頂。高約二三百米突。人家布滿。直至海旁。

此地人快活蠶懶。日夜街衢中。人極稠密。蓋除就寢外。食息皆在街衢海旁也。殆亦天氣暖。有以使然。

午後遊索華打 *Solfara* 舊火山。此山位於那不勒斯之北波爾里 *Pozzuoli* 城之旁。此

火山十一世紀噴發後。成一小平原。四圍噴成之山。草木早已生長。其火早經熄滅。尙有數窟熱氣蒸騰。水在中沸。所騰之氣。時挾黑泥。噴至四週。人立其上。稍久即熱。雷時時行動。地上有穴。卽有煙氣。至一小屋。則四圍熱氣騰發。不可一刻立。有一看管老者。竟在此四十五年。無可以名。應稱以仙。另有二築就地穴。人立則熱不可耐。人踞則熱中和。云備氣喘者。至此呼吸療養。是晚坐臥車。由那不勒斯經羅馬北行。至

佛羅稜薩 Florence。

二十三日游佛羅稜薩全城。此城一名花城。位於平原。高出海面五十米突。四周有小峯。列如屏障。山上多樹木。青葱可愛。爲美術淵藪。詩人但丁 Dante 尤名於世。意大利統一後。曾爲首都七年。初遊一洗禮堂。云係甚古之物。繼遊一教堂。其圓頂之畫。云極名貴。羅馬教堂倣此。而倫敦之教堂則倣羅馬云。壁有銅畫四幅。因日光反映。幾疑爲窗。奇品也。次觀鐘塔。乃用各色大理石分類築成。至華美。再次至街區。中有古殿。外多石像。其殿前一石。則爲塞凡納洛像。乃紀念大革命家大傳教師塞凡納洛者。後遊博物館。此館分二十三長廊。以陳列各品。其中美術至佳。有世界最貴最大美術館

之稱。因此地產生美術家甚多。其他美術家亦多集於此。爲中世紀美術集中地也。復登其上層。以覽全城。阿奴河直貫全城。更有六橋以通之。最著名之橋。爲雙橋 *Rialto* 橋。與曼旗橋。而雙橋橋爲詩人但丁與俾阿特立斯 *Dante Alighieri* 女士一遇成愛。雖未結婚。並爲敵黨。情終不渝。豔跡所在。人尤樂道之。至傍晚遊其大森林而歸。

二十四日上午休息。下午乘火車至威內薩 *Venezia ou Venise*。此城位於亞得利亞 *Adriatic* 海之威內薩灣。亦稱水城。車中所經各地。麥田皆熟。種植甚茂。意大利之農。其勤儉有似吾國。種植方法。亦多類焉。但近日利用水電。水旱不甚爲害。頗多種稻。故政府強人每星期食米一日。但意人不善爲米飯。多半生半熟而食。無怪乎人須強而後食也。意大利之火車亦多半改用電。其行較用煤者爲適。以力勻也。在意坐頭等車。無不人滿爲患。蓋棒喝團人多出其特證坐頭等也。此次在車。有一棒喝團員竟越位而坐。與一女人扳談。直至下車而止。使他客之位被占。立於其旁。尤爲罕見。

是日車行已熱。加以坐中人雜。尤不耐。車將到時。由鐵橋渡海。始至水城。舉目一望。神工鬼斧。竟有出人意料者。蓋屋皆矗起於海中。其大街小街。卽大河小河。無馬

無車。祇有船艇以爲交通。乃急雇艇。至旅館。曲折穿河而行。一日塵煩。至此盪洗。爲之大暢。所至旅館。已告人滿。姑將他客所定者讓住。然甚小。亦安居焉。是夜雇艇週遊。所有人家。電燈幾熄。岸上路燈亦稀。似讓此艇上如穗之燈光。蕩漾水上。增其搖曳之姿者。路上已無車聲馬聲。囂紛悉去。尤覺心與天月同清。所見岸上男女。均活潑潑地。豈境移人耶。噫。

此城可謂避秦桃源。亦可謂河伯新婦。何謂避秦桃源。因五百年前意大利北部。爲蠻人所侵。有一羣人避至泥洲上捕魚度日。久之水性以明。爲水手。爲商人。大獲其利。後竟操歐洲與東方之貿易。如是所得之財。將泥洲分個築成堅固地基。造華麗之居住於上。遂成今日之樂土。何謂河伯新婦。因此城之得爲世外桃源。咸歸功於亞得里亞海。其時此城之首領。爲威薩公。率其貴族。乘美麗之船。投寶貴之戒指於亞得里亞海。以此水城配與亞得里亞海爲婦。故當時水城。每年之熱鬧。無過於紀念是日之告海節。而水城亦有人稱爲亞得里亞女王者。

二十五日晨。醒後惟聞燕子呢喃。鐘聲縹緲。心神清快。早餐后遊其最壯麗之聖馬克



一之圖 (城水名亦) 城薩內利大意

Saint Marie 教堂。此教堂可謂財寶之大堆積。蓋由門拱至堂內之天版。皆為寶石砌成之畫。畫底完全金砂。即四壁之畫亦無不用寶石砌成。其地板則為無數着色之大理石。初入似甚暗。久之寶石金砂。耀其光彩。閃爍照人。此城無馬。祇教堂門首有石馬四。拿破崙一世取之而去。拿破崙一世敗。始珠還。此教堂門外一大廣場。日間逾千之白鴿來集。見人手握豆麥。則集人手中以食。最奇者則架上出賣之豆麥。彼固一粒不取。亦知人性哉。而余所云。禽鳥親人。於茲益足證明。至夜間則廣場有千百人飲咖啡。聽音樂於此。此城以玻璃織繡著。教堂側為古宮。

并曾爲此地參議院。其天版牆壁。良畫甚多。尙有武器陳列。另有監獄。則古時處政治犯處。完全不見天日。殿內有一門。上刻一孩。手執蘋果。相傳有公正人過此。則蘋果將擲下。導者云。此證明世間無公正人也。亦慨乎言之矣。復至一教堂。則有一美術家。葬其心於此。詢之明云。此美術家心乎宗教。故以心葬此。其手則藏美術館。以爲良美術之紀念。其身則葬於家。歸源也。至日內瓦時。曾歎盧梭著書成名。至死後不能安於土。今更歎此美術家之多事矣。傍晚至利它島 Lido 望海。蓋利它島長形。橫於海灣。實水城外障也。島以外海。島以內有稱爲湖焉者。

二十六日移居利它島。因水城旅館窄。而此島前海後湖。可收湖海之勝也。是日飲食休息於突出海中之遊息場。沿島海邊。皆水嬉人也。

初原定本日赴奧大利 Austria。乃無臥車。改至二十八日。心頗不快。

二十七日。是日得車公司答復。云二十八日仍無臥車。欲行不得。坐困水城。尙幸地方不惡。不至增其煩惱。而臥車之踴躍。想亦棒喝團多坐之故。此去與大利有十八小時。無臥車則太苦。不能不勉強候之。

是日正擬赴海上遊息場。而該場火起。急出旅館觀望。時遊人甚衆。浴者復多。孩啼女哭甚爲狼狽。而救火者却從容從事。卒燒去全座游息場。幸四旁有園林。延燒不廣。二十八日是日爲先嚴棄養三週年期。先嚴疾不能侍奉。沒不能視殮。葬不能躬視。今忽三年。猶在萬里外。每一念及。誠無以爲子。記之以誌哀痛。是日颶風。終日不息。二十九日回居水城。蓋昨夜知海風雖大。湖並無波。因回水城。果見船艇如恆。水波不興。而聖馬克教堂前之廣場。更千餘男女。飲咖啡。聽音樂。安知海上風波險惡耶。水城之可貴。乃如此。大戰前。德人來遊者最多。戰時德與艦在口外。竟不忍開砲。蓋愛而欲得之。不欲毀之也。尋命駕遊美術館。作品均佳。遊製玻璃公司。見其繡玻璃成絲以作器。燒玻璃如晉以繪物。皆初見者。觀織造學校。盡女子。或織或刺。皆製成以出售者。遊其醫院。甚大。是日遊皆徒步。意大利路不修。沙石礚礚。塵埃滾滾。惟水城則一律石街。其平如砥。衣白而出。不虞其化縑而入。其街已以河成。故除少數大道外。餘皆至小。蓋盡巷也。通兩岸復有橋。橋皆有拱。備下行船艇。此地人稱火船爲電車。小艇爲馬車。亦至特別。初聞固甚訝也。

三十日遊美術展覽會。會場設於森林中。除其本國作品外。另有英法德俄及捷克斯拉夫之專館。外國專館。純爲畫。其本國作品。雖有雕刻亦至少。畫之作品。完全新派。或兼做古。且入此館。幾忘在意大利觀美術。因意大利之畫。十而有九皆宗教畫。此則幾洗盡宗教氣味。此不特畫法改革。社會思想之改革。亦可於此覩之。畫中不少極端與原形歧異者。如人也。方其目。圓其身。一鼻幾等面。一頭幾等身。衣服悉如井田。手足悉如禽爪之類。當吾國提倡新詩時。有一友大喜來告曰。此後吾可爲詩翁矣。問何故。曰。吾向苦詩之格律聲韻。今新詩悉不問。祇標明是詩。隨意安上數字。祇成爲句。卽作一行。再加標點。詩翁成矣。若此友再見此畫。當必大喜曰。此後可爲美術家矣。問其故。當必曰。畫以不肖物爲高。祇橫直圓方。隨意着筆。標爲人則人。標爲犬則犬。美術家成矣。吾友聞此言。應相許曰。不啻若自其口出。

次登聖馬克塔。全城風景。瞭然在目。水城在海灣中。築鐵路通之。車行須十分鐘。其離岸之遠可知。此城已在海中。飲水來自二百餘啓羅米達。亦可謂大工程矣。但古代羅馬水道。至今法國里昂中法大學仍有其遺蹟。則意大利水道工程由來已久矣。遊其跨

大河美麗之橋。橋以石成。兩邊有店。頗似潮州湘子橋。其橋之長。遜湘子橋十倍。橋上之店。則較整齊。此橋未成以前。兩岸時有戰爭。故當時譏提議者。謂此橋若成。男子亦可三足。及橋成而爭亦息。至今橋旁一建築物。刻三足之男子。以爲紀念。

在利它遊息場遊時。其主人特來招待。云曾至中國。及其場被焚。次日遇於途。慰之。彼甚感。連日來偕游。本晚且直攜其妻與女同來。其女則學醫。明年可得博士。其子牙科畢業。現行醫。余以子女長。學業成。爲其慶。彼愀然曰。意大利子女。固不似中國。子女學成有職業。父母仍須靠自己謀生。子女固照例不養父母。一月半月。來見一面。已稱爲良子女矣。言下似甚羨中國家庭者。

奧大利

七月一日已得臥車。遂決離意大利而往奧大利國都維也納矣。在意大利盤桓幾二十日。全國祇見棒喝團之運用。亦惟見慕沙里尼之運用。名雖王國。王特慕沙里尼之工具而已。棒喝團本與宗教氣味不投。今和緩者。聞慕沙里尼欲并教皇而利用之耳。慕沙里尼亦怪物哉。其對外肆其縱橫。聯英吉利西班牙南斯拉夫希臘等。以對付土耳其。聯奧大利。法蘭西。冀遂其無厭之侵略。對內用其權勢壓抑一切。故側目者甚多。惟其黨之組織嚴緊。與其教育建設二費日增。不無可取法耳。至其人民浮囂猥瑣。與當年羅馬之雄風。及少年意大利之標榜。似不類。奇哉。

火車向北而行。初爲平原。後兩旁漸見山。再後山迎面而來。穿無數山洞而行。山多聳山。叢山萬壘間。行於其中。時雖盛夏。亦有涼氣。至山深處時。人家亦少。將至奧大利境。其營房在焉。詢所駐兵數。云有四連。附近并有大村落。過境照例驗護照。託之代照料之通濟隆公司中人。得以安睡。行李亦悉未驗。

二日早起。開窗一望。見地爲平原。詢之始知申誤時刻。須多一小時方至維也納。因得飽看風景。但見森林整密。田野修治。向聞奧大利人疏懶。百業不振。何不穎耶。將近維也納。工廠林立。工業亦不盡後人。無何而曾爲歐洲政治中心之維也納至矣。

維也納在羅馬時。曾作首都。神聖同盟時。作歐洲政治關鍵。歐戰以前。人口二百二十餘萬。今則二百萬而弱。入其中。道路寬。房屋偉麗。園林路樹。整齊可愛。車水馬龍。繁庶依舊。入旅館後。喜逢展覽堂。醫生等由匈牙利回。同住一處。深歎世界雖大。無處不可相逢。是日乘公共遊客車遊全城。導者於所經處。告以某爲皇宮。某爲教堂。某爲工廠。某爲名河。某爲博物館。某爲大戲院。某爲華麗之街。某爲遊戲場所。某爲紀念品。某爲古蹟。走馬看花而已。嗣遊一奧皇避暑之皇宮。門前有林園。復植樹以爲垣

園道廣闊。甚爲偉觀。左有博物院。右有動植園。遊其宮。奧皇用器。尙不奢華。宮係拿破崙一世所娶奧公主生長地。拿破崙一世亦曾來此。故奧公主及拿破崙二世等肖像及遺物。尙有存者。宮中畫壁不多。人物畫頗劣。風景畫有十餘幅甚佳。中有歷史畫數幅。人物排列。整潔劃一如朝班。遂覺毫無生氣。較之法國王宮之歷史畫。奕奕如生者。真不可以道里計。中有中國漆器。磁器頗多。有一室所列。云係日本皇所贈者。其漆器磁器復多中國之物。是日遊此宮。對於被炸而啓戰禍之奧太子像。最多人徘徊。是殆故宮無恙。帝子不歸。燎原之火。肇此星星耶。

三日參觀植物學院。晤其科主任 Dr. E. Mandel Mazzetti。此科主任由日內瓦之植物院主任介紹。係植物專家。曾在雲南五年。對於植物頗多發明。此院有植物標本百餘萬種。中以菌類最多。各系有專家。專事收錄。中國各省植物均有。院中不事教育。惟備各教授各專家及學生來院考察及研究。院中有植物研究報。每年出一大冊。與各國自然科學研究社及各學院交換。南京中山大學。北京植物研究社。均有交換品。并出中國出版各書報相示。據云繪圖尙佳。惟印法較差耳。詢其教育經費情形。乃感歎言曰。奧國因財

政受國際聯盟監督之故。借名減費裁員。乃不裁行政冗員。專裁教育與科學有關係之人員。最顯著者則各研究學院裁員至半。教育機關裁員四分之一。薪金則減三分之一。而生活程度。則較戰前爲增。舉例言之。卽如本院院長。月僅七百奧幣。(奧幣約合中國三毫二)我服務二十二年。湊明不少。月僅五百五十奧幣。至初級辦事人。月僅百六十奧幣。其摧殘奧國科學。有如是者。詢其兵額已少。兵費應減。此費可移爲教育之用。則云。戰前徵兵。戰後募兵。額少而費相差不甚遠。談及奧國政治情形。彼云現握政府權者。爲基督社會黨。握維也納地方政權者。爲社會民主黨。二黨政見不同。一偏資本家。一偏勞動界。奧國人口現爲六百萬。維也納占其三分之一。故祇見社會民主黨活動。政府退處無權。因其他三分之二之人散居各處也。另有國家主義派。目前則與基督社會黨聯合。言下覺各黨仍爲權勢之爭者。至社會民主黨。注重工人。現抽房租以築工人住屋。計現成三萬餘間。將來將足成五萬間。每間八人。共可住四十萬人。并有良好浴室。以廉價租與工人。今似言實未符。且居住之工人。現均是社會民主黨者。詢其近日與德聯合之趨勢。則云此奧國全國民所一致者。特意法仍借凡爾賽條約爲梗。奧國本先德

國而加入國際聯盟。德國加入國際聯盟之後。本可在國際聯盟會正式提出。然此會權操於法國。雖提出無益也。但奧人終必達此目的爲止。以目下六百餘萬人口。都城五十啓羅米突外卽爲他國之國。雖不能與人爭強權。然公理終信可勝。若果能聯合。則德國財政安定。奧亦財政安定。何至如今日仍爲人操其命脈也。且德奧聯合。實合科學原則。蓋昔日耳曼種也。昔日奧匈聯合。以武力統一數種民族於一治統之下。雖極力謀交通發達。感情融洽。科學家於其不合原則。早料有今日之分裂。故今日有人推測奧匈捷克等國將謀爲多腦河 *Donau* 之聯邦。此必無之事也。意大利現仍不悟此義。將割自奧之地。強迫奧民習意文。受意教育。終見其失敗耳。言時憤憤。檢地圖指所割地以示。并言中國政策之良。如對於西藏蒙古。不特不強蒙藏學漢文。反從而學蒙藏文。爲可敬也。參觀維也納大學。其校長 *Dr. Heinrich Pöhl* 抱病來招待。惟對於奧國教育現狀。言多抑鬱。蓋今昔易觀。無怪其然也。此校分文科。法科。理科。醫科。宗教科。醫科中有藥科。理科有各學科。另附動植地質等學院。宗教科中分新教與基督教。有教授七百人。學生一萬餘人。女生居三分之一。以學文科者爲多。至普通言之。則法科醫科學生

最多。以宗教科爲少。且日有減少之勢。尤以新教爲甚。蓋基督教究爲國教也。歐戰前
 有軍事教育學。戰後已廢除。至經費因政府財政支絀。只能撥出歐戰前三分之一之數。不
 足之額。由捐助。及增加學費以爲救濟。美國有二團體捐助經費者。本國人亦有捐助者
 。然終左支右絀也。以前奧人中學畢業。大半進大學。今則大半不能進大學矣。每言至
 盛衰之際。聲帶嗚咽。蓋奧國戰前土地二十餘萬方哩。人口五千一百萬。今土地僅得三
 萬餘方哩。人口六百餘萬。加以胥賦盡失。民窮財盡。尙扼於人。又何怪其痛心哉。此
 外奧大利尙有大學二。工業專門二。維也納并有農業專門。商業專門。美術院。音樂院
 等。

嗣遊郊外一舊宮。此宮建於十三世紀。後敗於瑞典。爲所毀。十七世紀修其上半。故
 上下二層。建築不同。中似小博物院。不能歷觀。惟此舊宮建於一山坡。四望森林整齊
 。田園修治。幾無一寸隙地。似此國民。人猶以爲疏懶。致於失敗。回顧吾國。殷憂何
 時可已。

四日參觀大學化學院。由其校長預告該院 Vorstand 教授招待。此院分爲二。(1)

注重有機無機。(一)注重理化。院中各室儀器。甚爲整齊。正在考試中。學生紛紛取用。其秤衡器。有可稱至一基羅而同時可得千分之一米克之準量者。其化學報多至三百餘種云。

次遊郊外森林。林皆松柏。青葱齊整。至爲可愛。來回共五六小時。經過村落。麥正登場。其農民耕作。甚似吾國。其女子裹頭赤足尤類。特吾國裹頭以黑布者。彼以白耳。回至維也納。遊其有名之士得芳教堂 *Stephanskirche*。中有耶穌之母。抱耶穌像。其冠有數寶石。大而晶瑩。行者至此必停足而觀。想甚寶貴。夜散步遊戲場。此場有一千七百十二萬方米突尺。昔爲奧皇遊獵地。其後許人進遊。今則改成種種遊戲場矣。週圍草場甚多。森林復盛。其一長街。有五啓羅米突。祇准人行。不准通車。此外人造山洞水池。或行遊戲車。遊戲船。無一不備。場中咖啡館餐室尤多。遊人如蟻。

五日早乘公共遊客車。爲奧國南部阿爾卑斯山脈之遊。經過前兵工廠。煙突之多。廠室之大。足見其出殺人品之富。今改爲普通工廠矣。見一水道。係羅馬時物。直過意大利者。工程之巨。可想而知。初行頗熱。見同行者。皆備外套。奇之。車行山間。漸有

涼意。及至聖摩利Summary山巔。則時當盛夏。氣候乃如深秋。曝日光中。而日光似失威力。毫不炙人。環境之足移人。有如此者。蓋此山雖高不過千餘米突。然因四週重山



軍營空懸山士宿納也維

。皆植松樹。青葱之氣。造成陰涼也。山間有大學醫院。為學生療肺病者。山巔有數旅館。遊客住者實不少。前奧皇常在此山避暑云。飯後穿山谷而行。至一山脚。乘電氣懸車。直登宿士山。此山固屬阿爾卑斯山脈而為奧大利之高山。高二千餘米突。登山時林木繁茂。一至山頂。下望以為高者。至此已覺甚平坦。惟南向下望。向所經之山陵悉俯伏於下。人

家道路如模型。最奇者。松樹高僅數尺。一望似爲新栽之物。及細察始知此松之枝幹盤地而生。占地總在一畝以上。而上挺則甚短。此山巔除盤松外。並無雜樹。其草則高不過數寸。有如綠茵。花至多而細甚。大者如指。小者如粟。黃者。紅者。白者。藍者。間色者均有。以黃色者爲多。以藍色者爲貴。云此爲阿爾卑斯山脈之花。路見一植物。有似吾粵韶州丹霞山之羅漢松。吾粵丹霞。見此有類丹霞之物。亦愛而拔之。爲導者所見。云此物爲此山所產。但甚少。伊引導數年。今始見。并遍示遊客。以見此物之可貴。所遊高山。非巨石巉巖不生草木。則長林豐草。濃陰蔽天。惟此山土質甚良。祇見矮松。小草。細花。實一奇也。至晚始回旅館。

六日訪大學教育學教授馬斯德 *Maister*。據云奧國小學五年至六年。中學八年。從前中學多預備進大學。故注重希臘拉丁文。今中學畢業。多須謀生。故改注重英德文。此新學制與舊學制不同之點也。中學復准男女同學。係爲節費計。有中學生幾過男生。故校中多男女分班。亦有數州男女中學分校者。并言以後奧國教育。祇須財政不爲人扼。即可振興。嗣遊其舊皇宮。及博物院。博物院甚大。物品亦多。

傍晚乘火車赴匈牙利 Hungary 京城布達佩斯 Budapest。一路平原。惟見麥田森林而已。奧匈界無大標識。但一過界。則田中之麥已雜有草。復時見野花開於麥中。雖有森林。樹既不純。亦不整齊。二國之民力。如此已足見矣。晚十時許而布達佩斯至矣。

匈牙利

七日遊匈牙利之布達佩斯國都。此都位於多瑙河左右岸。以六橋聯合之。風景出自天然。河之左岸爲平原。人家櫛比。新城也。河之右岸多山陵。爲壯麗王宮。及史蹟。舊城也。此都合二城而成。形勢有如蚌之開張。間於東西歐。故人民風俗習慣兼備之。綺麗有小巴黎之目。實結西歐繁華之局。過此以東。則帶亞洲俗矣。

此地希臘時旣建城。名其城爲多水。羅馬復以之爲殖民地。匈牙利卽匈奴。於十一世紀。由亞洲來居此城。時歐人以其鼻平面黃。眼小頰大。不類白種。復以其善戰而兇。詆爲魔鬼子孫。其立國一千餘年。前與奧大利聯合。歐戰後分而爲二。舊有土地一十二



匈 牙 利 公 國

萬餘方哩。人口二千餘萬。戰後所存土地。祇有三萬八千方哩。人口千二百萬。其政治始而共和。繼而共產。而復辟。現爲虛君專制。蓋政權皆操自執政荷綏之手。荷綏以力製造國會。既三次被舉爲執政矣。是日先遊其舊城之王宮。一部既爲政府辦事地。其一部則供遊覽。有一部乃爲王族所居。壯麗自無待言。其中跳舞廳之大。與其裝飾之麗。據導者云。歐洲實所罕見者。再遊一教堂。此教堂係匈牙利王受王冠之處。堂之偉大華麗。更不必論。堂外復有堡壘式之建築物。憑河而築。登其曠望處。遙望隔河。閭閻撲地。有如編貝。嗣訪其大學校長。正擬赴國務會議。談來意後。約九日再

晤。本日星期六也。告以九日將赴捷克。乃曰明日雖星期當於十一時特相候也。

參觀國會。非常堂皇。據導者云。除英國外。規模宏偉。當推此。至一室。有風景畫五。導者曰。畫中河山。戰後被奪者四。今僅存一矣。會中分二院。參議院現二百二十人。任期五年。衆議院二百六十七人。任期二年。閣員七人。可出席衆議院。故衆議院有閣員席七。參議院則有十餘席。因匈王親臣亦得列席也。遊一廣場。場在國家交易所前。場中四方各有一新石像。係紀念四方失地者。蓋戰後匈牙利東割達郎西里瓦尼亞及匈牙利平原之一部於羅馬尼亞 Romania。西以白倫根一帶歸奧大利。南之巴拉特由民族自決。歸羅馬尼亞巨哥斯拉夫 Yugoslavia。西南復以貝拉斯拉窩尼亞及哥羅地亞歸巨哥斯拉夫也。

參觀聖兒拉 Saint Gellart 旅館。係市所立者。館中有溫泉浴池數處。溫度不同。各視身體所宜浴之。另有溫泉熱氣室等。價亦較他旅館爲廉。至館名之由來。則紀念殉道教士聖兒拉者。

遊麻姑島 Margit Sziget。島在河中。以一橋通之。此島得名係由一王姑終身不嫁。就

島上教堂濟貧療病。人感其惠。尊爲聖麻姑。而島亦以其名名之也。島中有一小廟崇祀之。廟外短牆。有玻璃蓋一殘石。則係數年前掘地所得匈牙利來此最古之石。中有字。右一行。及左二行。尙可辨。字係直行。純類中國篆字。島中復有浴場咖啡館。遊藝場。大餐館等。而島中樹木成蔭可愛。勝地也。

八日早遊公園。園外係其立國千年之華表及石刻。園內花木叢密。中有浴室。有咖啡館。浴室咖啡館。非匈牙利所獨有。匈牙利却有特色。咖啡館之大。遊人之多。可勿論。而浴室幾等王宮。入其中當然有溫泉池。溫氣室。及特別浴室。此外更有修指處。修脚處。剪髮處。燙衣處。閱報處。寫信處。甚至餐館。咖啡館。宿舍。郵局均備。余滿擬一浴。卒不果。其後以次遊其動物園。美術館。動物園建不久。故式甚新。品物亦多。兼有水族。美術館各畫有宗教意味者不多。中有一部爲新式畫。石刻中常見有人面獸身者。此館之畫亦有之。

至午應匈都大學校長 Dr. Finacs Erud 之約。至大學參觀。并談大學及匈牙利教育情形。據云此大學成立已三百年。係一教士所創。現雖由政府支撥財政。然校中一切事權

尙獨立。以董事會司其職。董事會之組織。卽校長及各科科长。此校分四科。(一)法。(二)醫。(三)宗教。(四)哲學。校長由全校教授選舉。科長由各科教授選舉。均任期一年。校長并不連任。且須每年輪一科。如本年法科教授爲校長。明年則須輪選醫科教授也。全校學生六千人。法科約三千。哲學科千餘。醫科千餘。宗教不過百餘人耳。男女同校。惟女子不能習法科宗教科。此外尙有大學三。均國立。一係創自一八六七年。其餘二者均歐戰後新辦者。匈國教育制同德國。故哲學合文科理科爲一。

匈國教育全部。歐戰後均有大進步。小學新增二千餘。教育經費。增至三倍。至教育經費增多之來源。則在戰後兵額被限。兵費移爲教育費也。余以奧國植物學院主任所言。兵額雖減。徵兵改爲募兵。費不甚減之言。詢之。則云募兵每兵每月不過四十個幣。兵額只餘三萬有奇。溢費終不少也。

中學八年畢業。畢業考試。由中學自行之。與法國中學畢業由大學考試者不同。亦倣德國制也。中學畢業。可自由進大學。戰前中學畢業多進大學。及高等專門。今不然矣。中學分三種。一學拉丁希臘文者。一學拉丁及英文或法文者。一僅學希臘者。中學多

國立。雖有宗教及私立者。終不發達。

小學六年畢業。多歸地方自辦。從前強迫教育。由六歲至十二歲。本年起則增至十四歲矣。

詢其政黨情形。據云現保守黨最得勢。因王年輕。故行虛君制。由執政代行職權。閣員委任。亦由執政。名義上須由國會贊同。此外尚有社會民主黨等。然勢力甚小。若共產黨則匈人恨之刺骨。固不能任其存在也。

談後復言匈牙利人來自中國。此後國交應力團結。并介紹其大學之東方文化科文學教授 Dr. Froh'e Vimus 相晤。因訪之於其家。因值星期。正家人團集。未便長談。彼乃約晚餐。并介紹其兄與其三女相晤。余以不便擾之也。轉約其至旅館共飯暢談。遂乘暇遊其附近山林。及登山陔。以望全城。復至麻姑廟前。囑錫三影其數年前掘得之古石字跡。至晚與大學東方文化科文學教授飯於旅館。詢其匈牙利與中國之關係。與其所研究如何。則云夏商周匈人與漢人共中國也。秦築長城。始判爲二。此後仍有通婚。詢其至歐後有何事實尙與中國有關。則云匈牙利雖在西歷八百九十六年至此。然至十六世紀。

鄉中文字尙直行。與中國篆書大同小異。詢其是否如麻姑廟前牆上石中之字。則曰然。此外稱父爲阿爸。稱母爲阿娘。亦中國之舊音。并云土耳其亦有與中國音同者。如云聽爲聽。云凍爲凍之類。中世紀以前。其字亦直行者。至名姓之前後。匈牙利先姓後名。與歐洲各國先名後姓者不同。完全中國之舊也。嗣復言匈人欲明其來歷。故決定派伊赴中國調查。并敦國交。且擬在中國設學院派學生前往中國。同時并擬請中國派學生至匈國。使兩國明瞭以前同中國及血統關係。俾益親厚。復述其前此政府。派伊往土耳其聯絡情形。蓋匈人由亞洲西來。向爲白色人所嫉忌。歐戰以後。復與奧離。包圍之斯拉夫民族國家。如捷克羅馬尼亞巨哥斯拉夫等更倡大斯拉夫主義。結小協約以扼之。力求競存。思其同自東來之舊鄰。與二千年前之遠親。謀相團結。亦同其所。末後嘗「大學之道在明明德在親民」三句。復書「新」字。詢親民有新民之故。并對於三民主義有所質疑。至午夜始行。

捷克斯拉夫

九日早由匈都布達佩斯乘火車西返。赴奧都維也納。午餐後遊奧國國會。其規模與匈國會同。蓋匈之國會。實倣奧也。兩院同在一處。原日衆議院可容五百餘人。今衆議院祇有一百六十五人。無須此大議場。已改用原日之參議院爲會場。將衆議院封鎖。而參議院祇有五十人。卽改原日參議院對面之一廳爲之。導者爲原日門者。言時正如白頭宮女。談開元天寶遺事。不勝今昔之感。至現時兩院黨別。衆議院基督社會黨七十三人。社會民主黨七十一人。國家主義黨二十一人。參議院社會民主黨二十四人。基督社會黨二十二二人。國家主義黨四人。

下午五時許。乘火車北行。赴捷克斯拉夫 *Tcheco-Slovakie* 國都布拉格 *Prague*。林雖不少。但不如西行之整齊。田園之修治。似亦稍遜。入夜出奧境。並護照亦不一在。西行至匈牙利時。亦如之。迨捷克查驗護照後。就座而睡。至十一時許而醒。捷克國都布拉格至矣。一路風景。惜全未觀。是日共至三國國都。歐洲交通之便。於此可見。而鄰國相望。雞犬之聲相聞不虛也。

捷克在五世紀時成立王國。其後為奧所併。奧地利皇即兼為捷克王。歐戰時捷克軍人反奧而助協約國。戰後以民族自決。各國承認其獨立。而創造民主共和國。其國土係割奧國工業最盛之波希亞。摩拉維亞。細勒西亞三州。及匈國農業最盛之斯拉伐克。羅泰尼亞二州而成。面積五萬六千方哩。人口一千四百萬左右。其產業實佔匈原日十分之八。富厚可想而知。此新立之國。首屈一指者。

十日參觀捷克國都之差利第四大學 *Université Charles IV*。由其祕書長 *Jaroslav Cech* 招待。此大學係捷克最大者。創於一三四八年。差利第四係捷克之賢王。亦創辦此校。故校即以其名名之。校分五科。哲學科。宗教科。文科。醫科。理科。學生有八千四百

人。女生占一千六百人。以學哲學醫學醫科爲多。其教授待遇。第一年薪金三萬九千捷幣。(每捷幣合中國七分七左右) 第二年四萬三千。第三年四萬八千。第四年五萬八千。至第八年後可得六萬六千。薪金之外。復有特別優待金。蓋教授有子三人。則年津貼九千捷幣。此外每屆考試期。復有考試金。

捷克原有大學二。立國後增設二大學。從前大學悉用德文課授。今改用捷克文。惟留一校課授德文。以爲在捷克境之德人種就學。尙有規模較小之一大學。用俄文課授。蓋爲捷克境俄種人就學之便。

除大學外有音樂專門二。工藝專門。農業專門。獸醫學校。美術學校各一。捷克全國教育經費。據一九二七年調查。各大學及獸醫學校年費三千九百三十餘萬。較立國初年增多二千三百八十七萬餘。此總數中差利第四大學占一千三百五十六萬餘。此外應推獸醫學校。其數爲一千萬。除此項經常費外。尙有特別預備費八百七十餘萬。

高等專門學校經費共七千八百三十四萬餘。其中天文學院年費七百四十餘萬。中等教育經費。普通中學一萬八千一百六十八萬六千餘。中等師範二千一百二十九萬餘。中等

各種專門一萬一千八百餘萬。

初級教育經費爲一萬四百三十萬八千餘

廢疾人學校。卽盲啞學校之類。爲一千萬。

農民學校一千四百餘萬。

補助貧學生費一千餘萬。

科學院展覽會及戲院宣傳國史等津貼二千萬。

據差利第四大學祕書長言。捷克亡國三百餘年。以致未受教育者。占大多數。卽受教育。亦用德文。致人忘故國。今捷克教育方針。(一)力求普遍。(二)悉用捷克文。并言近日差利第四大學。將有東方學院之設。此院原應早成。因一通中國文之教授逝世。遂致停頓。今已另覓得一人。或可早日成立。深盼以後兩國互派學生。以謀學術與國交之日益聯結。言時出東方英文時報相示。謂伊對中國事甚有研究。亦希望甚大。極盡誠懇之情。

參觀圖書館。館中藏書數十萬。中有手抄本數千。各圖書館均有抄本。但多宗教之書

。此則兼有醫書及各科學書。此外尚有古物之陳列。

捷克總統瑪薩里克 Masaryk。係哲學教授。前任議員時。屢提出關於捷克自立案。與政府去其教授之職。逐其出境。乃之英。英皇授以教授銜。歐戰發生。卒努力達所志。被舉爲總統。任期七年。去年再被舉。現年七十八歲。出入多徒步。且有時乘馬。自稱仍爲教授。不以總統稱。捷克無論何黨派。皆愛戴之。因欲一見其人。逕投刺往晤。由其祕書長 Dr. Vladimír Kučera 接待。謂總統適在山間養病。離京不過數十基羅米達。欲晤面者。可乘車前往。伊一面電告之。余不欲多往返。遂謝之。彼云。欲詢何事。伊可代答否。余乃詢其捷克立國後。最注重之政策。彼答曰。第一教育。第二交通。因捷克亡國後。奧匈冀消滅捷克人之民族思想。故不使習捷克文。故捷克立國以後。增設中小各學二千餘校。一律課授捷克文。同時須使捷克人有高深學問。故新設二大學。及高等專門各校。現又將再設一大學。至交通。戰前在奧匈管轄下。道路不修。交通困難。政府現定一大計劃。建築二大道。(一)自法加爾省經巴黎。至德國。經捷克。直達莫斯科。(二)則由意大利直貫捷京而北。二道若成。則集中歐洲交通於捷京。成十字形。此

費甚鉅。現已有十萬萬捷幣之基本金。此基本金以轉運公司與有汽車者擔負爲多。然非十年尙難籌辦妥當。其成功則更需時日矣。

詢其立國後歷年財政收支之增減。答曰。捷克教育交通二費雖大增。而財政收支則大減。一九二十年收入。爲三百六十萬捷幣。今年預算則爲一百三十萬捷幣。幾減去三分之二。蓋財政爲人民負擔。國家少用一文。則人民少一分負擔。故不急之費。力求減縮也。其減縮之原因。則數年來裁汰行政人員。至一萬有奇。同時爲其覓生利職業。其減縮重要原因。則捷克戰前。用奧幣。奧幣破產。受其影響。社會生活日高。其時財政亦大增。一九二十年捷克幣制自立之後。物價漸跌。民生日舒。稅收日增。同時預算復日減。今年收支已相抵。明年可望有贏餘。而政府尙欲再將財政減縮。否則人民見國家預算過多。則將日抬貨價。貨價增。國家之險象隨之。故國家萬不能濫費。至收入之大宗。煙草專賣爲其一。每年可十三萬萬。占預算十分之一。

詢其兵額若干。答云十三萬常備兵。現國會有主張設特種兵。如意大利棒喝團之黑衣軍者。實則我欲以私擁兵。人之欲私。誰不如我。兵之可爲我私擁者。又何不可爲他人

私擁。不徒傷財。適以增亂。現各人多用此理。此主張已成畫餅矣。


詢其對於工人居住。有如維也納爲其建築否。答曰政府專爲工人建築居住則無。但政府現定工人居室建築章程。凡工人欲依章建築住居而無力者。政府代向銀行借貸之。利息由政府負擔。貸金則由工人償還。

詢其向來捷克多大地主。政府如何處理。答云。歐戰前捷克爲地權最不公平之國。一千八百九十六年捷克有數省。耕地所屬。共一百四十八萬三千四百七十五人。其中一百〇四萬五千八百二十二。每占耕地不過一萬米突方尺。此一百〇四萬餘之人。實占農民百分之七十。而耕地僅占百分之七。反之其中有三百五十一之大地主。每人竟占二萬萬米突方尺之耕地。占全國百分之二十七。職是之故。人民離國他適者。達二百萬。卽美國亦已有一百二十萬。且爲人耕。終不如自耕之力。如是一年之穫。不足半年之食。農民遂棄田舍而趨城市。此莫大之憂也。此等農制。若不從根本改革。則國將不國。改革農制。各國久思行之。但不澈底。如一八八二年之俄。一八八七年與一八九二年之英。一九〇四年之丹麥瑞典。一九〇八年之法蘭西西班牙。匈牙利始終未舉行。雖一九二

一年之革命。其所欲行者。乃共產黨之惡政。非欲調節地權也。至捷克所行之農政改革。乃對於從前佔地過於百五十萬米突方尺膏腴之地。或二百五十萬米突方尺半耕之地者。政府將其超過之地。給價收回。其地價自不能以一九一九年至二十二年之價高時為標準。而以戰前一九一三年之地價為收回底價。至奧匈王族貴族不費力而得之地。則代價又自不同。給價之法。或給其一部。其一部則給年利四厘之債券。逐年并最少清還所欠百分之二·〇五之地價。如是逐年政府可減利息。而地主亦得資以營他業。但收地價。用款至多。濫發紙幣。又將妨礙財政。補救之法。政府可不收其應收之全部。地主可將其應收未收之地開墾。開墾後政府再收回時。須加給其開墾之資。及因開墾而增之利。政府收地之後。可任意或租。或賣。或給與欲耕之人。但政府特別優待謀獨立而戰。及貧而無田可耕之人。至農民有小地者。政府常給以鄰地。俾其擴充至百萬米突方尺以上。一百五十萬米突方尺以下之耕地。若森林則多收歸國有。因捷克少森林。不得不由政府負責發展也。農民雖有耕地。若無農居。仍難耕種。政府已於一九二三年為築農居八百。此後逐年增築。關於改農制款項收支。特設一董事會。會長一人。副會長二人。董

事十二人。會長副會長由開員選舉。董事由國會選舉。各選舉後。均由總統委任。此外有分局八十一。分理各地之事。改革農政後。第一年收回之地。爲三百九十六萬三千〇六十四米突方尺。耕地不過三分之一。但所收之地。已領耕者。則不過六分之一耳。同時政府得森林地有一百萬米突方尺。

詢其捷克政黨情形。答云。各黨均有。至國會議席以農民黨爲多。共產黨亦有二百萬選舉票。但捷克之共產黨不受第三國際指揮。且以捷克國利爲前提。故無礙於國家。舉例言之。本年七月七日。共產黨



(上橋此於兵瑞拒會生學大利差戰之年十三典瑞) 橋利差京捷

將爲大宣傳大運動。內務部一令即止之。若用循循善誘方法。捷克共產黨。不久將無形消滅。

談後臨別。殷殷以二國交好爲訂。再聲言可乘車往晤總統。伊當電告。仍謝之。此祕書長亦大學教授也。

——夫 拉 斯 克 捷——

遊差利第四橋。橋跨易北河 Elbe。之摩爾刀河。依凡爾賽條約。捷克可自由運貨。由此河直達漢堡 Hamburg。此橋十七世紀初捷克大學校長教授會率學生拒瑞典兵於此。故捷克視爲歷史上一大紀念。橋端水港。名水城。蓋水港中之屋。悉如意大利水城之建築也。嗣乘車至一小山。山有林。中有高六十餘米突之鐵塔。係紀念一九二三年捷克展覽會者。乘電車而登其巔。全城入覽。左望有大運動場一。數年前世界大運動會。即開於此。塔旁有一室。中有油畫。繪捷克大學員生拒瑞典兵於差利第四橋上之情形。一如真。蓋最近係真物。如瑞士所觀之普法戰爭法兵敗入瑞士圖。但較小耳。再遊王宮。此宮除總統府外。內務外交各部在焉。道路凹凸不平。導者曰。向者捷克之財。均集諸雜也納。故王宮道路尙如此。宮基大。有房千餘。旁有大教堂。係當時王所祈禱處。王

宮及教堂正大興土木。開費二十萬元。此時之維也納院宮。則反近於蕪毀矣。王宮旁。有僅可舉頭之小屋一列。名曰點金巷。蓋當時化學家云能點石成金。王召試其術。數月無效。乃遂去。此則當時之化驗室也。但此化學家點金雖不成。對於製磁反有發明。以視吾國道家之點石成金者究有間。

十一日參觀市政廳。廳建於十三世紀。門前有一鐘塔。其鐘計月計日。復計時。并於月中標明本月工作。如春耕秋穫之類。每屆一時。鐘響時。鐘上有一門。輪流出現人物。此鐘於一四九〇年爲一大學教授所製。至今不壞。可珍之至。游俄國難民室。室無樓。一長列如種花溫室。此種難民。受蘇俄共產黨壓迫而逃出者。間有二萬。捷克政府特築室以居。并強其子女入學。昔之目不識字者。聞今有進大學者矣。

經一新而整之建築物。導者曰。此總統出私資建此。以居貧學生者。每月有津貼。至畢業爲止。

參觀國會。其國會正因農民天災補助法案。召集特別會議二日。議事時。場內議員坐席者甚少。一議員發言時。同意者鼓掌。以助其威。反對者插言。以亂其勢。無何兩黨

互罵。擦掌磨拳。幸其座位分黨而坐。適中隔一中立黨。否則當打成一團。臨表決時。議員紛紛入席。有一黨則完全退席。只留二女議員在坐。似爲偵刺。結果人數不足。不能解決。場中共有老女議員數人。其餘議員。亦無四十以下者。新興之國。亦重老成耶。是日參觀者爲衆議院。有議員額三百人。六年一任。其參議院則百五十人。八年一任。

遊博物院。院甚大。陳物品甚多。尤以鐵類爲特色。捷京人口七十萬。歐戰前則不及六十萬。街道雖寬宏。但不甚平。商業爾稱盛。入夜皆閉門。息電燈。迥非各都會之不夜天者可比。旅館中工人暢談時事。大有吾粵工人之風。并略知中國事一二。真難能者。至國中文告標識。悉改用捷克文。指導員須經過考驗。故能發揚國光。

十二早乘火車由捷京赴德意志之德勒斯登 *Dresden*。二國國境隔以山。出入口均照例驗護照。入德境後。林漸密。田益治。甚至石山均翠柏叢生。望塵知馬足。德人之能力。大可知矣。林中見鹿二。一大一小。野鹿之見。以此爲創。將近德勒斯登時。工廠林立。至下午二時。而德勒斯登至矣。

德意志

德勒斯登位於德之東南。爲薩克索 Saxe。歷代薩王居於此。曾臣服於拿破崙一世。拿破崙一世并於一八一三年在此敗聯軍。至一八七〇年普勝法。始實行與普魯士聯合。人民十之九爲新教。十之一爲舊教。猶太教則百分之一。居民六十餘萬。出產以磁器。紙煙。手套。影相機。爲大宗。德國工業繁盛之一城也。到後。知正開市政工業建設展覽會。卽往參觀。會中陳例以電氣爲多。亦至新奇。其所注意。則城市之交通建築。與避危險。及森林。橋梁。公園。公共衛生。公共游藝場。其道路避危險之法。所用紅燈綠燈。及劃定人行線。則美洲繁盛市已通行者。至晚而歸。

十三日乘汽車游覽。初參觀美術館。係舊王宮所改者。中分二大部。一部舊畫。一部新畫。舊畫中有一部鉛筆半身畫。皆出一意大利女畫家之手。甚佳。次遊王宮陳列所。中藏舊時王之用具與私蓄。珠。石。金。牙。銅。木。皆極精細。中有一櫻桃核。刻有二百櫻桃。導者與擴大鏡指視。歷歷可數。向聞吾國有一橄欖核。刻亦壁賦。并刻蘇東坡佛印泛舟遊赤壁。其技應更神矣。觀一教堂。頗壯麗。其後遍歷各處。經一山陵。森林至密。導者云。此森林面積有數千萬方米突。所歷歐美各國。莫不視森林爲要政之一。不特關係衛生。尤增河山之美。卽孟子亦云「所謂故國者。非謂有喬木之謂。」今吾國並喬木而無之。若再不於森林注意。則幾何不令人與非洲沙漠等視哉。

是日導者爲一五十餘之人。據云伍秩庸博士來此時。彼爲導引五日。至伍博士之逝世。彼亦知其爲某年。并云彼曾在市政廳與伍博士撮一影。伍博士之爲人欽敬可見一斑。是日下午乘火車至柏林 *Berlin*。六時有奇。柏林至矣。汝爲潮譽友豪均在此。相見至快。而柏林同志。殷殷歡聚之情。尤可樂也。

十四日上午與柏林各同志往還至繁。亦至樂。蓋離法後。不特未見同志。並中國人亦

少見之。一旦同主義之人。相聚一堂。喜可知已。特柏林夜後。門雖盡闢而汽車鳴鳴之聲。澈夜不輟。以致不能熟睡爲稍困耳。下午參觀水族館。館甚大。水族亦多。殊出意外。館甚堅樸。其美麗則遜摩納哥者。館分三層。下層爲海族。上一層則介類。及無鱗類爲多。三層則蟲類爲多。次游動物園。門做東方式。中有動物一千七百餘種。占地三百六十畝。其露天音樂場。可容二萬餘人。

晚赴駐德支部之歡迎會。至午夜始回。

十五應薩克索邦 Sachsen 黨部之約。與張掖張近芬同志赴利比瑟 Leipzig 全體黨員之慶祝北伐勝利會與歡迎會。利比瑟在柏林西南三百八十里。人口六十八萬餘。工商文化皆占德國重要位置。地點尤爲德國中心。出產品以書。鐵。皮。三者爲大宗。其餘音樂美術。皆此城之出色者。工業展覽會。年開二次。各國皆派人參與。入場者十餘萬人。本年農業展覽會。入場者竟達六十萬。就書。鐵。皮。三者之廠肆計之。亦有足驚人者。印刷局四百九十九處。訂書局三百四十七處。大書肆一萬〇四十家。鋼鐵廠七百五十八處。機器廠三百十五處。皮貨店八百十四家。至其車站偉大。實冠全國。建於一九〇

九年。成於一九一五年。長三百米突。寬二百九十米突。面積八萬七千方米突。其左右二門。高二十五米突。寬三十米突。站臺內高二十八米突。其容積約二百三十四萬九千立方米突。各站臺寬者四十五米突。次者三十二米突。長二百零三米突。同時可入二十六路列車。建築費達一萬五千萬馬克。

由柏林至利比瑟。向南偏西行。一路林青麥黃。鄉村復多傳導電流之鐵柱。使小鄉村亦有電用。車行不及二小時。而抵歐洲最大之利比瑟車站。由同志導至會所。同志除學生外。商人爲多。一堂歡聚。精神至佳。開會後。由同志自烹調中國菜而食。覺風味特佳。嗣參觀市政廳。廳至偉大。登其鐘樓。高一百餘米突。一望全城瞭然。此城先定計劃。而後建築。公共之建築成。而私人之建築始。故市內最爲整齊。次遊戰勝拿破崙一世之紀念塔。途經郊外園地。徧掛紙旗紙燈。五光十色。蓋是日值星期。市民多遊郊野。各就所有園地張掛玩物。在此度星期也。將至塔時。有一街。名曰十月十八街。蓋一八一三年十月十八日俄普奧聯軍於此敗拿破崙一世之紀念也。塔之四週。森林甚密。塔前有水池一。此塔紳以石築。既堅且巨。復甚堂皇。入其中。冷氣襲人。有數層刻有石

像。各有代表之意義。塔中迴音至大而清。固歷史上極大之紀念品。塔外有一大石。名拿破崙一世督戰石。蓋拿破崙一世當時。立此石上督戰也。此城教育復至有名。本擬參觀其大學。適是日星期。不果。入夜。乘車仍回柏林。

十六日送汝爲翰魯友豪赴瑞士。車行後。赴灣細 *Wamsee* 湖遊。湖中浴者以數千計。至晚始回。

十七日晤教育部某主任。與談教育狀況。詢其歐戰前後教育不同之點。據云。歐戰前後教育之不同者。戰前教授注重灌輸。戰後教授注重啓發。戰後於原有文中學校。高級實中學校。初級實中學校。三種外。加一注重德文之中學。

詢其學制。據云初級小學四年。無論男女均須入學。畢業後可分三種。(一)有力進大學或高等專門者。可入文中學校。高級實中學校。初級實中學校。與新添之注重德文之中學校。此四種中學。八年畢業。畢業後再入一年預備科。即可進大學。或高等專門。(二)力不足者。可入一種三年畢業之中級學校。此種學校注重實科。畢業後無力再學者。可出而謀生。有力再學者。可進一種五年畢業之實科學校。此實科學校畢業。再有力

者。加預備科一年。亦可進大學或高等專門。(三)決無力進大學者。可入一種四年畢業之中級學校。此種學校。注重初級工藝及職業。畢業後有力者。可進一種四年畢業之中級工藝或職業學校。此種學校畢業。不能再進大學。至中學所課外國文。戰前以法文爲主要。他國文爲次。戰後則以英文爲主要。法文爲次。然事實上。則德國南方多以英文爲主。法文爲次。反之萊茵河之西方。則多以法文爲主。英文爲次。至柏林一百七十餘中學。則半以英文爲主。半以法文爲主。至強迫教育。則至十四歲。就普魯士計。小學三萬二千餘校。教員二十萬人。

詢其戰後進大學或專門者。比戰前如何。則云加增。因中學畢業無業可就。不得已仍入大學。卒之多不能竟其業。反之小學進中學者則減少。因經強迫教育年齡後多出而謀生。其次則死者多於生者故也。

詢其教育經費之來源及狀況。據云。小學經費。就普魯士言。四分之三係國家給與。三分之一由地方自負。此外尙有教會辦之小學。但其經費亦多由國家給助。高等專門經費。則國家與地方各半。至大學名義爲國立。然其經費則獨立。其獨立內容。乃自制定

預算。交國會通過後。除本學校有收入外。不足之數。由國家撥足。戰前各大學基金甚足。戰後受馬克低跌影響。全歸無有。今大學等所收入。不外學費。及醫科之醫費等等而已。至全國教育經費。約占全國收入三分之一。較戰前數目。則增加三倍。增加原因。(一)生活較戰前爲高。(二)戰後少義務教員。(三)各人之奢望增加。至薪金之增加。向一百者今約加六十。其外則增於築設體育場。及擴大增多等事。單就普魯士而論。全年教育經費爲四萬三千六百萬馬克。

至教授講學之費。每星期聽講一小時者。一學期收二馬克半。半歸教授。半歸學校。若教授每學期所得之講學費。不足二千馬克者。國家補足之。此講學費。係在薪金外。其薪金按照官俸。由第十三級至第一級。至大學學生納費。戰前納二百馬克學費後。即可上應學之課。現則學費雖止納六十馬克。然每上一課。仍須納聽講費二馬克半。

詢其中學是否注重男女分校。據云然。但人少之地。亦有同校者。男子中學雖多係國立。至女子中學則多私立。因向來女子中學不發達。至一九一〇年始有完全之組織也。詢其德國教育。現在有何難點。據云。(一)教授改爲啓發。教材不足。(二)經費支絀

。(三)缺乏外國教育之調查。

下午參觀衛生展覽會。是會於飲食。身體。種種有關衛生者。一一列表繪圖。或用模形。或用實物。並加以說明。

晚遊遊息場。入場正放煙花。種種色色。悉如吾粵。特其火花之色較多。其他遊戲飲食。莫不悉備。觀者極衆。

十八日參觀西門子 Siemensstadt 廠。廠爲德國大工廠之一。設於柏林西方一大曠地。逐年擴充。今成城市矣。因以廠名名其城。工人有十一萬五千人。所製爲電機及關於電之應用品。出品多銷外國。以南美爲多。中國銷其貨亦不少。廠中派專員及工程師導觀各廠。初觀一廠。爲製海底電線者。由粗銅線製成細銅線。將細銅線逐包逐捲逐大。至數百細銅線而成一海底電線。經十餘部工作而始成。可注意者。則包小線者。向以樹膠。或其他之不傳電物。今改爲紙。一因德國現在樹膠無來源。二因紙價廉也。次觀已製成之應用電器。如電話也。電扇也。電鐘也。電鏢也。電號也。應有盡有。且復新奇。由廠中款午飯。飯後參觀其廚房。器具悉用電。四千人之食。可一小時烹就。嗣參觀其

製造水力發電機之廠。廠甚大。工人不過五十人。再參觀其附設之幼稚園。係專收工人之子女者。至四時後而返。

遊戰勝紀念塔 *Stegeshau*。此塔四旁。均有鐵鑄之畫。(一)爲德奧戰勝丹麥者。(二)爲德國戰勝奧國者。(三)爲德國戰勝法國者。(四)爲德軍凱旋受歡迎者。一九一八年凡爾登結約時。法國提議須毀去德勝法之一畫。其畫之妙有足動人。可想而知。塔有大圓柱。分三層。每層有砲二十。爲小柱。此砲係三戰役所得。每國二十尊爲一層。三國共六十尊。爲三層之裝飾品也。其頂則立戰神。塔前有大路一。爲凱旋路。路旁有歷代德王之全身石像。每王像之後。有其大臣之半身像二。威廉第一 *William I* 後之像。一爲俾士麥 *Bismarck*。一爲毛琦 *Moltke*。所奇者。至威廉第一之像時。適路交叉處。不能再立像。而德之皇統亡。聞清室太廟至光緒而位盡。而清之皇統亡。其事偶然。可成談資有如此。塔之左爲俾士麥像。像後卽國會。塔之右爲毛琦像。塔後則當時陸軍總長像也。其右森林甚密。其左爲凱旋門。門上有戰神一。拿破崙一世時取往法。普勝法。乃取回。不過向之面向門外者。取回時面向內耳。德國每當國慶及紀念日。其軍隊及政

府人員。必整隊經此門。故門前後之路皆甚大而美。

十九日參觀愛智工廠 A. E. G. 廠與西門子工廠同爲德國大工廠。但西門子之工廠。聚於一處。愛智工廠。則分之十八處也。據云廠有工人十萬。出品亦有十萬。是日由廠派專員二人。導觀出品陳列處。製造發電機廠等。詢其城市公衆車。有軌電車。與大汽車執便。答以大汽車便。現繁盛之區。已有廢有軌電車者。詢其美國汽車發達後。火車公司日虧本。歐洲現有此現狀否。則云。已有此趨勢。因貨物少者用汽車運。費省而便也。但歐洲目前之汽車。不如美國多耳。詢其美國之福特公司已預備以飛機代汽車。可成事實否。則云。可成事實。美國富易爲。歐洲則較難。參觀製造發電機廠時。適當工人午餐。工人就座而食。不過自帶之牛油麵包。夾肉者甚少。間有兼購牛奶咖啡者。則廠中出售甚廉。不過二十五分尼。(每百分尼值一馬克。)食後無幾又復工作。爲狀甚苦。

下午社會民主黨黨報記者來訪。除詢問游歷歐美及法國情形外。因談德奧聯邦。而及泛歐洲主義。至二小時有奇。始別去。

二十日參觀柏林大學。由其校長接待。并參觀其大禮堂。各教室。自修室。美術館。校園。餐室等。參觀大禮堂。正修建。壁上一畫。據云自皇宮取回者。此物原係禮堂中之飾品。前爲德皇取去。懸之宮中云。其校長并云。八月三日。爲此禮堂行修建落成禮。請參與。以行期已定。謝之。參觀教室時。有一教室。可容六百人。坐滿後。仍有無數立而聽者。係一政治學者授課。教室中有一幻鏡。凡教授有以文字告學生時。由幻鏡映出。全堂均能明瞭。美術館。全係做塑希臘羅馬之像。導入觀時。似甚鄭重。然曾經在羅馬觀原像。對於此做塑之像。覺索然無味。自修室。則每科有每科之小藏書室。校園立一歐戰所死教員學生紀念碑。用拉丁文三語。(一)無戰敗者。(二)戰敗。(三)將來戰勝。德人之意志。可於此覘之。餐室。由學生自由購食。每人每餐價七十分尼。開餐利則爲四十分尼。皆較市上特廉。詢其學校管理人。學生有無各種團體。答云。祇有體育及學術團體。不能涉及政治。及校中其他問題。其章程復須經學校核准。以前有一學生聯合會。帶有政治色彩。已解散。至學生有一萬餘人。非正式生之數亦如之。

柏林大學。分宗教科。法科。醫科。哲學科。校長每年由教授選舉。主持校政。不受

政府干涉。而以教授所組織之委員會輔助之。教授學術主張。亦絕對自由。學生自由選課。無學期等試驗。有畢業考試。其畢業考試於學生照章修業滿期時。自行報考。修業滿期。長短不同。宗教科法科哲學科。至少六學期。醫科至少十學期。但不報考者。學校亦不追問。不過無論修業年期多少。不經考試。不得畢業耳。

晚觀矮人演戲。中國向有矮人國之說。今日始行實見。其人高大者。不過如常人十歲。其餘則不過如常人五六歲而已。此戲院前後有數十矮人。演打武唱演歌舞。均無異常人。不過驟觀認爲兒童演戲耳。特中有有鬚者。幾疑爲初生有鬚之周靈王。此事可與歐美生鬚之女人。同一趣觀。蓋歐美女人。常有有鬚者。甚至二十左右卽有之。若非藉服裝以爲區別。莫不錯認爲偉丈夫者。尤以歐洲爲多。

二十一日遊波士丹 *Potsdam*。由夏威夷 *Hawaii* 乘火輪前往。湖之南岸盡柏樹。其北岸則盡果園。無山而有小坡。人家疏落。惜水濁而不清耳。船行一時有奇。而波士丹至矣。初遊一教堂。內葬普魯士名王弗來特列克 *Friedrich* 者。次遊無憂宮 *Sans Souci*。係弗來特列克王所建。宮外園林茂密。宮內莊麗堂皇。其與法國王宮別者。則壁畫天頂

畫甚少而代以雕刻耳。宮旁有一磨坊。係建宮時之美談。當時王欲擴充花園。以磨坊有礙。欲購之。磨主不允。再許爲其另建新磨坊。磨主仍不允。王大怒。聲言將拆之。磨主亦怒曰。「汝若動一動。將訴汝於柏林法庭。」王聞而喜其國法爲人信服。乃謝之曰。「愿汝永爲我好鄰」。故至今磨坊依舊。德人豔言其事。其旁有一建築物。則庚子之役。德人取我天文儀器。實置於此。歐戰後依凡爾賽條約。今已運回我國矣。再次遊新王宮。輪奐自不待言。有一特奇之宴會廳。柱皆天然有色礦石分段砌成




圖 宮 德 無

凸凹之形。其壁既非繪畫。又非雕刻。完全以海中介殼。砌成花紋。聞間雜珠寶。實見所未見。至晚乃乘船沿湖之北岸而回。

二十二日遊威廉第一夫婦及其父母之葬地 Mausoleum。入門塑一戰神。此戰神德國隨地所有。亦猶法國隨地有自由神也。窗用藍玻璃。映成全室均藍。次游一王宮。宮中廳室甚少物品。卻處處有中國磁器數件。有一室則裝滿中國磁器。間雜日本之物。云爲英國商人所贈。非獨無一佳品。且皆劣不堪言。竟有不值一毫之小件無數。拿破崙一世至柏林時。曾在此宮與普魯士有名王后會晤。拿破崙一世并曾在此宮寢處。夜聞軍樂之聲。夢中驚醒。以爲德人來襲。後察知爲自動軍樂機發動。其機尙存。遊時導者尙開其機奏軍樂。以娛遊客。

二十三日參觀印刷所。乃柏林印刷最大之所。由映板觀至製板。復由印書觀至成書。色板原分次印成。今則有一印數色者。印報之機。則白紙入機後至報印成摺好。數好。直運至廠外。有一畫報。每星期出一百八十萬冊。冊數十頁。在此印無誤期。其數亦可驚。所用之機。既非用煤發電。亦非用水發電。乃用一種流質。蓋皆潛水艇機所改者。

此廠及前日所觀之愛意智工廠。皆猶太人所有。美國經濟權落於猶太人手。聞德國落其手者亦不少。猶太人無國。而擁經濟大權。亦可畏哉。

下午乘車遊美術館。館門已閉。乃漫遊柏林城。柏林跨易北河支流之史普里 *Spree* 河兩岸。有橋四十。以通往來。有此點綴。益增風景。中央有大師林。不特衛生。尤覺美觀。道路至寬大。路樹復青密。惟潔淨不如所聞。房屋整齊。交通便利。十七世紀時居民不過五千人。一九一九年統計。爲三百八十餘萬矣。現仍蒸蒸日上。偉哉。

二十四日參觀高等工業學校。因已放假。故未關照其辦事人。由肄業其校之潘尹王思濂二位。導往參觀。此校成於一八八二年。在柏林路。佔地頗廣。除校舍分三大座外。後有校園。中有物理化學。電學。冶金。靜力學。金屬剛性。機件。內燃機及汽車機器。水利工程。發力機器。通氣機。水力機等試驗室。

校舍分三層。下層爲各種研究所。如電氣試驗。高壓電氣試驗室。物理教室。動力學試驗室。電燈試驗室。無線電學試驗室。及販賣部。其上有禮堂。周圍列名人石像。學校辦事處亦在此層。二樓有船科標本頗多。潛行砲艦標本均有。三樓則爲圖書館。及建

築標本。總計教室三百餘間。課程名目。多至一千二百餘種。教授與講師約四百人。學生則四千餘。規模爲德國高等工業之冠。

參觀一美術陳列所。所中盡新派畫。場所頗大。品物亦甚多。

二十五日與愛意智工廠一職員談德國工人情形。因前參觀其工廠時。詢其德國工人情形。彼約另日擇一人詳答也。據其所述情形於左。

德國戰前無保護工人專法。有之惟散見於民法商法中而已。其時可謂工人在法律上無地位。戰後政府與社會認保護工人爲不可緩之事。雖未有完全之工人保護法。然特種保護工人之法。產生不少。同時工人亦組織團體。以謀工人之幸福。此團體雖不能判決工人與工廠之糾紛。但可以談判是非。工廠每三月并須報告其廠中工人之進退。與薪水之增加於此團體。至有限公司之董事會。此團體亦得舉代表參加。此工人團體與工廠。遂處於同等地位。至工人與工廠。所訂合同。與保護工人法不符時。此團體隨時可要求工廠取消。并償其損失。

工人與工廠之爭執。戰前歸普通審判廳。現則歸特別法庭。其訴訟亦分三級制。特較

普通法庭爲簡捷。不過至第三級。仍歸大理院審判。但工人與工廠。各得派代表出席。

關於工人身體生命。戰前亦有保險。戰後特爲注重。復定專章。如傷殘費。疾病費。退老費等。大略言之。傷殘費工廠負三分之二。工人團體負三分之一。疾病費。由工人與工廠所組之管理工人保險團體給之。以上二者。給費多少。視其工金爲定。至六十五歲以上之退老費。亦工廠占三分之二。工人團體占三分之一。

至失業工人。亦有補助費。每日由機關給以一個半馬克。有家累者。仍得酌增。此費來源。係抽自工人有工者所積。凡工人日有六馬克者。須抽十五分尼。交機關存積。工人失業時。卽以之補助。同時并須爲之謀工。

至工廠建築。合工人衛生否。工人團體有檢查權。至工人薪水。廠主不得隨意減少。至工會係以業分。然一業亦因政治關係。不止一會。

其後詳言愛意智待工人之厚。非在有法時而已。然現在比較保護法爲優等等。連日參觀工廠。及大學。并與教育部主任談話。均由使館蔣代辦兆鈺偕行。附誌感焉。

遊博物館。此館係陳列石刻爲多。遊一教堂。此教堂係德皇祈禱地。遊一王宮。此王

宮係德皇最後所住者。故用具齊備。品物精良。中有吾國磁器。甚多佳品。以上三處。同在一處。如品字形。遊城外突里不多。The Pavilion 遊息場。此場有水環之。風景頗佳。入夜竟有數萬人。戲息於中。惟見萬頭攢動而已。旁有一天文台。欲往觀賞。惜天陰閉門。

二十六日參觀社會民主黨黨部。與其祕書晤談。詢其現在社會民主黨爲內閣總理。注重實行何政策。據云此內閣與中央黨國民黨等合組。故能施行之政策至少。現在先求實在實行工人八小時制。其次欲廢死刑。定國慶日。亦被人反對。他尙未能言及。

詢其工人現狀如何。則云工資加增。不如生活加增之高。故甚苦。房租雖高。猶是政府定章限制。方不致太甚。現在力求多築最小而適於工人住居之房屋。以利工人。

詢其農民情形。據云將廢大農制。

詢其黨中成分如何。據云工人占百分之七十。

詢其與各黨關係如何。據云與中央黨民主黨接近。國民黨有一半接近。共產黨則聯合皇黨等。以爲社會民主黨敵。

末謂社會民主黨。八月五日將在比利時開國際社會民主黨大會。中國國民黨與社會民主黨主義相同。請參加。以謀兩黨之聯絡。

